

SAN JUAN

Juan ã daacátjidih jwí tái beh joyát pínah naáwát

¿Déhe tigaá daácni? Juan, Jesús ã bohéni, chah ã oiniji nin náodih át daacáp wut jī. Jesús ã páuh laab béjat túttimah, Juan Jesúfhwáidih waóhnitjeéh át jumap wut jī. Caanjéh muntih 1 Juan, 2 Juan, 3 Juan, Apocalipsidihbut át daacáp wut jī.

¿Dedih át daáci? Dawá jéihnit “Griego wéhenitboó Jesúfh doonádih í tái beh joyát pínah niijná, Juan nin náodih queédih át daacáp wut jī”, í niíf jenah joiná caá. Obohjeéhtih, nihat cáacwā í enat pínahdihbut át daacáp wut jī, Jesúsdih í tái jenah joyát pínah niijná.

¿Dedmant, débólih cah, át daáci? Dawá jéihnit “Jópchi 85 (Jesús ã wunat túttimah, 52 jópchi túttimah) nin náodih Juan át daacáp wut jī”, í niíf jenah joiná caá. Biquína jéihnit “Jópchi 50—70 (Jesús ã wunat túttimah, 17—37 jópchi túttimah) Juan át daacáp wut jī”, í niíf jenah joiná caá. Biquína jéihnit “Éfeso tútchiboó jumna, nin náodih át daacáp wut jī”, í niíf jenah joiná caá.

¿Dedé pínah tigaá át daáci? Juanjeh ã daacát pínahdih nin pah át niíf daacáp taga: “Yoobópdih Dios ã wahi Jesússeh tigaá. Caanjéh tigaá Dios wáuh”, ní niíf jéihyat pínah niijná, wā daácna caá. Páant niíf jéihna, caandíh jepahnit, yeéb Diosjeéh páantjeh ní jumáipna caá”, át niíf daacáp taga. (20.31)

San Juan ded pah ã jumát:

1. Juan ã naóh jwíihat (1.1-18)
2. Jesús cáacwáidih ã teo wáac jwíihatji (1.19-51)
3. Jesús ded pah cáacwáidih ã teo wáacatji (2.1—11.57)
4. Jesús ã wunat pínah játih bóo yeó jáapna, ã wunatjibut (12.1—19.42)
5. Jesús ã boo pud jūúwátji (20.1—21.25)

Dios bícdih jumni nin baácboó ã cáac jumát

1 ¹Bíhmahjeh ded pah Dios ã jumátidih naóhni pínah, Cristo, Diosjeéh átát jumap wut jī. Caán Cristo Dios yoobát át jumap wut jī. ²Nin baácdih Dios ã chājat pínah játih, Cristo Diosjeéh átát jumap wut jī. ³Caan wut jīí nin baácdih jumni pínahdih át chājap wut jī. Nin baácdih, jeádih, nihatdih Dios caandíh át chājat tútutap wut jī. Pánih chājat tútutnit, cáacwáidihbut caandíh át chājat tútutap wut jī. Páant ã wutuchah, Cristo nihatdih át chāj beedánap wut jī. **Buu** jwí ennidih, jwí enca naáhdihbut ã chājcah, nihat áta wihcan tagaá. ⁴Cristo tigaá nihatdih báahdani. Jiiátjīh jwí jīí enat pah, jwí íip ded pah ã jumátidih caán jwiít

cáacwáidih ã tái jéihyana caá. ⁵Chei jwí jéih encat pah, yéej chājna, jéih encannit panihnit jwí jumna caá. Obohjeéhtih, Cristoboó jiiát panihni jumna, jwiítidih tái ennit panihnit ã chājna caá. Pánihna, dupúátboó jiiátidih ded pah ã jéih dubacat pah, dedé yéejatbut Cristoboodíh ded pah ã jéih yap yohcan caá.

⁶⁻⁷Cáacwáidih daabáni Juan wut jumnidih Diosboó ã wahi Cristofh doonádih át naóh waáwát tútutap wut jī, cáacwā caandíh joinít, Cristodih í tái jepahat pínah niijná. ⁸Caán Juan Cristo át nihcap wut jī. Obohjeéhtih, Cristo baabát panihni ã jumátidih naóhni Juan át jumap wut jī. ⁹Caán Cristo baabát panihni, nihat cáacwā Diosdih í jéihyat pínah niijná, nin baácboó át jūúwáp wut jī.

* 1.1-3 Gn 1.1-3; Sal 33.6; Pr 8.22-31; Col 1.15-17; He 1.2; 1 Jn 1.1; Ap 19.13 * 1.6-7 Mt 3.1; Mr 1.4; Lc 3.1-2

¹⁰Dios nin baácdih chājna, caán Cristo bícdih ít chājav wut jī. Pánih chājni Cristo ā jumuchah yuhna, nin baácdih moónboó caandíh í jéihcap jī. ¹¹Nin ā chājniji baácdihjeh át cáac jumup wut yuh jī. Obohjeéhtih, páant ā cáac jumuchah yuhna, ā chājni baácdih jumnitboó caandíh í náahcap jī. ¹²Páant í náahcah yuhna, biquína caandíh jepahnitdih Dios ā weh pah át chājav wut jī. Caandíh jepahnitboó bácah, yooópdih ā weh yooáp tígaa í jumup. ¹³Páant níj naóhna, jwiít jwí weh jumíhat dée panihcan caá. Obohjeéhtih, Diosboó Cristodih jepahnitdih bíc weh pah ā chājna caá.

¹⁴Pánihna, Cristo ā cáac jumat túttimah, jwíjeéh ā jumup jī. Páant ā jumuchah ennitji, cáacwādih oinit, yooópdih naóhni ā jumatdih jwí jéihna caá. Caán Dios wūáh bícjeh jumna, Dios ā wēpat ā túyatbut caandíh ā jumup jī. Pánihni ā jumuchah, jwí táí jéihna caá.* ¹⁵Juan Daabániboó cáacwādih daabána, Cristo ā jūúwúchah ennit, nin pah ā níj naáwáp jī: “Con caá yeebdíh wāpí naóhni. Obohjeéhtih, weém wā cáac jumat pínah játih, caán átát jumup wut jī. Nin baác ā jumat pínah játihbut átát jumup wut jī. Pánihna, caán weem cháh ā jumna caá”, Juan cáacwādih ā níjip jī.

¹⁶Caán Cristo wēpni jumna, jwiítidih búdí oinit, dawá láa ā túi teo wáacap jī. ¹⁷Dios ā wutadidih Moisésboodíh áih cáacwādih át naóh yapaat tútup wut jī. Obohjeéhtih, Jesucristoboó Dios cáacwādih búdí ā oyatdih, ā naáwát túi yooópdih ā jumatdihbut naóh yapanadih át jūúwúp taji. ¹⁸Obohjeéhtih, Diosdih jwiít cáacwā jwí jéih encan caá. Pánihna, Dios wūáh bícjeh ájeéh jumniji nin baácboó cáac jumnit, ded pah ā íp ā jumadidih jwiítidih á jéihyanap jī.*

**Juan Daabánidih
bita í uúbh joyát**

(Mt 3.11-12; Mr 1.7-8; Lc 3.15-17)

¹⁹Jerusalén tútchidih moón jwí maátaboó sacerdotewādih, Dioíh

muúboó teonitdihbut Juan Daabáni pebhna “¿Déhe tígaa meém?” níj uúbh joyát túttna, ít wah bojop taji. ²⁰Páant í níj uúbh joyóchah joinít, Juanboó nin pah ā níj jepahap jī:

—Yooópdih yeebdíh wā naóhna caá. Weém, Dios ā wahní Cristo nihcan caá, ā níj jepahap jī.

²¹—¿Caán láa bácah déhe tígaa? ¿Meém Cristo nihcan, Elíasji níit?* í níj uúbh joyóp jī.

—Nihcan caá, queétdih ā níj jepahap jī.

—¿‘Dios naáwátidih naóh yapani ā jūóhbična caá’, jwí nōowā í níjíní níit?’ í níj uúbh joyóp jī.

—Obohjeéhtih, weém caán nihcan caá, ā níj jepahap jī.

²²—¿Caán láa bácah déhe tígaa meém? Jwiítidih bícmantjeh ma naáwá, jwiítidih uúbh joyát túttnitdih jwí túi naáwát pínah níjíná. ¿Ded pohba tígaa ma yooó jum? í níj uúbh joyóp jī.

²³Páant í níj uúbh joyóchah joinít, nin pah queétdih ā níj jepahap jī:

—Weemdíh jenah joiná, Isaíasji nin pah át níj daacáp taji: ‘Bíic cáac muú wihcapboó nin pah ā níj wēp naóhbična caá: “Jwí Maáh ā jūúwát pínah játih ní yéej chājatdih cádahnit, túiniboodíh tút nnumní, caandíh ní túi pánaá”, ā níjbična caá, át níj daacáp taji.*’ Páant ā níj daácniji caá weém, ā níjip jī.

²⁴⁻²⁵Páant ā níjíchah joinít, biquína fariseowā uúbh joyát túttnit í wahnitboó nin pah í jwáub níj uúbh joyóp jī:

—Meém Cristo nihcan, Elíasjibut nihcan, Dios naáwátidih naóh yapani pínah nihcan, ¿Caán láa bácah dépanih tígaa meém cáacwādih ma daabá? í níjip jī.

²⁶Páant í níjíchah joinít, Juanboó queétdih nin pah ā níj jepahap jī:

—Weém cáacwādih mahjijeh wā daabána caá. Obohjeéhtih, bíh ní beh enca naáh ní cátih ā jumna caá. ²⁷Caán wā túttimah jūóhni chah wēpni caá. Pánihna, caandíh jenah joiná, ‘Weém

* 1.14 1Jn 1.2 * 1.18 Mt 11.27; Lc 10.22 * 1.21 Mal 4.5 * 1.21 Dt 18.15,18
* 1.23 Is 40.3

oboh jumni caá', wā niíf jenah joiná caá, ā niijíp jī.

²⁸Betania títchi Jordán muj conanaamánt Juan cáacwádih ā daabánapdih queét páant ī niíf mífic wéhenap jī.

“Oveja wūúh panihni Jesús ā jumna caá”, Juan Daabáni ā niiját

²⁹Daanimant bóo yeó jáapdih Jesús ī niijná ā pebhna ā dei juyúchah ennit, jwiít caandíh joinítidih Juan Daabáni nin pah ā niíf naáwáp jī: “Ñi eneé. Con jūóhni Dios ā wahni oveja wūúh panihni caá. Jwiít judíowā jwí yéejat yohat tūt niijná, oveja wūúhdih sacerdotewádih jwí mawat tútna caá. Páant ī chájat dée panihni, con Dios ā wahnidihbut cáacwā ī mao yohbipna caá. Pánih wūnnit, nihah baácndih moón jwí yéejatdih ā yoh wūhbiipna caá. ³⁰Con caá yeebdíh wāpí naóhni. ‘Wā táttimah jūóhni wā cáac jummat pínah játih jumniiji weem cháh ā jumbipna caá’, yeebdíh wāat niijíp jī.

³¹Caán láa, weembút Dios wūúh ā jummatdih wā jéih jwuhcap jī. Obohjeéhtih, panih jéihcan yuhna, yeéb wā déewā caandíh ñi túi jéihyat pínah niijná, yeebdíh mahjīh wā daabánap be”, ā niijíp jī. ³²⁻³³Páant niíf péanit, Juan jwiítidih nin pah ā jwúub niíf naáwáp jī: “Wā daabáat pínah játih weembút caandíh wā jéih jwuhcah, weemdíh daabáat tútni nin pah ā niíf naáwáp jī: ‘Jop pah jíghni Túini Espíritu jeámant dei jūóhni, bíic newédih ā jaamáchah enna, “Caán Dios ā wahni caá”, ma niíf jéihbiipna caá. Caánboó mahjīh daabáat panihni Túini Espíritu ā wēpatdih búdí ā wūhbiipna caá’, weemdíh ā niijíp jī.

³⁴Pánihna, Túini Espíritu, jop pah jíghni, dei jūóhni, caandíh ā jaamáchah, wā enep be. Pánih ennit, con Dios ā wahni ā jummatdih jéihna, ‘Yoobópdih Dios wūúh caá’, yeebdíh wā niíf naóhna caá”, jwiítidih Juan ā niijíp jī.

Jesús ā jwíih bohénit pínahdih ā níwat

³⁵⁻³⁶Daanimant bóo yeó jáapdih, jwiít chénewā Juan Daabáni ā bohénit, caán bíicndih jwí ñuhchah, Jesús ā yap

bejehah ennit, nin pah jwiítidih ā niíf naáwáp jī:

—Condih ñi eneé. Con tigaá Dios ā wahni oveja wūúh panihni, ā niijíp jī.

³⁷Páant ā niijíchah joinít, jwiít Jesúsdih jwí ñuún pée bejep jī. ³⁸Páant jwí ñuún pée bejehah, tac páud ennit, jwiítidih nin pah ā niíf wúbh joyóp jī:

—¿Jūúh, dedédih tigaá ñi bid? ā niijíp jī.

—¿Bohéní, deh tigaá meém ma jum? caandíh jwí niijíp jī.

³⁹—Wájeeh ñi jūúwá, jwiítidih Jesús ā niíf jepahap jī.

Páant ā niijíchah joinít, ā jummatdih jéihyat tūt niijná, ájeeh jwí bejep jī. Cheyeh jwááhnitji caandíh jwí pej jum túwup jī.

⁴⁰Jwiít chénewā Juan Daabáni ā niijíchah joinítji Jesúsjeéh bejnit, weém Andrésjīh jwí jumup jī. Andrésboó Simón Pedro ā úud jī. ⁴¹Waicanjeh Andrés weép jeñédih bididih ā bejep jī.

—Mesías jwí niijná, Dios ā wahnidih jwí jwááap be, át niijíp wut jī. Griegowāboó Dios ā wahni niijná, ‘Cristo’ ípí niijná caá.

⁴²Páant niijnít, Andrés Simóndih jwí pebhna át ñumah jūúwáp tají. Páant ā ñumah juyúchah, Jesús Simóndih nin pah ā niijíp jī:

—Meém Simón, Juan ā wūúh caá. Obohjeéhtih, meém Cefas wūt búudhni ma jumbipna caá, ā niijíp jī. Jwiít judíowā “Cefas” jwí niijnídih griegowāboó “Pedro”, ípí niijná caá. Páant niijnídih “Jee dáh panihni”, niijná caá jwí chájap.

Jesús Felipedih Natanaeldihbut “Wájeeh ñi jūúwá”, ā niiját

⁴³Daanimant bóo yeó jáapdih Jesús Galilea baácna jwiítidih ñumah bejna, Felipedih jwááhnit:

—Wájeeh ma jūúwá, caandíhbut ā niijíp jī.

⁴⁴Felipeboó Betsaida wūt jumni títchidih bóo ā jumup jī. Andrés Pedrojīh caán títchidih moon múntih ī jumup jī. ⁴⁵Páant Jesús caandíh ā niijíchah joinít, Felipeboó Natanaeldih jwíih bididih ā bejep jī. Caandíh jwááhnit,

—Moisés ā naóh daácniji, bita Dios naáwátdih naóh yapanitbut ī daácnijidih jwī jwāáhna beé. Jesús Nazaret tūtchidih bóo José wūúh caá, Felipe caandíh āt niijíp wut jī.

⁴⁶Obohjeéhtih, páant ā niijíchah joiná yuhna, Natanaelboó nin pah āt niij jephahap wut jī:

—Páant, Nazaret tūtchi oboh jumni tūtchi ā jumuchah, ded caán tūtchidih bóo cáacwádh teo wáacni pínah ā wihcan níft, āt niijíp wut jī.

—Caán láa bácah, meemjéh tih enedih ma jūúwúp, Felipe āt niij jephahap wut jī.

⁴⁷Páant niijnít, Jesús bícdih jwī jumupna āt numah jūúwúp tajī. Páant, ī jūúwúchah ennit, Jesús nin pah ā niijíp jī:

—Con jūóhni, yoobópdih túini judío cáac caá. Caandíh dedé yeeat ā wihcan caá, Natanaeldih enna, jwiítidih ā niijíp jī.

⁴⁸Páant ā niijíchah joinít, Natanaelboó caandíh nin pah ā niij wúbh joyóp jī:

—¿Ded pah tigaá weemdíh ma túi jéih? ā niijíp jī.

—Meemdíh Felipe ā naáwát pínah játih, higuera nah púujdih ma chúuduchah, wáát enep be, Jesús caandíh ā niij jephahap jī.

⁴⁹—Bohéní, meém Dios wūúh caá. Jwiít judíowā jwī Maáh pínah caá, Jesúsdi h ā niijíp jī.*

⁵⁰—‘Higuera nah numap ma chúuduchah, wā enep be’, wā niijíchah joinít, ‘Dios wūúh caá meém’, ¿ma niij jenah jói níft? Páant meemdíh wā enatji chah wā chājachah, ma enbipna caá, Natanaeldih Jesús ā niijíp jī.

⁵¹Páant niijnít, nin pah jwiít nihatdih ā jwúub niijíp jī:

—Yoobópdih yeebdíh wā naóhna caá. Jeáboó wātni pah ā jumuchah, weém nihat cáacwā úud jeéné namá panihni wā chājnidih Dioíh ángelwā aab béjnit, ī jwúub dei jūúwúchah, ni enbipna caá,* Jesús ā niijíp jī.

Caná tūtchidih moón ī téihya chéwat

2¹⁻²Chéne yeó jáap túttimah, Galilea baác Caná tūtchidih, téihya chéwat ā jumup jī. Pánihna, Jesúsdi h ī bidichah, jwiítbut ájeéh jwī bejep jī. Jesús íin jwī játih caán muaná mitát jwibínap tajī. ³Í túi wēi babbachah, íih jiwá iguúh mac āt beedáh bejep wut jī. Páant ā beedéchah, Jesús íin caandíh nin pah mi niijíp jī:

—Wūúhú, jáantjeh íih jiwá iguúh mac ā beedáh bejep be, mi niijíp jī.

⁴—Naá, ¿dépanih tigaá weemdíh páant ma niij? Wā tewat pínah ā jwibí jwuhna caá, Jesús ā niij jephahap jī.

⁵Páant ā niij jephachah joiná yuhna, ā íinboó queét teo wáhnitdih nin pah mit niij wutjí taga:

—Wā wūúh ded pah yeebdíh ā wutat pah ni chājáp, mit niij taga.

⁶Caanjíh seis dahwani wáam dahna ā jumup jī. Bíc wáam búdí jáaj cómoh pah bóo ā jumup jī. Jwiít judíowā Dios ā wutatjí pah jwī téih chocat túut niijná, páant bóo dahdih mah yáac yáwaat pínahdih jwípi bíbohóh jī. Pánihna, caán muedíh moonbút caan dáhnadih ī bíbohóh jī.

⁷Pánihna, queét teo wáhnitdih nin pah Jesús ā niij wutup jī:

—Mahdíh ub jūóhni, caán wáam dahnadih ni yáac yáwanaá, ā niijíp jī.

Páant ā niijíchah joinít, teo wáhnit caán wáam dahnadih mah ī túi yáac yáwanap jī. ⁸Páant ī yáac yáwaat túttimah, Jesús queétdih nin pah ā jwúub niij wutup jī:

—Buu caandíh toíh ubnit, yeebdíh wutnidih ni jwibí wūúhú, ā niijíp jī.

Páant ā niijíchah joinít, caandíh toíh ubnit, ī maáhdih ī jwibí wūúhup jī.

⁹Obohjeéhtih, queét mahdihjeh ī yáacnijidih Jesús ā túut numúchah, jiwá iguúh mac yoobát āt bejep tajī. Pánihna, queétdih wutniboó caan mácdih ā jwíh babh joyóchah, dedmant ī ubatjidih āt jéihcap wut jī. Obohjeéhtih, caandíh teo wáhnitboó mahjeh ī yáacatjidih ī jéihyep jī.

* 1.49 Mt 16.15 * 1.51 Gn 28.12

Pánihna, queétdih wətni babh joinít, téihya chéonidih ā jūúwát túttup jī.
 10Caán ā juyúchah, teo wūhnit ī maáh nin pah ā niijíp jī:

—Jwí bidnitdih caán yoobát macdih jwípí jwíih wāhna caá. Pánihat túttimah, ī babh yáwachah ennit, jūu macdih jwípí űúún tóihna caá. Obohjeéhtih meémboó páant mat chājat túttucan tagaá. Caán yoobát macdih tóihcanjeh, jūu macboodíh mat jwíih tóihyat túttup taga. Pánihat túttimah, buu caán yoobát macboodíh mat wūhat túttup taga, teo wūhnit ī maáhboó téihya chéonidih ā niijíp jī.

11Pánih chājna, Galilea baác Caná tútchidih ā jwíih wēp chāj júuttup jī, “Dios wūúh caá”, cáacwā ī niiját pínah niijná. Pánihna, “Caán Dios ā wahni yoobát caá”, jwiít ā bohénit caandíh jwí niij jengah joí jwíihíp jī.

12Túttimah, Capernaum tútchina Jesús jwiítidih ā numah bejep jī. Páant ā numah bejehchah, ā íin, ā úduwābut jwíjeéh bícdih ī bejep jī. Caanná jwíibínit, daocánni yeó jáap jwí jum jwuhup jī.*

**Jíib chājnitdih Dioíh mūmámnt
 Jesús ā űūun bácaat**

(Mt 21.12-13; Mr 11.15-18; Lc 19.45-46)

13Pascua yeó jáapna ā tóah jūúwáchah jéihnit, dawá jwí déewá Jerusalén tútchina ī bejep jī.* Jesúsbut jwiítidih caanná ā numah bejep jī. Caanná jwíibínit, Dioíh mūmá enedih jwí bejep jī. 14Caán mūudíh jiwíwā, ovejawā, jopwádhíbut jíib chājnitdih Jesús ā enep jī. Bitabut dinero júdudih tútt nūmnnít ī chúuduchah, ā enep jī. Queét tútt nūmnnítboó cáacwádhíh búdí nūmnná ít chājap tají. 15Pánihna, caanjíh jumni tópnadih űbnit, caánboó jumnit cáacwádhíh íih nuúhpwádhíbut ā pūi űūun bácanap jī. Dinero tútt nūmnnít ī chúudat páhana, íih cáagat naanádhíbut ā tóo yoh áacanachah, íih dinero júduna ā puo yóh űajap jī. 16Pánihna, jopwádhíh jíib chājnitdih nin pah ā niij jwíihűup jī:

—űíih jopwádhíh űi űb bac bejeé. Nin wā ípdih űúbat mūudíh jíib chājat mūú űi chājca bojoó, Jesús ā niijíp jī.

17Jesús páant ā niijíchah joinít, Dios naáwádhíh naóh yapani ā daacájtídhíh jwí náhninap jī. “Dios wā Maáh, míih mūudíh búdí wā oina caá. Pánih oina, caandíh yeejép ī chājachah ennit, búdí wā íjna caá”, át niij daacáp tají.*

18Jesús páant ā chājachah ennit, jwí maáta caandíh nin pah ā niij jwíihűup jī: —¿Dépanihna queétdih páant ma űūun yóh baca? Meemdhíh Dios páant ā chājat túttuchah, cáacwā ī chājca naádhíh ma chāj júttú, jwí jéihyat pínah niijná, Jesúsdhíh ī niijíp jī.

19Páant ī niijíchah joinít, Jesús queétdih nin pah ā niij jepahap jī: —Nin mūudíh űi yohochah, bíic peihcanni yeó jáap túttimah, yeéb űi yohni mūujídhíh wā jwúub ámohbípna caá, ā niijíp jī.*

20Páant ā niijíchah joinít, queét maáta caandíh nin pah ā niij űúbh joyóp jī: —Cuarenta seis jópchi nin mūudíh teona, ít péanap tají. Obohjeéhtih, ¿meémboó bíic peihcanni yeó jáapbitjeh teona, ma ámoh péami naniít? ī niijíp jī.

21Obohjeéhtih, caán mūudíhjuh niijcán, áih bácahdíh niijná át chājap tají. Páant ā naáwáchah yahnna, maáta ā jéihchah, jwiítbut jwí jéih jwuhcap jī. 22Pánihna, wunniji Jesús ā boo pud jūúwát túttimah, jwiít ā bohénitboó páant ā niijátjídih náhninit, jwí beh joyóp jī, baca. Dios naáwádhíh í daacniji néodih, Jesús ā niijátjídihbut “Caán yoobópdih tigaá”, jwí niij jéihyep jī.

**Cáacwā ī jengah joyátdih
 Jesús ā jéih beedáat**

23Pascua yeó jáapdhíh Jesús Jerusalén tútchiboó ā jumap jī. Pánih jumnit, jwiít cáacwā jwí jéih chājca naádhíh Dios ā wēpatjíh Jesús ā chājachah ennit, “Caánboó Dios ā wahni Cristo caá”, dawá ī niij jengah joyóp yuh jī. 24Obohjeéhtih, ded pah ī jengah joyátdih jéihnit, “Weemdhíh yoobópdih ī jepahcan caá”,

* 2.12 Mt 4.13 * 2.13 Ex 12.1-27; Dt 16.1-8 * 2.17 Sal 69.9 * 2.19 Mt 26.61; 27.40; Mr 14.58; 15.29

Jesús át niŷ jéihyep tají. ²⁵Pánihna, caanjéh cáacwā ī jengah joyátdih túi jéih beedáni jumna, bita ded pah ī jengah joyátdih caandih úubh joyát ā wihcap jī.

Nicodemo

3 ¹Nicodemo, fariseo, jwiít judíowā jwí maáta poómpdih bóo wut jī. ²Jesucristo Jerusalén tátchiboó jum láa, chei tac yoób dée, Nicodemo Jesúsdihi enedih át juibínap wut jī. Pánih juibínit, nin pah át niijíp wut jī:

—Bohéní, Dios jwiít dih ma bohéat pínah niijná, meemdíh ā wahatdih jwí jéihna caá. Pánih wahnit, majeéh ā jummatdihbut jwí jéihna caá. Majeéh ā wihcáh, jwiít cáacwā jwí jéih chájca naáhdih mata jéih chájcan tagaá, át niijíp wut jī.

³Páant ā niijíchah joinít, Jesús caandíh nin pah át niŷ jepahap wut jī:

—Yoobópdih meemdíh wā naóhna caá. Ded jáap cáac jumni panihni jwúub jumcan, ded pah Dios ā maáh jummatdih ā jéihcan níit, át niijíp wut jī.

⁴—Páant cáac behe ¿ded pah jáap cáac jumni panihni ā jéih jwúub jumbi? ¿Ded pah ā ínính wudahboó ā jéih jwúub waadbí? ¿Caandíh mi jwúub jéih weh jumca níit? Nicodemo át niijíp wut jī.

⁵⁻⁶—Cáacwájeh ī weh jumuchah, cáacjeh caá. Obohjéhtih, Túini Espírituboó cáacwáih caolih wunni panihnidih ā booanachah, jwúub jáap cáac jumni panihnit ī jumna caá. Jáap caolih jumni panihnitjeh Dios weh ī jumna caá. Yoobópdih meemdíh wā naóhna caá. Ded mahjīh daabácani, Túini Espiritu wihcanni, jáap panihni jumcan, Dios ā maáh jumupboó ā jéih waadcán níit. ⁷Yoobópdih meemdíh wā naóhna caá: Meemdíhbut jáap cáac jummat panihni caá náahap. Caandíh páant wā niŷ naáwáchah, ‘¿Ded pah caán ā yapbi?’ ma niŷ úubh joicá bojóó. ⁸Johlit johat panihni caá. Johlit ā jūúwúpmant ma jéihcan caá. Á bejep pínahboobút ma jéihcan caá. Á joh búug láajatdihjeh ma jéih enna caá. Pánihat pah, caolih wunni

panihnitdih Túini Espiritu ā booanachah, ded pah ā booaatdih jéih encan yuhna, cáac ā táut nuumátdih ma túi jéih enna caá,* Jesús át niijíp wut jī.

⁹Páant ā niijíchah joinít, Nicodemo Jesúsdihi nin pah át jwúub niijíp wut jī: —¿Ded pah niŷ naóh tigaá ma cháj? Ma naáwátdih wā beh joicán caá, át niijíp wut jī.

¹⁰—¿Páant, meém judíowādih bohéni yuhna, ded pah wā naáwátdih ma beh joicán? ¹¹Yoobópdih meemdíh wā naóhna caá. Jwí jéihyatdih, jwí enatdihbut yeebdíh jwí naóhna yuh caá. Obohjéhtih, jwiít dih níi joíhcan caá. ¹²Nin baáboó ded pah ā jummatdih wā naáwáchah, ‘Yoobópdih ā naóhcan caá’, niijná, Dios pehbboó ded pah ā jummatdihbut wā naáwáchah, bíic yoobó níi niŷ jengah joibípna caá.

¹³—‘Ded Dios ā jumupboó enedih aab béjni jwúub dei júóhni ā wihcan caá. Obohjéhtih, weémboó, nihát cáacwā úud jeñé, caánboó wápi jumup jī. Pánihna, caanmánt dei júóhni weemjéh ded pah ā jummatdih yoobópdih wā jéih naóhna caá. ¹⁴⁻¹⁵Jon játih, Moisésji jum láa, Dioh cáacwā tátchi wihcapboó jum jwuhna, caandíh ī jūihñuchah, dawá maiwādih wahnit, queétiŷh cáacwādih át peéh chájap wut jī. Mai pah jígohnidih itahjīh Dios Moisésdih át chájat táutur wut jī. Caán mai pah jígohnidih cháj péanit, máa nahdih búudhnit, át baad dóhdop wut jī. Pánihna, det Diosdih túi jengah joinít, caán ā baad dóhdni mai pah jígohnidih ennit, it boonap wut jī.* Caán ā baad dóhdhat pah, cruzboó péohnit, pud dodhnit, cáacwā weemdíh ī maobipna caá.* Pánihna, weém caán cruzboó wā wunuchah, det weemdíh túi jengah joinít, iiguípna bejnit déeji Diosjeéh páantjeh ī túi jumipna caá’, Jesús Nicodemodih át niijíp wut jī.

Dios nihát cáacwādih búdí ā oyat

¹⁶—‘Dios nihát cáacwādih búdí ā oina caá. Pánih búdí oina, queétdih ā peéh chájat déedih túi ubat táut niijná, weém

* 3.3-7 1P 1.3,23 * 3.8 Ec 11.5 * 3.14-15 Nm 21.9 * 3.14-15 Is 52.13; Jn 8.28; 12.32-34; 18.32

ã wũúh bíic jumnidih ã wah deyanap jĩ. Páant ã wahachah, det weemdih jepahnit iiguípna bejnit déeji Diosjeéh páantjeh ĩ túi jumnipna caá. ¹⁷Dios cáacwádih yéejat peéh chájat túutna, weém ã wũúhdih nin baácboó ã wah deyacap jĩ. Obohjeéhtih, iiguípna ĩ bejat déedih queétdih wã túi ubat pínah niijná, ã wah deyanap jĩ.

¹⁸“Weém ã wũúhdih det jepahnitdih Dios ĩ yéejat jíib ã peéh chájcan niit. Obohjeéhtih, det weemdih ĩ jepahcah, queétbodydih ĩ yéejat jíib ã peéh chájbpna caá. ¹⁹Weém Dios wũúh baabát panihni nin baácboó jũóhna, ded pah cáacwã Diosjeéh ĩ túi jumtat pínahdih wã jéihyaíhna caá. Obohjeéhtih, weém caán baabát panihnidih cáacwã ĩ náahcap be. ĩ chájat yeejép ã jumuchah, dupúat panihnidihjeh ĩ náahap be. Pánihna, baabát panihnidih náahcan, yeejép chájnit ĩ jumuchah, Dios queétdih ã peéh chájbpna caá. ²⁰Nihat yéej chájnit ĩ yéej chájatdih cáadahícan, páant ĩ chájatdih bita ĩ encat pínah niijná, baabát panihpboó ĩ jũúwíhcan caá.* ²¹Obohjeéhtih, det Diosdih jepahnit baabápboó ĩ jũúwíhna caá, Dios ã wēpatjĩh ĩ túi chájatdih bita ĩ enat pínah niijná”, Nicodemodih Jesús át niijíp wut jĩ.

**Jesús ded pah ã jumatdih
Juan Daabáni ã naáwát**

²²Túttimah, jwiít ã bohénitdih Judea baácna Jesús ã numah jib bejep jĩ. Caanná jib bejnit, caanjĩh moón Diosdih ĩ jepahachah, queétdih ã daabánap jĩ. ²³Enón wūt jumni pebh Salim wūt jumupdih caan múj numahni ã jumuchah, Juanbut cáacwádih daabána át chájap wut jĩ. Queétdih ã daabáat pínah niijná, dawá ã pebhna ĩt jũibínap wut jĩ. ²⁴Caán láa Juan Daabánidih jwi maáta ĩ teo jwuhcap jĩ.*

²⁵Biquína Juan Daabáni ã bohénit bíic jwi déejĩh ded pah jwiít judíowã jwípí daabáatdih míic wéhena ĩt chájap wut jĩ. ²⁶Pánih míic wéhe péanit, Juan pebhna

jũibínit, ã bohénit caandih nin pah ĩt niíf uúbh joyóp wut jĩ:

—Bohéní, Jordán muj conanaajĩh majeéh jumni ‘Caán caá weemdih chah jumni’, ma niijnjiboó bũũ cáacwádih daabána caá ã chájap. Páant ã daabánachah, nihat caan pébhna míicjeh bejna caá ĩ chájap, Juandih ĩt niijíp wut jĩ.

²⁷Páant ĩ niijíchah joinít, Juan nin pah át niíf jepahap wut jĩ:

—Diosboó weemdih ã wíiuh daabáat túutap jĩ. Pánihna, bũũ caandih jwuh daabáat túutnit, ã pebhna cáacwádih ã bejat túutna caá. ²⁸“Weém Cristo nihcan caá’, wã niijíchah, yeéb ñi joiná beé. Obohjeéhtih, Cristo játih weemdih Dios ĩ wahap jĩ.* ²⁹Pánihna, ájeéh cáacwã ĩ bejchah enna, búdí wã wéina caá. Nin panihat dée caá: Téihya chéonih pínahboó mi ájeéh mi bejchah ennit, ã pej jumniboó búdí ã wéina caá. Páant ã pej jumni ã weñat pah mun tiguaá, weembát Jesúsdi ĩ túi péenachah ennit, búdí wã wéina caá. ³⁰Pánihna, cáacwã weemdih péé cádahnit, Cristoboodih jwúub túi péeat caá náahap, Juan queétdih át niíf jepahap wut jĩ.

**Dios wũúh japmant jũóhni
ã jumtat**

³¹Páant niíf naóh péanit, nin pah Juan ã bohénitdih át jwúub niíf naáwáp wut jĩ: “Jeámant jumniini nin baácboó dei jũóhni nihadti ã túi jéih beedána caá. Obohjeéhtih, jwiít cáacwã nin baácboó jumnit, nin baácndihjeh ded pah ã jumtatdih jéihnit, jwi naóhna caá. Caán Dios ã wahniboó jwiít cáacwã chah jéihni ã jumna caá. ³²Ded pah ã enatji, ã joyátjidihbut jwiítidih ã naóhna caá. Páant ã naáwáchah yuhna, cáacwáboó ã naáwátidih ĩ jofíhcan caá. ³³Pánihna, jeámant jũóhni ã naáwáchah, ded túi joiní ‘Dios yoobópdih naóhni caá’, ã niíf jéihna caá. ³⁴Dios ã wahní Cristodih áih Téini Espíritudih búdí yoobát ã wuhap be. Pánihna, Cristo Dios naáwátidih yoobópdih ápi naóhna caá. ³⁵Dios ã wũúhdih búdí oinit, caandih nihat ĩ maáh

* 3.20 Job 24.13-17 * 3.24 Mt 14.3; Mr 6.17; Lc 3.19-20 * 3.28 Jn 1.20

ã jumat túttna caá. * ³⁶Dios wúúhdih ded jepahni Diosjeéh páantjeh ã jumbipna caá. Obohjeéhtih, ded ã wúúhdih yap yohniboodíh íjinit, Dios bádi ã peéh chájachah, ájeéh ã wihcan níit”, Juan át niijíp wut jí.

**Jesús Samaria baácdih bólijíh
ã míic wéheat**

4 ¹Juan chah dawá cáacwã Jesúsdihi péenitdih ã daabáát doonádihi fariseowã íit joyóp wut jí. ²Obohjeéhtih, Jesús pohba ã daabácan jíí. Jwiít ã bohénitboó jíí cáacwádihi jwí daabánap jí. ³Fariseowã í jéihyat doonádihi joinít, Jesúsboó Judea baácdih jumnihi Galilea baácna jwiítidih ã numah bejep jí.

⁴Caanná bejna, Samaria baácdih yap bejat túut jwí chájap jí. ⁵Pánih yap bejna, Samaria baácdih bóo Sicar tútchina jwí juibínap jí. Caan pébh jwí nwo Jacob ã wúúh Josédih ã wúhnihi baácbít át jumup wut jí. * ⁶Caanjíh Jacobwáji í mah tóihyat íit ã jumup jí. Pánihna, Jesúsboó ywúp jéóhnihi chunná, yeó jáap tac yoób caán íit pebh ã choó chúudup jí. ⁷⁻⁸Páant ã choó chúudat pónih, jwiít ã bohénitboó tútchina jeémát jíib chájadihi jwí aab béjep jí. Caanjíh Jesús ã chúuduchah, Samaria baácdih bóli mah tóhyodih mit dei juibínap wut jí. Páant mi mah tóhyochah, Jesús nin pah caántdih át niijíp wut jí:

—Weemdíh mah ma wúhuú, át niijíp wut jí.

⁹—Meém judío cáac caá. Weémboó Samaria baácdih bóli caá. ¿Dépanih tígaa weemdíh mah ma úúbh? Jesúsdihi mit níif jepahap wut jí. (Jwiít judíowã Samaria baácdih moondíh jwípí eníhcap jí. Pánihna, páant mit niijíp wut jí.) *

¹⁰Páant mi niijíchah joinít, Jesús caántdih nin pah át níif naáwáp wut jí:

—Dios weemdíh ã teo wáacat déedih jéihcan, meemdíh mahdih úúbhnihdihbút ma jéihcan caá. Pánih jéihna nihna, ‘Mah ma wúhuú’, weémboodíh mata níif úúbh tagaa. Caán wã wúhíhni mah

panihnidih ma babhbachah, míih caolih átã tãí boo tagaa, át niijíp wut jí.

¹¹—¿Dépah níif tígaa páant ma níif? Nin mah tóhyat íit numah bóo caá. Mah tóhyat pínah wáam dah bíbohcan, ¿deh tígaa caolihdih boocat túutni mah ma úúbbi? ¹²Jwí nwo Jacobji, ã wehbat, íih nuúúpwã bícdih nin íitdih mah úúbnit, íit babhbat wut jí. Áihjidih jwiít ã juimenádihi át wúhup wut jí. ¿Pánihna, jwí nwo Jacobji chah wépi níit ma jumup, páant ma niijná? mit niijíp wut jí.

¹³—Ded nin íitdih bóo mahdih babhni ã jwúub taca joótbipna caá, páant muntih. ¹⁴Obohjeéhtih, weém wã wúhni mah panihnihoodíh babhna, chéneji ã taca joótcán níit. Ded wã wúhni mah panihnidih babhna, Diosjeéh páantjeh ã tãí jumbipna caá. Meo waó cáahdih mah nooj bácní ã jöpcat pah wã wúhni mah panihni ã beedcán níit, Jesús caántdih át niijíp wut jí. *

¹⁵—Caán láa bácah, caán ma niijní mahdih weemdíh ma wúhuú, jwúub taca joótcáh, ninboó yeó jáap jumat pah mah tóhyodih wã jéóhcat pínah niijná, mit niijíp wut jí.

¹⁶—Majeéh bóodih ma bidbi jwuhúú, Jesús át niijíp wut jí.

¹⁷⁻¹⁸—Obohjeéhtih, weém áa wihcannih caá, mit níif jepahap wut jí.

—Yoobópdih tígaa ma niijíp. Obohjeéhtih, cinco neoná caá ma weha mánaji. Bwú majeéh jumni ma áa yoobát nihcan caá. Pánihna, ‘Weém áa wihcannih caá’, ma niiját yoobópdih tígaa, Jesús caántdih át niijíp wut jí.

¹⁹—Meémboó Dios naáwátidih naóh yapani nacaá. ²⁰Pánihna, yoobópdih wã jéihyat pínah niijná, weemdíh ma naáwá: Con jeená jwí nuowáji Diosdih ípí úúbúp wut jí. Obohjeéhtih, ‘Jerusalén tútchiboó Diosdih úúbúdihi bejat caá náahap’, yeéb judíowã níipí niijná caá, mit niijíp wut jí.

²¹—Yad wilí, weemdíh ma joi jwúhuú. Nin wã naáwát yoobópdih caá. Túttimáh bóo láa, con jeéboó, Jerusalén tútchiboobát jwí ípdih níi úúbhcan níit.

²²Yeéb Samaria baácdih moón níi

* 3.35 Mt 11.27; Lc 10.22 * 4.5 Gn 33.19; Jos 24.32 * 4.9 Esd 4.1-5; Neh 4.1-2
* 4.10-14 Is 44.3; Jer 2.13; 17.13; Jn 7.37-39

uúbhndih ñi jéihcan caá. Obohjeéhtih, jwiít judfowáboó caandíh jwí jéihna caá. Dios á wahni, nihát cáacwádhíh túi úbni, judíojeh tiguaá á jumáhp. Pánihna, jwí wéini Diosdih jwiít judfowáboó jwí jéihna caá. ²³Buu láa, túttimahbút Túini Espírítu á teo wáacachah, túi yoobópdih jenah joinít, cáacwá Diosdih í túi wéibipna caá. Páant caandíh túi wéinitboodíh caá Dios á bidíp. ²⁴Dios jígohcanni á jumúchah, cáacwá caandíh í jéih encan caá. Pánihna, dedboó jumna, caandíh jwí wéi uúbhúchah, bíc yoobó á túina caá. Caandíh wéina, Túini Espírítu á teo wáacatjìh, túi yoobópdih jenah joinít, weñat caá náahap, Jesús caántdih át niijíp wut jì.

²⁵—Mesías, ‘Cristo’, í niijní, á jüúwát pínahdih weém wá jéihna caá. Caán jüóhna, jwiítndih nihát á jéihya beedábipna caá, mit niijíp wut jì.

²⁶—Weém ma niijní Cristo tiguaá, Jesús caántdih át niijíp wut jì.

²⁷Páant caántdih á míc wéhenachah, jwiít á bohénitboó jeémát jíib chájadhíh bejniitji jwí jwúub jwibínáp jì. Pánih jwúub jwibínit, Jesús yad wilijìh á míc wéhenachah ennit, jwí en wáhi bejep jì. Pánih en wáhi bejna yuhna, “¿Dépanih tibeé caántdih ma míc wéhe?” niij uúbh joinít déjei jwí niijcáp jì. ²⁸Pánihna, caántboó míh mah tóhyat wáam dahdih cáag jwejniit, tútchina mi jwúub aab béj jwuhap jì. Pánih bejniit, míh tútchidih moondíh nin pah mit niij naawáp wut jì:

²⁹—Ded pah wá chájatjidih weemdíh naóh beedánidih ñi en jüúwá. Caán yoobópdih Cristo dée caá, mit niijíp wut jì.

³⁰Páant mi niijíchah joinít, caán tútchidih moondíh Jesúsndih mi jwááárpina mit numah jwúub jüúwáp tajì.

³¹Pánihna, í juyát pínah játih, jwiít Jesús á bohénitboó jwí jíib chájni jeémátndih caandíh jwí numah jeémíhip jì.

—Bohéní, ma jeémp jüúwá, jwí niijíp yuh jì.

³²—Obohjeéhtih, ñi jéihca naáh jeémát weemdíh á jumna caá, Jesús jwiítndih á niij jepahap jì.

³³—¿Bita caandíh jeémát ítát wáh taniít? jwiítjeh jwí míc niijíp jì.

³⁴Páant jwí míc niijíchah joinít, Jesús jwiítndih nin pah á jwúub niijíp jì:

—Cáacwá jeémát í bidat pah, weemdíh wahni ded pah á wutatndih cháj péaatndih búdí wá bidna caá. Pánihna, butéh caandíh jepahnit, caántjìh míc wéheña, wíih jeémát panihni á jumna caá.

³⁵Chéneña míc widh á judhna caá jwí momni á quehechah, jwí dicat pínah’, wápchi mínah á niiját pah, yeebboó ñi niij jenah joicá bojoó. ‘Dios naawátndih jwí naawát pínah á judh jwuhna caá’, ñi niij jenah joicá bojoó. Yoobópdih yeebdíh wá naóhna caá. Jáantjeh quehat láa panihni á jumna caá. Buu láa bácah cáacwá jwí pebhna í juyúchah, ñi túi eneé. Queétoó pácahi á quehat pah í jumna caá. Pánihna, buu cáacwádhíh wá bohénachah, í joyát láa á jumna caá.

³⁶Cáacwádhíh wíih túini doonádih jepahat túttni dicni panihni á jumna caá. Queétoó jepahnit, caán á dicni panihnit, Diosjeéh páantjeh í túi jumbipna caá. Pánihna, cáacwá í túi jepahachah enna, dicni panihni, momni panihni bíicdih búdí í wéibipna caá. Páant í weñat í tewatji jíib panihni á jumna caá. ³⁷Cáacwá nin pah í niijná caá: ‘Bíic á jwiíh momop be.

Bíihboó á momni á quehechah á diquíp be’, ípí niijná caá. Momni panihni wíih túini doonádih naóh jwíihni caá. Bita caandíh dicnit panihnit wíih túini doonádih jepahat túttnit caá. ³⁸Páant á jumap pah, bitaboó cáacwádhíh ítát jwíih bohénap tajì. Queétdih jwíih bohénit ñi jumcah yuhna, buu yeebdíh jwah wá wahna caá, wíih túini doonádih jwúub joinít í túi jepahat pínah niijná, Jesús jwiítndih á niijíp jì.

³⁹Páant Jesús jwiítndih á míc wéheat pónih, caánt Samaria baácdih bóli “Ded pah wá chájatjidih jéih beedánidih mah tóhyop fítdih wá jwááárp be”, mi niijíchah joinít, dawá Samaria baácdih moón Jesúsndih í jepahat pínahdih ít jenah joyóo tajì. ⁴⁰Pánihna, queétoó jwí pebh joinít, “jwíjeéh ma chão jwúuhú”, Jesúsndih í niijíp jì. Páant í niijíchah joinít, chéne yeó jáap íjeéh jwí jum jwuhap jì.

⁴¹Jesúskeh queétdih á naawáchah joinít,

dawá caandíh í jepahap jî. ⁴²Í dée wilidih nin pah í niijíp jî:

—Ma jwíih naawáchah joináneh, jwiitbut Jesúsdih jepahíhat jwí jenah joyóp be. **Buu** caanjéh á naawáchah joiná, jwí tái jepahna caá. ‘Nihat nin baácđih moón iiguipna bejnít déejidih yoobópdih tái ubni caá’, jwí niij jéihna caá, í niijíp jî.

Maáh wúúhdih Jesús á booaat

⁴³Chéne yeó jáap Sicar tátchidih numah chão jwúhni, Jesús Galilea baácboó jwiitđih á numah bejep jî.

⁴⁴“Ded Dios naawátđih naóh yapanidih áih baácđih moón ípí wéican caá.

Pánihna, Galilea baácđih wá behechah ennitji, weemđih í tái jenah joibícan nacaá. Obohjeéhtih, páant í jumúchah yuhna, caanna jwí jwúub bejna caá”, á niijíp jî. ⁴⁵Jerusalén tátchiboó Pascua yeó jáapnadih jwí jum láa, Jesús á chãjatjidih ennitji biquína Galilea

baácđih moón ít jumúp tají. Pánihna, íih baácna jwí juibínachah, queétkoó á wêp chãjatjidih jwúub eníhna, caandíh í tái wéi jwááap jî.*

⁴⁶Mahdihjeh jiwá iguúh mac Jesús á túut numniji Caná tátchidih jwí jwúub juibínap jî. Capernaum tátchiboó maáh Herodes nump jumni maáh wúúh wanna át chãjap tají.* ⁴⁷Pánihna, Jesús Judea baácboó jumni Galilea baácna á jwúub juyát doonádih joinít, jwí pebhna át aáb júúwúp tají: Pánih aáb joinít, nin pah Jesúsdih á niijíp jî:

—Wá wúúh muujná beé á chãjap be. Pánihna, caandíh booaat túut niijná, wájeéh waícanjeh ma dei júúwá, á wêp niij wúúbep yuh jî.

⁴⁸Páant á niijíchah joiná yuhna, Jesús caandíh nin pah á niij jepahap jî:

—Dios á wêpatjih wá chãj jútuchah encan, ‘Caán Dios á wahní Cristo caá’, weemđih ni niij jenah joibícan nacaá, Jesús á niijíp jî.

⁴⁹—Obohjeéhtih, Maá, wá wúúh á wunat pínah jítih, waícanjeh ma booa wúh júúwá, Jesúsdih á niijíp yuh jî.

⁵⁰Páant á niijíchah yuhna,

—Míih muuná ma jwúub bejeé. Ma wúúh á boona caá, Jesús caandíh á niijíp jî.

Páant á niijíchah joinít, “Á niiját pah tih wá wúúh á boona nacaá”, niij jenah joinít, áih muúboó á jwúub bejep jî.

⁵¹Páant á jwúub juibínachah, á pebh moón caandíh ít jwááh naawáp wut jî:

—Ma wúúh jáantjeh á jwúub boona beé, caandíh ít niijíp wut jî.

⁵²—¿Deyoób yeó lajachah tibeé caán á boo? queétkih át niij wúúh joyóp wut jî.

—Jwíin yeó jáap tac yoób túttimabít caandíh pahat á dúucup be, ít niij jepahap wut jî.

⁵³Páant í niijíchah joinít, “Jesús weemđih ‘Ma wúúh á boona caá’, á niijíchahjeh, wá wúúh át boonap taga”, maáhboó át niij jenah joyóp wut jî. “Jesús weemđih yoobópdih tigaá át niijíp”, niijná, á déewá bícđih Jesúsdih “Caán Dios á wahní Cristo yoobát caá”, ít niij jenah joyóp wut jî.

⁵⁴Jesús Judea baácđih jumni Galilea baácna jwúub juibínit, maáh wúúhdih boona, chéne láa jwiít cáacwá jwí jéih chãjca naáhdih Dios á wêpatjih á chãj jéutap jî.

Jéih bejcannidih Jesús á booaat

5¹Túttimah, jwiít judíowá Diosdih jwí wéi láa Jesús Jerusalén tátchina jwiitđih á numah juibínap jî, páant muntih. ²Caanjíh Ovejawá Bejni Jéc wut jumni pebh jéehat júá á jumup jî. Jwiít judíowá jwíih wéheatjih niijná, caán júádih Betzata jwí niijná caá. Caán Betzata júá jwééjdih cinco nemat wihcanni jécna á jum púud bejep jî.

³Caán júádih mué wáap lap nump dawá tubúp chúúhni ípí ñaj púud bejep tají.

Jéih encannit, jéih jibcannit, jéih yoocannitbut caán júá pebh ít ñajap tají. Caanjíh ñajnít, mah chibít á dácohatdih pái ñajna ít chãjap tají. ⁴“Dioh ángel dei joinít, caán jéehat júádih á

dácohanachah ennit, ded jítih jwíih wúúg báahniboó dedé wunat jumni ápi boonap wut jî”, ít niij jenah joyóp tají. ⁵Pánihna, caanjíh jumni bíc jéih bejcanni, treinta

* 4.44 Mt 13.57; Mr 6.4; Lc 4.24 * 4.45 Jn 2.23 * 4.46 Jn 2.1-11

ocho jópchi tubúp chüúhni ā ñajap jī.

⁶Caandíh ennit, maátápdih ā tubúp chüúáatdih jéihna, Jesús caandíh nin pah ā níj wúbh joyóp jī:

—¿Meém ma boofh níít? ā níijíp jī.

⁷—Wā boofhna yuh caá. Obohjeéhtih, can júána weemdíh ded w̄b báahni pínah ā wihcan caá. Pánihna, dawá láa ā dácohochah, wā buég báah bejíhichah yuhna, bita wā játih ípí juibí buég báahna caá, Jesúsdi h ā níijíp jī.

⁸Páant ā níijíchah joinít,

—Ma ñah ñuhwú. Ma ñajatdih w̄bnit, ma yáac chüi bejeé, Jesús caandíh ā níijíp jī.

⁹Páant ā níijíchahjeh, caán jéih bejanniji ñah ñuhnit, ā ñajatjidih w̄bnit, ā yáac chüi bejep jī, buca. ¹⁰Páant ā boonachah enna, jwí chooát yeó jáap ā jumuchah, jwí maáta caandíh nin pah ít níj jüihñap w̄t jī:

—¿Dépanihna, ma ñajatjidih beo bej tigaá ma chäj? Wu jwí chooát yeó jáap ā jumuchah, ma ñajatjidih ma beo bejchah, ā téican caá, ít níijíp w̄t jī.*

¹¹—Obohjeéhtih, ‘Ma ñajatjidih w̄bnit, ma yáac chüi bejeé’, weemdíh booani ā níijíp be. Páant ā níijíchah joinít, nin wā ñajatjidih w̄b bejna caá wā chäjap, át níj jepahap w̄t jī.

¹²—¿Déhe tibeé meemdíh páant níj, booani? queé ít níj wúbh joyóp w̄t jī.

¹³Obohjeéhtih, Jesús dawá cáacwā cātíh ā bejchah, caandíh boanidih át beh encap w̄t jī. Pánihna, ā wütíh jéihcan, át jéih jepahcap w̄t jī.

¹⁴Túttimah, Dioíh m̄wúboó Jesús caandíh jwááhnit, nin pah ā níijíp jī:

—Weemdíh ma joi jwúhú. Wu ma túi jumna caá. Pánihna, ma jwúub yéj chäjca bojóó, páant muntih. Jwúub yéj chäjna, chah yeejép w̄nat meemdíh ā jüóhbi pna caá, Jesús ā níijíp jī.

¹⁵Caandíh páant ā níijíchah joinít, Jesúsdi h át beh enep w̄t jī, buca. Pánih beh enni jwí maátadi h naáwádi h át bejep jī.

—Jesús w̄t jumni beé weemdíh át boonanap tabe, queétdih át níijíp w̄t jī.

¹⁶Páant ā níijíchah joinít, Jesús chooát yeó jáapdi h ā booaatjidi h jéihnit, jwí maátaboó caandíh yeejép í chäj jwíhhip jī.

¹⁷Páant caandíh í mawíhatdih jéihna, Jesús queétdih nin pah ā níijíp jī:

—Wā íp páantjeh teona caá ā chäjap. Pánihna, weembát wā teo jwuhna caá, ā níijíp jī.

¹⁸Jesús páant ā níijíchah joinít, jwí maátaboó chah í íjip jī. Jwí chooát yeó jáapdi h caán tubúp chüúhni di h ā boonanachah enna, queé í íj jwíhhip jī. Pánih íjina, “Wā íp”, Diosdi h ā níijíchah joiná, chah í yoób íjip jī. “Wā íp”, níijná, ‘Diosdi h bíc yoobó wā jumna caá’, Jesús caán mícjeh ā níj jenah joiná caá”, jwí maáta ít níj jenah joyóp taji. Páant níj jenah joinít, chah íjina, Jesúsdi h í yoób mao yohíhip yuh jī.*

Jesús ā íp ā wutuchahjeh, jepahni ā jumant

¹⁹Páant í níj jenah joyátdih jéihnit, Jesús queétdih nin pah ā jwúub níj naáwáp jī: “Yoobópdih yeebdíh wā naóhna caá. Weém, Dios wúúh, wā jenah joyátjeh wā chäjcan caá. Wā íp weemdíh ded pah ā wutuchah, caandíh jeh wā jepahna caá. Wā íp ded pah ā chäjachah ennit, weém ā wúúhbut bíc yoobó wápí chäjna caá. ²⁰Wā íp weém ā wúúhdih oina, ded pah ā chäjatdih weemdíh ápi jéihyana caá. Wu wā chäjatji chah, bíh wā chäjat pínahdi h weemdíh ā jéihyabipna caá. Páant weemdíh ā wutatdih joinít, ā wēpatjīh yeebdíh wā chäj jéutuchah, ñi en wáhi bejbipna caá. ²¹Wā íp ded pah wunah bejnitdih ā booaat pah, weembát ā booaat túatnitdih bíc yoobó wā booana caá. ²²⁻²³Wā íp cáacwā í yéj chäjatdih peéh chäjni nihcan caá. Obohjeéhtih, í yéjat jüib wā peéh chäjat pínah níijná, weémboodíh ā wutup be, nihát cáacwā caandíh í weñat pah, weemdíhbut bíc yoobó í weñat pínah níijná. Wā íp caá weemdíh wahni. Pánihna, ded weém ā wúúhdih wēicanni, wā ípdihbut ā wēican caá.

* 5.10 Neh 13.19; Jer 17.21 * 5.18 Jn 10.30-38

²⁴“Yoobópdih yeebdíh wā naóhna caá. Det wā naáwátidih joinít, weemdíh wahnidih jepahna, páantjeh ájeéh í tái jumbipna caá. Páant ájeéh í jumuchah, queétdih wā peéh chājcan níit. Queét iiguípna bejnit déejidih tái úbnit í jumbipna caá. ²⁵Yoobópdih yeebdíh wā naóhna caá. Iiguípna bejnit déeji weém Dios wūúhdih buu jepah jwíhna caá í chājap. Wā naáwátidih joí jepahnitboó Dios bíicdih páantjeh í tái jumbipna caá. ²⁶Wā íp Dios páantjeh jumniiboó cáacwādih páantjeh á jumat túatna caá. Pánihna, weém á wūúhdihbut páantjeh jumat túatni pínah á chājap jí. ²⁷Weém nihát cáacwā úud jeñé wā jumuchah, cáacwādih wā peéh chājat pínah niijná weémboodíh á wutup jí. ²⁸Páant wā naáwáchah joiná, ní joí wáhi bejca bojoó. Cúbucuh nihát wunnit ílh bácah í yohopjiboó jumna yuhna, wā ezechah, í joibípna caá. ²⁹Pánih joiná, nihát tái chājnitji boo pud jóóhmit Dios pehbboó í páuh laab béjbipna caá. Obohjeéhtih, yeejéh chājnitjiboó, í yeej chājatji jíib iiguípna í bejbipna caá.*

³⁰“Weém wíih jenah joyátjeh, wā weñat pínahdih wā chājcan caá. Obohjeéhtih, weemdíh wahní á wutatdihjeh wā chājna caá. Á niiját pahjeh cáacwādih wā peéh chājbipna caá. Páant wā peéh chājchah, yoobópdih á jumbipna caá. ³¹“Weém Dios wūúh, á wahní caá’, weemjéh wā niijíchah, ‘Ma nih yáana caá’, weemdíh níta níj tágaa. ³²Obohjeéhtih, bíh caá weemdíh naóhni pohba. Caán naóhni Juan Daabáni caá. Pánihna, ‘Á niijátji yoobópdih á jumna caá’, wā níj jéihna caá. ³³Yeéb weemdíh jéihíhna, bitaboodíh Juan pebhna í wúbh joyát pínah niijná, níit wahap tabe. Caán yoobópdih yeebdíh át naáwáp jí.* ³⁴“Nin Dios wūúh caá’, weemdíh niijnítidih wā bidcan caá. Pánih bidcan yuhna, ‘Dios wūúh caá’, Juanboó weemdíh á niiját yoobópdih caá. Pánihna, weemdíh jepahnit, iiguípna ní bejcat pínah niijná, Juan á niijátjidih yeebdíh wā náhniana caá. ³⁵Tái enat túat niijná, jíiát dahdih

jwí jíí cágat pah, Juan ded pah wā jumatdih ní jéihyat pínah niijná, yeebdíh át naáwáp tají. Páant á naáwáchah joiná, daocánni yeó jáap ní tái wéi joi jwúhup jí. ³⁶Obohjeéhtih, wā íp weemdíh á wutuchah, á wépatjéh wā chājchah ennit, yoobópdih Dios á wahní wā jumatdih níta tái jéih tagaa. ³⁷Juan weemdíh á daabánachah, wā ípjuhbut weemdíh wahní ‘Caán wā wūúh caá’, á niijíp jí. Páant á niijíchah yuhna, yeebboó caandíh encan, joicánnitbut ní jumna caá.* ³⁸Weém Dios á wahnidih jepahcan, wā íp á naáwátidihbut ní náahcan caá. ³⁹“Dios naáwát tólihdih bohéna, yeó jáap jumat pah Diosjeéh jwí tái jumbipna caá’, ní níj jenah joiná caá.* Obohjeéhtih, caán tólihdih tígaa weém ded pah wā jumatdih á naáwáp. ⁴⁰Caán tólihdih weemdíh á naáwáchah yuhna, yeebboó weemdíh ní náahcan caá. Yeó jáap jumat pah Diosjeéh jumíhna yuhna, weemdíh páant ní wúbhcan caá.

⁴¹“Weemdíh wéi naóhnitdih wā bidcan caá. ⁴²Obohjeéhtih, yeebboó mácah ní jenah joyátidih wā tái jéihna caá. Pánih jenah joinít, Diosdih ní oicatdihbut wā jéihna caá. ⁴³Wā íp weemdíh á wutat pah wā chājchah yuhna, weemdíh ní náahcan caá. Obohjeéhtih, á wahcanniboó á weñat pínahdihjeh á chāj jéutuchah ennit, caánboodíh ní náahbipna caá. ⁴⁴Bitá yeebdíh í wéi naáwátidihjeh bidna yuhna, Diosboó yeebdíh á wéi naáwátidih ní náahcan caá. Pánih náahcan, ‘Caán Dios á wahní Cristo nihcan caá’, níj jenah joiná, weemdíhbut ní jofíhcan caá. ⁴⁵Páant weemdíh ní jofíhcatji jíib ‘Jwí ípdih Jesús jwíitdih á naóh yacbipna caá’, ní níj jenah joicá bojoó. ‘Moisés á wutatjidih jwí jepahna, Dios pehbboó jwí bejbipna caá’, ní níj jenah joiná yuh caá. Obohjeéhtih, ded pah Moisés weemdíh á naáwátjidih ní joyáh bojat jíib, Dios yeebdíh á peéh chājbipna caá. ⁴⁶Moisés weemdíh jeh át naóh daacáp tají. Pánihna, caán á daacátjidih ‘Yoobópdih tígaa’, niijná, wā naáwátidihbut ‘Yoobópdih tígaa’, níta níj

* 5.29 Dn 12.2 * 5.33 Jn 1.19-27; 3.27-30 * 5.37 Mt 3.17; Mr 1.11; Lc 3.22
* 5.39 Dt 4.1; 8.1; 30.15-20

jenah joi tágaa. ⁴⁷Obohjeéhtih, Moisés á daacátjidih ‘Yoobópdih tígaa’, niijcán, wá naawátidibut ‘Yoobópdih tígaa’, ñi niijcán niit”, Jesús queétdih á niijíp jī.

**Cinco mil cáacwādih
Jesús jeémát á wāhat**

(Mt 14.13-21; Mr 6.30-44; Lc 9.10-17)

6 ¹Túttimah, Galilea ímndih conanaáboó Jesús jwiítidih á ñumah chúuh bejep jī. Caán ímjuh muntih Tiberias ím á wūt jumup jī. ²Jesús á booanachah ennitji dawá cáacwā ít ñuún péenap tajī. ³Pánih chúuh jwiibínitji, aab béjnit, jeená páuh laab jwiibínit, jwiít á bohénitdih á ñumah chúudup jī. ⁴Caán láa Pascua yeó jáapna pínah bahnihah á júdhup jī. ⁵Caanná jwiíbí chúudna, Jesús dawá cáacwā jwí pebhna í júúwúchah, á enep jī. Pánih ennit, Felipedih nin pah á níj wúbh joyóp jī:

—Dawá cáacwā jwí pebhna í júóh jíghona caá. ¿Deh tígaa í jeémát pínahdih jwí jíib chājbi? á niijíp jī.

⁶“Ded pah caá Felipe á níj jepahbi”, niijná, Jesús caanjéh á chājat pínahdih jéihna yuhna, Felipedih páant á níj wúbh joyóp jī.

⁷Páant á níj wúbh joyóchah joinít, Felipeboó nin pah á níj jepahap jī:

—Ocho widh tewat jíibjīh jeémátidih jwí jíib chājachah yuhna, queétdih áta jwiibícan tagaa, á niijíp jī.

⁸Jwiít bícdih jumni Simón Pedro úudboó, Andrés wūt jumni, Jesúsdihi nin pah á niijíp jī:

⁹—Cinco pan dah, chéne queejwáidih nin wébit á bíbohna caá. Obohjeéhtih, páant bóobitjeh á jumuchah, queétdih páant moón dawá cáacwādih á jwiibícan niit, Andrés á niijíp jī.

¹⁰—Queétdih ñi chúudat tútú, Jesús jwiítidih á niijíp jī.

Caanjīh túni ylip á jumup jī. Pánihna, jwí chúudat túutuchah, ylip jumupdih cáacwā í táí chúud beedép jī. Cinco mil neonájeh í jumup jī. Yaádh, í weh bícdih chah í jumup jī. ¹¹Páant í chúud beedéchah ennit, Jesús pan dahnadih wbnit, “Túina caá, Paá”, Diosdih á niijíp jī. Páant níj péanit, jwiít á bohénitdih queétdih chúudnitdih pan, queejdihbut á

páát túutup jī. ¹²Páant jwí pááachah, jeémpnit, cáacwāboó í táí wud jumup jī. Páant í wud jumuchah ennit, Jesús jwiítidih nin pah á níj wutup jī:

—Í judh jeémpnidih ñi táí ubuá, í yoh peécat pínah niijná, á niijíp jī.

¹³Páant á niijíchah joinít, cinco pan dahnaji, chéne queejwáidihbut í judh jeémpnidih jwí ub yacachah, doce wuhna pohba á yáwap jī. ¹⁴Pánihna, jwiít cáacwā jwí jéih chājca naáhdih Jesús á chājachah enna, cáacwā nin pah í míc niijíp jī:

—Yoobópdih tígaa. Nin Dios naawátidih naóh yapani, nin baáboó júóhni pínahdih jwípí páini caá, queétdih í míc niijíp jī.

¹⁵Páant míc niijnít, queétdih Jesúsdihi maáh pínah í waadáhip yuh jī. Obohjeéhtih, queétdih páant í níj jenah joyátdih jéihnit, bícjeh jeená páuh laab béjnit, Jesús á bejah bojop jī.

Jesús ímjih á yáac chúi bejat
(Mt 14.22-27; Mr 6.45-52)

¹⁶Páant á páuh laab bejat túttimah, tōo náh júúwúchah ennit, jwiít á bohénit ímboó jwí dei bejep jī. ¹⁷Caanná jwiíbí, jááj chóodih waadnit, Capernaum tútchina chúuh bejat túut jwí chāap jī. Obohjeéhtih, Jesúsboó jwí pebhna á jwiicáp jī. Páant á jíghochah, caandíh pái chuúnit, jwí chúuh bejep jī. Páant jwí chúuh bejehchah, á tub tōoáh bejep jī. ¹⁸Páant á tōoáh bejat túttimah, johlit búdí á júúwúchah, búdí nolihatbut á ñahap jī. ¹⁹Pánihna, caán ím tac yoób jwí bejehah pohba, Jesús ímjih jwí pebhna á yáac chúi júúwúchah, jwí enep jī. Páant á júúwúchah ennit, búdí jwí úumup jī. ²⁰Páant jwí úumuchah ennit, caán jwiítidih nin pah á niijíp jī:

—ÍNi en úumca bojoó! íWeemjéh tígaa! á niijíp jī.

²¹Páant á niijíchah joinít, búdí wéinit, caandíh jááj chóona jwí waadát túutup jī. Páant á waadát túttimah, waícanjeh jwí jenah joi béjepna jwí chúuh jwiibínap jī.

Cáacwā Jesúsdihi í bidat

²²⁻²³Chebit bóo yeó jáapdih Jesús Diosdih “Túina caá, Paá”, niijnít,

queédih jeémát ā wūhəpjiboó dawá cáacwā páina ítih chājap wut yuh jī. Wī jwúub chúuh jūúwúchah, Jesús jwíjeéh ā waadcatdihbat í enep jī. Caandih páantjeh pái jwuhna ít chājap wut yuh jī. Tiberias tátchiboó jumniiji jāáj chóona í juməpboó át juibínap wut jī. ²⁴Pánihna, Jesús ā wihcatdih ennit, queét caandíh bidna, caán jāáj chóonadih waadnit, Capernaum tátchina chúuh jūóhniit, jwiítidih í nūán juyúp jī.

**Jesús pan panihni ā jumadilh
ā naáwát**

²⁵Pánih nūán chúuh junítjji, Jesúsdih jwááhniit, caandíh nin pah í níj úubh joyóp jī:

—ÍBohéni, débólih tibeé ninboó ma jūóh? í niijíp jī.

²⁶Páant í níj úubh joyóchah joinít, queédih Jesús nin pah ā níj jepahap jī:

—Yoobópdih yeebdíh wā naóhna caá.

Dios bádi ā wəpatjīh yeebdíh wā teo wáacachah yuhna, ‘Caán Dios ā wahní Cristo caá’, weemdíh ní níj jenah joicán beé. Páant níj jenah joicán yuhna, jwúub jeémp, wud jumadilhjeh níit bid jūóh tagaá, páant muntih. ²⁷Obohjeéhtih, yoobópdih yeebdíh wā naóhna caá. Nin baácdih bóo jeémát moopáh bejniijeh caá. Pánihna, caán déenadih jīb chājīhcan, teocat caá náahap. Obohjeéhtih, Diosjeéh túi jumát tútuni jeémát panihniiboodíh bidat caá náahap. Weém nihát cáacwā úud jené caán jeémát panihnidih wā wūhna caá. Wā íp weemdíh páant ā wūhat túutəp be. Páant wā jumadilh yeeb ní jéhiyat pínah niijná, Dios ā wəpatjīh weemdíh ā chāj júutat túutuchah, yeeb ní enep be, Jesús queédih ā niijíp jī.

²⁸Páant ā niijíchah joiná yuhna, queét caandíh nin pah í jwúub níj úubh joyóp jī:

—ÍDed pah tigaá jwí chājbi, Dios ā náahatdih chājat túut niijná? í niijíp jī.

²⁹—Nindih Dios yeebdíh ā chājat túutna caá: ‘Wā wahnidih túi jenah joinít, ní jepahaá’, yeebdíh ā níj wutəp be, Jesús queédih ā niijíp jī.

³⁰—Meém Dios ā wahní yoobát jumna, ā wəpatjīh ma chāj júut en tigaá bácah, meemdíh jwí jepahat pínah niijná. ³¹Jwí nūowáji jon játih tútchi wihcapboó maná í niijnidih ít jeémép wut jī. * Dios naáwátidih naóh yapani nin pah át níj daacáp tají: ‘Jeámant queédih jeémátidih át wūhəp wut jī, í túi jeémát pínah niijná’, át níj daacáp tají. * ÍPáant ā chājatji चाह मेémboó mata jéih chāj taniít? caandíh í niijíp jī.

³²—Yoobópdih yeebdíh wā naóhna caá. Moisésjeh pohba queédih japmant jūóhni jeémátidih ā wūhcap jī. Wā íp jeémát yoobát panihnidih jeámant cáacwádih ápi wūhna caá. ³³Pánihna, Dios ā wūhni jeémát panihni japmant dei jūóhniit, nihát baácdih moondíh ā báadhdát túutna caá, Jesús queédih ā niijíp jī.

³⁴—Maá, yeó jáap jumát pah ma niijná jeémátidih jwiítidih ma wūhúú, queét í niijíp jī.

³⁵—Weem tigaá báadhdát túutni jeémát panihni caá. Det weemdíh túi péenitboodíh jwúub nuugúp wunat panihat ā wihcan níit. Det weemdíh náhninit, wéi jenah joinítboodíh taca jootát panihatbat ā wihcan níit. ³⁶Obohjeéhtih, yeebdíh játih naóhna, yoobópdih naóhna beé wā chājap be. Yeébbóo weemdíh enna yuhna, ‘Caán Dios ā wahní Cristo caá’, ní níj jenah joicán caá. ³⁷Nihat wā íp ā jepahat túutnitjeh weemdíh í péebipna caá. Weemdíh pánih péenitdih wā yohcan níit. ³⁸Japmant jūóhna, wā náahatdihjeh chājcan, weemdíh wahní ded pah ā weñat pínahboodíh chājadih wā jūúwúp be. ³⁹Nin caá weemdíh wahní ā weñat pínah yoobát: Nihat weemdíh ā jepahat túutnitdih bəudacán, weemdíh caán péeni yeó jáapdih queédih wā jwúub booaat pínahdih ā náah yacna caá. ⁴⁰Nihat weém ā wūúhdih jepahniit, páantjeh ájeéh í jumát pínahdih wā íp, weemdíh wahní, ā náah yacna caá. Pánihna, péeni yeó jáapdih queédih wā jwúub booaipna caá, Jesús ā niijíp jī.

⁴¹“Weém japmant jüöhni jeémát panihni tigaá wá jumup”, Jesús á niijíchah joinít, jwí maátaboó caandíh íjnit, túbít í míc niijíp jī.

⁴²—¿Nin Jesús José wüäh nihcan níft? Á íp, á índihbut jwíft jwí jéihna caá. Pánihna, jwíft panihnijeh mun tigaá. Pánihni jumna yuhna, ¿dépanihna “Japmant jüöhni wá jumna caá”, á níj? í míc niijíp jī.

⁴³Queét páant í míc niijíchah joinít, Jesús queétdih nin pah á jwúub níj jepahap jī:

—Weemdíh yeejép ní niijá bojoó.

⁴⁴Det í jenah joyátíjhéh weemdíh í jéih jepahcan níft. Obohjeéhtih, wá íp, weemdíh wahniboó, ‘Caán Dios á wahní Cristo yoobát caá’, queétdih á níj jenah joyát túutna caá, wájeéh í péeat pínah niijná. Páant á chájcah, det wíihwá pínah íta jéih jumcan tagaá. Pánihna, péeni yeó jáapdíh weemdíh jepahnitjídih wá jwúub booabipna caá. ⁴⁵Dios naawátdih naóh yapanitboó nin pah ít níj daacáp tají. ‘Dios queét nihatdíh á bohébična caá’, ít níj daacáp tají.* Pánihna, nihát wá íp á bohéatdíh joinít, weemdíhbut í jepahbipna caá. Pánih jepahnit wíihwá í jumbipna caá.

⁴⁶“Wá ípdih ded á encan caá. Weém á wahnijeh caandíh wá enep jī.

⁴⁷Yoobópdih yeebdíh wá naóhna caá. Det weemdíh jepahnit páantjeh wá ípjeéh í túi jumbipna caá. ⁴⁸Weém báadhdani jeémát panihni wá jumna caá. ⁴⁹Ni nuowáji tútchi wihcapboó manádih jeémpna yuhna, ít wunup wat jī.

⁵⁰Obohjeéhtih, japmant jüöhni wá niijní jeémát panihnídih ded jeémpna, iiguípna á bejcan níft. ⁵¹Weém japmant jüöhni báadhdani jeémát panihni wá jumna caá. Caán jeémát panihnídih jeémpnitjeh wá ípjeéh páantjeh í jumbipna caá. Caán báadhdani jeémát panihni wíih bácah á jumna caá. Pánihna, wíih bácahdih wá wühhbipna caá, nihát baácđih moón wá ípjeéh í túi jummat pínah niijná. Pánih wühhna, nihát cáacwáđih wá wun wühhbipna caá”, Jesús á niijíp jī.

⁵²Páant á niijíchah joinít, jwí maátaboó, queétdjeh nin pah í níj míc wéhenap jī:

—¿Nin dépanih tigaá áih bácahdih jeémát pínah panihni á wühhbi? í míc niijíp jī.

⁵³Páant í niijíchah joinít, Jesús nin pah queétdih á niijíp jī:

—Yoobópdih yeebdíh wá naóhna caá.

Weém nihát cáacwá úud jeñé wá jumuchah, ded wíih bácah panihnídih jeémpcanni, wíih meép panihnídih babhcanni wá íp pebhboó á bejcan níft. ⁵⁴Ded wíih bácah panihnídih jeémpni, wíih meép panihnídih babhndih péeni yeó jáapdíh wá jwúub booabipna caá. Caánboó wá ípjeéh páantjeh á jumbipna caá. ⁵⁵Wíih bácah ní jeémát yoobát panihni, wíih meépbút ní babhbat yoobát panihni á jumna caá. ⁵⁶Det wíih bácah panihnídih jeémpnit, wíih meép panihnídihbut babhnit, weém bícđih í túi jumbipna caá. Weembát queét bícđih wá jumbipna caá. ⁵⁷Wá íp páantjeh jumni weemdíh wahná, weemdíhbut páantjeh jumni á jummat túutna caá. Páant á chájat dée, jeémátdih ní bidat pah, ded weém páantjeh jumnidih búđ bidna, caandíh wá ípjeéh páantjeh jumni wá jummat túutbipna caá. ⁵⁸Butéh yeebdíh wá naóhni jeémát panihni Dios pebhmant dei jüöhni caá. Caán jeémát panihni jwí nuowáji í jeémpni maná panihni nihcan caá. Queétdboó caán jeémátdih jeémpnitjé ít wunup wat jī. Obohjeéhtih, butéh wá naóhni jeémát panihniwoodíh ded jeémpni wá ípjeéh páantjeh á jumbipna caá, Jesús á niijíp jī.

⁵⁹Capernaum tútchídih moón í míc wáacat muúboó Jesús queétdih páant á níj naóh bohénap jī.

Jesúsdih jepahna, páantjeh ájeéh jwí túi jummat

⁶⁰Dawá jwíjeéh péenit Jesús á bohéatdíh joinít, nin pah í níj wéhenap jī:

—Jesús nin á bohéat buoni yoobát á jumuchah, caandíh jwí jóífhcan caá, queétdjeh ít míc niijíp tají.

* 6.45 Is 54.13

⁶¹Páant ī míic wéheatdih jéihnít, Jesúsboó queétdih nin pah ā níj wábh joyóp jī:

—¿Nin wā bohéatdih joiná, nī íj níít? ⁶²Weém, nihát cáacwā úud jeñé, játih wā jumupjiboó wā jwáub púuh laab béjehah enna, ¿ded pah nīta níj jenah joi? ¿Caandíhbut nīta íj taniít? ⁶³Dios ā wahni Túini Espíritu cáacwáfh caolihdih ā booana caá. Cáacwájeh íih caolihdih ī jéih boocan caá. Pánihna, wā naáwátidih nī tái jenah joyóchah, Túini Espírituboó nīfh caolihdih ā boobápn caá. ⁶⁴Obohjeéhtih, páant ā jumuchah yuhna, ‘Caán Dios ā wahni Cristo nihcan caá’, biqúfna nī níj jenah joiná caá, Jesús ā níjíp jī.

Jesús páant níj jenah joinítidih játih átát jéihyep tajī. Pánihna, caandíh eníhcannitdih duó wáini pínahidihbut átát jéihyep tajī.

⁶⁵Páant níj naóh péanit, nin pah ā jwáub níj naáwáp jī: —Nin pah yeebdíh wā níj naáwáp yuh be: ‘Wá ípboó cáacwáidih weemdíh ā jepahat tútcach, det wíihwā pínah íta jéih jumcan tagaá’, wā níjíp be, Jesús queétdih ā níjíp jī.

⁶⁶Páant ā níjíchah joiná, dawá jwíjeéh péenitji Jesúsdih wéican, ī cádahap jī. ⁶⁷Páant ī cádahachah ennit, Jesús jwíít docewā ā bohénitboodíh nin pah ā níj wábh joyóp jī:

—¿Yeebbút weemdíh nī cádahmi naniít? ā níjíp jī.

⁶⁸Páant ā níj wábh joyóchah joinít, Simón Pedro nin pah ā níj jepahap jī:

—Obohjeéhtih, Maá, jwiítidih bífh bohéni ā whican caá. Diosjeéh páantjeh jwí jumát pínah níjíná, ma naáwátjeh jwiítidih ā tái jéihyana caá. ⁶⁹Pánihna, jwiítboó meemdíh jepahni, ‘Meém túini, Dios wáuh, ā wahni caá’, jwí níj jéihna caá. Pánih jéihnít, meemdíh jwí cádahcan níít, ā níjíp jī.*

⁷⁰Páant ā níjíchah joinít, Jesús jwiítidih nin pah ā níjíp jī:

—Weém yeéb docewáidih wā níwip yuh jī. Obohjeéhtih, bíic níjeéh jumni nemépih pínah ā jumna caá, ā níjíp jī.

⁷¹Páant níjíná, Judas, Simón Iscariote wáuhdih níjíná át chájap tajī. Judas jwíít Jesús ā bohénitjeéh jumna yuhna, Jesúsdih eníhcannitdih duó wáini pínah ā jumap jī.

Jesús úudwā caandíh ī jepahcat

7 ¹Táttimah, Jesús Galilea baáčboó jwiítidih numah jibidih ā bejep jī. Judea baáčdih moón jwí maáta caandíh ī mao yohíhatdih jéihna, Judea baáčboó ā bejfh jwuhcap jī. ²Jwíít judíowā wápchí dahna jwí chájatjidih náhníat yeó jáapna, bahni ā judhdup jī.* ³Pánihna, Jesúsdih ā úudwā nin pah ī níjíp yah jī:

—Níníh chāócánjeh, Judea baácna bejnit, meemdíh pééhíndih ma wépatíh ma cháj jéutá. ⁴Ded ā wépatidih jéutíhna, bih jéutcat caá náahap. Pánihna, yoobópdih wépní jumna, jwí míic wáac jwíbní tútchiboó ma wépatdih jwíjeéh ma jéut jéuwá, Jeñé, ī níjíp jī. ⁵Queéť ā úudwájeh yuhna, ‘Caán Dios wáuh caá’, Jesúsdih ī níj jenah joicáp jī. Páant níj jenah joicán, caandíh páant ī níjíp jī.

⁶Páant ī níjíchah joinít, Jesús queétdih nin pah ā níj naáwáp jī:

—Wā wépatdih cáacwáidih jéutát pínah ā judh jwuhuchah, wā bejcan caá. Yeébbó fiestadih eníhna, caán tútchina nī enbí jwuhú. ⁷Cáacwā yeebdíh ī íjican caá. Obohjeéhtih, ī yéj chájatdih wā naáwáchah joinít, weémboodíh ī íjina caá. ⁸Pánihna, caán fiesta yeó jáapna ā jumuchah, yeebjéh nī enbí jwuhú. Weém caanná wā bejat pínah ā judh jwuhna caá, ā níjíp jī. ⁹Páant níjíná, Galilea baáčboó jwiítidih ā numah chāwáp jī.

Jesús fiestadih enedih ā bejat

¹⁰Obohjeéhtih, ā úudwā ī bejat táttimah, Jesúsbut Jerusalén tútchina jwiítidih ā numah bejep jī. Pánih bejna, cáacwā ī encampantbit jwí bejep jī. ¹¹Fiesta yeó jáapdih míic wáac jwíbnít, jwí maáta Jesúsdih búdí íť bidip wut yuh jī.

—¿Dee tígaá ā jum? íť níj wábh joyóp wut jī.

* 6.68-69 Mt 16.16; Mr 8.29; Lc 9.20 * 7.2 Lv 23.34; Dt 16.13

¹²Pánihna, cáacwābūt caandíh búdí jenah joinít, ít míc wéhenap wut jí. “Caán túini caá”, biquína níj, “Caán yeejép caá. Cáacwādih yee naóhni caá”, bitaboo ít níijíp wut jí.

¹³Páant níijná yuhna, jwí maátadih úmna, Jesús ded pah ā jumaditih queétjeh ít míc wéhenap wut jí.

¹⁴Í weñat yeó jáapna tac yoób Jesús Dioíh mūnā waád juibínit, cáacwādih ā bohénap jí. ¹⁵Páant ā bohénachah, jwí maáta joi wáhi bejnit, nin pah queétjeh ít míc níijíp jí:

—¿Nin bohécanni yuhna, dépanih tiguaá bohéatdih ā túi jéih? ít míc níijíp jí.

¹⁶Páant ít níijíchah joinít, Jesús queétdih nin pah ā níj naáwáp jí:

—Wā bohéat weemjíh wā naáwát nihcan caá. Obohjeéhtih, weemdíh wahní ā naáwát tútat caá. ¹⁷Ded Dios ā weñat pínahdih chájihni ‘Páant ā bohénachah, ā jéihyatjeh nihcan caá. Yoobópdih Dios naáwát caá’, ā níj jéihbipna caá. ¹⁸Ded ā jenah joyátjeh naóhna, cáacwā caandíh ít weñat pínahdih bidna caá ā chájap. Obohjeéhtih, weemdíh wahniboó weemdíh ā naóh yapaat tútutna caá. Pánih naóh yapana, caandíhjih ní weñat pínahdih yeebdíh wā náah yacna caá. Páant wā naóh yapanachah joiná, ‘Yeeceanjeh, yoobópdih ā naóhna caá’, ní níj jéihbipna caá.

¹⁹“Moisésji ded pah Dios yeebdíh ā wutatdih át jwúb naóh yapanap wut jí. Obohjeéhtih, bíc níjehé jumni caán ā wutatjidih jepahni wihcan caá. Pánihna, ¿dedé wā chájatji jib tiguaá weemdíh ní mao yohíh?” jwí maátadih ā níj úbhh joyóp jí.

²⁰—Meemdíh nemép ā jumna caá. ¿Déhe tiguaá meemdíh mao yohíhni ít jum, páant ma níjíchah? queét dawá caandíh ít níj úbhh joyóp jí.

²¹—Bíic láa jwí chooát yeó jáapdih yeéb cáacwā ní jéih chájca naáhdih weémboó yeebdíh wā cháj júutap be. Páant wā cháj júutuchah ennit, búdí ní en wáhi bejep be. ²²Jon játih Moisésji nihát neoná weépdih quehli nah yapat chóodih át bóodat tútutap wut jí.

Pánihna, nihát neoná weép ní weh jumna, ocho yeó jáap túttimah chooát yeó jáapdih yuhna, ā wutatji pahjeh níj bóodna caá.* Obohjeéhtih, Moisés ā wutatji pohba át nihcap wut jí. Jwí nūo Abrahamjidih Dios páant bóodat pínahdih át jwíh wutap wut jí.* Pánihna, caán túttimah, jwí nuowā páant íj chájap wut jí. ²³Chooát yeó jáapdih yuhna, Moisés ā wutatjidih yap yohíhcan, yeebbút ní wehdih níj bóodat tútutna caá. Páant ní chájna yuhna, ¿dépanihna, chooát yeó jáapdih weémboó wunnidih wā boonachah enna, níj íj?” ²⁴Ded pah wā chájatdih túi jéihcan, ‘Caán yeejép ā chájna caá’, ní níjca bojoo. Obohjeéhtih, ded pah wā chájatdih jéihna, weemdíh yoobópdih ní jenah joyoo, Jesús queétdih ā níijíp jí.

Jesús jeámant ā jūúwátjidih ā naáwát

²⁵Páant ā níjíchah joinít, biquína Jerusalén tútchidih moón nin pah ít míc níj úbhh joyóp jí:

—¿Nin jwí maáta ít mao yohíhni nihcanna níit? ²⁶Wáát en tih. Páantjeh jwí cáth bohéna caá ā chájap. Páant ā bohénachah yuhna, jwí maáta ded pah ít níjcan caá. ‘Cristo, Dios ā wahní caá’, queét ít níjéhna caá. ²⁷Obohjeéhtih, Dios ā wahní Cristo dedmant ā jūúwátjidih ded ā jéihcan níit. Nin Jesús ā jumni tútchidih jwiít jwí jéihna caá. Pánihna, Dios ā wahní Cristo nihcanna caá, queét ít míc níijíp jí.

²⁸Jesús Dioíh mūú díftboó queétdih bohénajeh, páant ít míc níjíchah jéihnit, nin pah ā jwúb níj náacáp jí:

—Yeebjéh pohba ‘Caandíh jéihna, ā jumni tútchidihbūt jwí túi jéihna caá’, ní níj jenah joiná yuh caá. Obohjeéhtih, wā jenah joyátjihjeh ninboó jūóhna wā chájcan jí. Wā íj jí weemdíh ā wahap jí. Pánih wahní yeeconni, yoobópdih chájni caá ā jumap. Caandíh ní jéihcan caá. ²⁹Obohjeéhtih, weémboó ā pebhmant jūóhni caandíh wā túi jéihna caá, ā níijíp jí.

* 7.22 Lv 12.3 * 7.22 Gn 17.10 * 7.23 Jn 5.9

³⁰Páant ā niijíchah joinít, jwí maáta caandíh ī tewíhip yuh jī. Obohjeéhtih, caandíh ī mao yohat pínahdih Dios ā jenah joyát ā judh jwuhchah, caandíh ī jéih teo jwuhcap jī. ³¹Pánihna, dawá Jesúsdi h táí jenah joiná, nin pah ī míc niijíp jī:

—Nin Jesús jwiít cáacwā jwí jéih chājca naáhdih dawá láa ā chāj jútup be. Dios ā wahní pínah Cristoboó ícaan cháh áta chāj tanít? ÍPáant tih jūúh? ÍPánih chājna, caanjéh Dios ā wahní Cristo nihcan níit? Í niijíp jī.

**Jesúsdi h fariseowā
ī tewat túutíhat**

³²Páant ī niij wéhenachah joinít, fariseowā, sacerdotewā ī maáta bíicdih Dioíh mūudíh wapnit soldadowādih Jesúsdi h ī tewat pínah niijná, ít wahap wut yuh jī.

³³Jesús queét cáacwādih nin pah ā jwúub niijíp jī:

—Daocánni yeó jáap níjeéh wā jum jwúhbi pna caá. Weemdíh wahní pehbboó wā jwúub bejat pínah bahni jeh ā judhna caá. ³⁴Wā jumat pínah pehbboó yeéb ní jéih bejcan níit. Weemdíh bidna yahna, ní jéih bid jwúbican nacaá, ā niijíp jī.

³⁵Páant ā niijíchah joinít, queéjtjeh nin pah ī míc níj úúbh joyóp jī:

—Nin páant niijná, ídedboó bejat túut tígaa ā chāj? yeéb ní jenah joyóchah. ÍJwí déewā ī bej peétni baácnaboó bejnit, jwí déewā nihcannitdih ā bohémi naniít? ³⁶Yeéb weemdíh bidna yuhna, ní jéih jwááhcan níit', niijná, 'Wā bejat pínah pehbboó ní jéih bejcan níit', niijná, íded pah niij tígaa páant ā níj? Í míc niijíp jī.

**Báadhani mah panihnidih
Jesús ā naáwát**

³⁷Fiesta péeni yeó jáap, chah jwí weñat yeó jáap yoobát ā jumuchah,* Jesús caanjíh nūhnit, tubit ā ñaac níj naáwáp jī:

—Ded taca joótni wā pebh ā jūúwú naáh. Á juyúchah, túí báadhani mahdih caandíh wā wúhbi pna caá. Wā wúhni

pínah mah panihnidih babhna, Diosjeéh ā túí jumbipna caá.* ³⁸Ded weemdíh jepahni pínahdih Dios naáwát dih naóh yapanit nin pah ít níj daacáp tají: 'Ded weemdíh jepahna, áh caolihmant muj nooj bácat panihni ā jumuchah, wéinit wíih táini doonádih bitadih ā wép naóhbi pna caá', ít níj daacáp tají,* ā niijíp jī.

³⁹Páant niijná, Jesúsdi h jepahnitdih Túini Espírítu jumna, ded pah ā teo wáacat pínahdih naóhna ā chājap jī. Obohjeéhtih, Jesús jeáboó ā jwúub aab béj jwuhchah, Túini Espírítu ā dei jūóh jwuhcap jī.

**Jesúsdi h judíowā bíic yoobó
ī jenah joicát**

⁴⁰Páant Jesús ā niijíchah joinít, dawá cáacwā nin pah ít míc níj wéhenap wut jī:

—Nin yoobópdi h Dios naáwát dih naóh yapani jwí p' páini caal, ít niijíp wut jī.

⁴¹—Nin Cristo jwiít dih túí úbni nacaá, bita ít niijíp wut jī.

Obohjeéhtih, bitaboó nin pah ít míc niijíp wut jī:

—Cristo jūóhna, Galilea baácboó áta jumcan tagaa. Nin Jesús caanjíh bóo tígaa. ⁴²Dios naáwát dih naóh yapani nin pah áit níj daacáp tají. 'Cristo David jumma yoobát ā jumbipna caá.* Pánihna, David ā cáac jumni Belén tútchiboó ā cáac jumbipna caá', áit níj daacáp tají.* Pánihna, Jesús Belén tútchidih bóo nihcan, Dios ā wahní yoobát nihcan caá, queéjtjeh ít míc niijíp wut yuh jī.

⁴³Pánihna, queét Jesúsdi h bíic yoobó ít jenah joicáp wut jī. ⁴⁴Biquína Jesúsdi h ít teo nemíhip wut yuh jī. Obohjeéhtih, í jéih teocap jī.

Jesúsdi h jwí maáta ī jepahcat

⁴⁵Sacerdotewā ī maáta, fariseowā bíicdih Jesúsdi h ī tewat túutnit soldadowā Jesús pebh jumínitji, queétdih wahnit pehbboó ít jwúub bejep wut jī. Í pebhna í jwúub jwúbínachah,

* 7.37 Lv 23.36; Nm 29.35 * 7.37 Jn 4.10-14 * 7.38 Ez 47.1; Zac 14.8 * 7.42 2S 7.12-13; Sal 89.3-4; 132.11-12 * 7.42 Mi 5.2

soldadowādih queét nin pah it niijíp wut jī:

—¿Dépanih tibeé Jesúsdiñ ñi teocan? it niijíp wut jī.

⁴⁶—Caán yoobópdih naóhni beé. Bifh caan pánih wēp naóhni ā wihcan caá, queét soldadowā it niij jephahap wut jī.

⁴⁷Páant ī niij jephahachah joinít, fariseowāboó nin pah it niijíp wut jī:

—¿Yeebdíh caán ā yeenachah, ‘Yoobópdih tigaá’, ñi niijnít beé? ⁴⁸Det jwī maáta Jesúsdiñ jephacan, caandíh ī náahcan caá. Pánihna, jwiítbūt caandíh jwī náahcan caá. ⁴⁹Obohjeéhtih, queét caandíh jephahitboó Moisés ā wutatjidih ī jéihcan caá. Caandíh ī jéihcat jīb jwī fip queétdih peéh chājna, iiguípnā ā yohbipna caá, fariseowā it niijíp wut jī.

⁵⁰Obohjeéhtih, bíc fariseo, Nicodemo wūt jumni, chei Jesúsdiñ wéhenadiñ juibíniji,* páant ī niijíchah joiná, bita caanjíh jumnitdih nin pah āt niijíp wut jī:

⁵¹—Jesús yeejép ā chājachah, jwī jéihcan caá. Pánih jéihcannit jumna, ded pah ā chājatdih caanjéh ā naóhcah, jwī jéih peéh chājcan caá. Pánih jéihcan yuhna, caandíh jwī peéh chājachah, jwī wutatdihjeh jwíta yap yoh tagaá, āt niijíp wut jī.

⁵²Páant ā niijíchah joinít, queét nin pah caandíh it niij jaiñhup wut jī:

—¿Meembút Galilea baácdih bóo níit, jwiítidih páant ma niij naóhna? Dios naáwátdih meemdíh táí bohéat caá náahap. Pánih bohéna, ‘Galilea baácmant ded Dios naáwátdih naóh yapani átat wihcap tají’, ma niij jéihbipna caá, Nicodemodih it niijíp wut jī.

⁵³Páant niij péanit, íh munnáboó it jwáub bejep wut jī.

Deoh nah jumnih

mi yeejatdih Jesús ā yohat

8 ¹Dioíh munnáboó jumnitdih naóh péanit, Olivo Jeéboó Jesús jwiítidih ā numah púuh laab béjep jī. ²Cheibitjeh, jwáub dei jüóhñit, Dioíh muudíhjih muntih jwiítidih ā jwáub numah waadáp jī. Á jwáub juyúchah ennit, nihat cáacwā ā pebhna ī míc wáac juyúp jī. Í

míc wáac juyúchah ennit, caanjíh juibí cháudnit, Jesús queétdih ā bohénap jī, páant muntih.

³Á bohéat tac jumachah, Moisés ā wutatjidih bohénit, fariseowā bícdih deoh nah jumnihdih it ub jüúwáp jī. Pánih ub jüóhñit, Jesús pebh cáacwā cátdíh caántdih ī ub jui ñuhup jī. ⁴Pánih ub jui ñuhñit, Jesúsdiñ nin pah ī niij naáwáp jī:

—Nint mi áa nihcannijih yeejép mi chājachah, jwī enep be. ⁵Dios ā wutatdih Moisésji nin pah āt niij daacáp tají. ‘Det ī áa nihcannitjih yeejép ī chājachah ennit, jee dáhnajih ñi yoh mawaá’, āt niij daacáp tají.* Pánihna, meémboó ¿ded pah tigaá ma niij naóhbi? ī niijíp jī.

⁶Páant niijnít, caandíh naóh yacat túut niijná, Jesúsdiñ mácah ī naáwát túutup yuh jī. Obohjeéhtih, Jesús páant ī niijíchah joinít, páah jéennit, áih téih tíbjiñ baácbóó ā daacáp jī. ⁷Páant ā daác jwuhachah, queétdih caandíh úubh joí yójahna ī chājap jī. Páant ī úubh joí yójahachah, Jesús ñah ñuhñit, queétdih nin pah ā niij jephahap jī:

—Ded ñijeeh jumni yeejat wihcanniboó caántdih jee dáhjñ ā jwíih yoh waáwá naáh, ā niijíp jī.

⁸Páant niij péanit, jwáub páah jéennit, ā jwáub daacáp jī, páant muntih. ⁹Páant ā niijíchah joinít, caántdih naóh yacnitboó ī yeej chājatjidih náhnit, chah behnit biquína ī jwáub beedáh bejep jī. Páant ī bejat túttimah, deoh nah jumnih Jesús pebh ñuhñit, caandíh joinít cátdíh queét chénewájeh ī jumup jī. ¹⁰Pánihna, caántdih ub jüóhñitji ī wihcah enna, jwáub ñah ñuhñit, Jesús caántdih nin pah ā niij úubh joyóp jī:

—¿Deyoob tigaá queét ī bej?

¿Meemdíh peéh chājat tútñit ī wihcan caá? ā niijíp jī.

¹¹—Wihcan caá, Maá, mi niijíp jī.

—Weembút meemdíh wā peéh chājat tútñit. Ma jwáub bejeé. Ma jwáub yeej chājca bojóó, páant muntih, Jesús caántdih ā niijíp jī.

* 7.50 Jn 3.1-2 * 8.5 Lv 20.10; Dt 22.22-24

**Jesús baabát panihni
ã jumatdih ã naáwát**

¹²Caántdih naóh péanit, Jesús caanjíh jumntdih nin pah ã jwúub níj naáwáp jī, páant muntih:

—Weemjéh tigaá baabát panihni nin baácdih moondíh wā íp Dios ded pah ã jumatdih wā jéihyana caá. Det weemdíh péenit, dupáát panihpboó bejan, wā ípdih í jéihbipna caá. Pánihna, weemdíh í jepahachah, páantjeh Diosjéh wā túi jumát tóutbipna caá, ã níjíp jī.*

¹³Páant ã níjíchah joinít, fariseowāboó nin pah caandíh í níjíp jī:

—Meém ma túi jumatdih meemjéh naóhna, oboh nih yána caá ma chājap. Páant ma níjíchah, ma naáwát dedé pínah nihcan caá, í níjíp jī.*

¹⁴—Weemjéh dedmant wā jūúwátjidih wā jéihna caá. Wā bejat pínahdihbut wā jéihna caá. Obohjeéhtih, yeéboó caandíh ñi jéihcan caá. Páant weemdíh ‘nih yáni caá’, ñi níjíchah yuhna, ded pah wā jumatdih yoobópdih yeebdíh wā naóhna caá. ¹⁵Yeéboó ded pah ñi enatdihjeh jenah joinít, cáac ded pah ã jenah joyátdih yoobópdih ñi jéihcan caá. Pánih jéihcan yuhna, ‘Caánboó túican caá’, weemdíh ñipí níjána caá. Obohjeéhtih, yeéb ñi jenah joyát pah jenah joicán, ded pah cáacwā í jumatdih weémboó wāpí naóhcan caá.

¹⁶Weém bíicjeh pohba nihcan caá cáacdih páant níj naóhni. Wā íp weemdíh wahni bíicdih, páant jwí níj naóhna caá. ‘Nin túini caá. Nin túicanni caá’, níj naóhna, yoobópdih wā naóhna caá. ¹⁷Moisés yeebdíh wātna, nin pah át níj daacáp tajī: ‘Chénewā bíic yoobó í naáwáchah, í níjít yoobópdih caá’, át níj daacáp tajī. ¹⁸Weémboó ded pah wā jumatdih naóhna, weemdíh wahni, wā ípbut bíic yoobó ã naóhna caá. Pánihna, ded pah wā jumtadíh chénewā naóhni jwí jumuchah, jwí naáwát yoobópdih caá, Jesús queétdih ã níjíp jī.

¹⁹Páant ã níjíchah joinít, fariseowā nin pah í níj úúbh joyóp jī:

—¿Ma íp dedboo tígaa ã jum? í níjíp jī.

—Weemdíh jéihcan, wā ípdihbut ñi jéihcan caá. Obohjeéhtih, weemdíh jéihna nihna, wā ípdihbut ñita jéih taga, Jesús queétdih ã níj jepahap jī.

²⁰Páant níj bohéna, Dioíh muúboó cáacwā í wáhni dinerodih í jwejat paihna pebh ã jumap jī. Obohjeéhtih, caandíh í mao yohat pínahdih Dios ã jenah joyát ã judh jwuhuchah, caandíh tewíhni pínahbut caanjíh jumna yuhna, caandíh í jéih teo jwuhcap jī.

**“Wā bejep pínahna ñi jéih
bejan níit”, Jesús ã níjít**

²¹Pánih bohénajeh, Jesús nin pah ã jwúub níj naáwáp jī:

—Wā jūúwápjiboó wā jwúub bejbipna caá. Páant wā bejat táttimah, weemdíh ñi bidbipna caá. Obohjeéhtih, ñi yéej chājatdih ñi cádahcatjī jīb, wātna, ñíh caolíh iiguípnā bejna, wā bejep pínahboó ñi jéih bejan níit, ã níjíp jī.

²²Páant ã níjíchah joinít, jwí déewā queétdih nin pah í míic níj úúbh joyóp jī: —“Wā bejep pínahboó yeéb ñi jéih bejan níit”, níjína, ¿caanjéh míic mao wātat táut níit ã chājap? í níjíp jī.

²³Páant í míic níjíchah joinít, Jesús queétdih nin pah ã jwúub níj naáwáp jī: —Yeéb nin baácdih moón jumna, Dioíhwā nihcannit í jenah joyát bíic yoobó ñi jenah joiná caá. Obohjeéhtih, weémboó japmant jūóhni jumna, wā íp Dios ã jenah joyát bíic yoobó wā jenah joiná caá. ²⁴Wā íp ã wahni wā jumtadíh yeebdíh wā naáwáchah yuhna, ‘Á naáwát yoobópdih nihcan caá’, ñi níjítjī jīb ñi yéejatdih cádahcan, iiguípnā ñi bejbipna caá. Pánihna, ñi yéejatdih cádahcat peéh, wā níjítjī bíic yoobó yeebdíh ã yapbipna caá, ã níjíp jī.

²⁵—¿Déhe pohba tigaá, meém? í níjíp jī.

—Ded pah wā jwíh naáwátjī pahjeh wā jumna caá. ²⁶Yeéb ñi túi chājcatjī jīb Dios ã peéh chājat pínahdih yeebdíh wā naáwát pínah búdí ã judhna caá. Obohjeéhtih, weemdíh wahni ã naáwát

* 8.12 Mt 5.14; Jn 9.5 * 8.13 Jn 5.31

táutnidihjeh yeebdíh wā naóh yapana caá. Caán ā naáwát táutat yoobópdih caá, Jesús queétdih ā niijíp jī.

²⁷Obohjeéhtih, “Wā íip caá weemdíh wahní”, ā niijíchah joinít, queét ít beh joicáp wut jī. ²⁸Páant í beh joicátdih jéihna, Jesús queétdih nin pah ā jwáub níj naáwáp jī:

—Weém nihat cáacwā úud jeñédih cruzbo péohnit, í pud dodhbípa caá. Páant í chājachah, ‘Caán Dios ā wahní caá’, ní níj jéihbípa caá. Pánih jéihnit, wā jenah joyátjeh wā chājcatjidihbut ní jéihbípa caá. Wā íip ded pah weemdíh ā bohéátjidihjeh yeebdíh wā naáwátjidihbut ní jéihbípa caá. ²⁹Weemdíh wahnibo wájeéh ā jumna caá. Pánih wahní jumna, ā weñat pínahdihjeh yeó jáap jummat pah wápi chájna caá. Páant wā chājachah, weemdíh ā cádahcan caá, Jesús ā niijíp jī.

³⁰Páant ā niijíchah joiná, “Caán Dios ā wahní Cristo yoobát ā jumna caá”, dawá í níj jenah joyóp jī.

**Dios ā wehdih, yéej chājnitdihbut
Jesús ā naáwát**

³¹Biquína jwí déewā “Caán Dios ā wahní Cristo caá”, níj jenah joinítidih Jesús nin pah ā niijíp jī:

—Wā naáwátidih cádahcannit, wā bohénit yoobát ní jumna caá. ³²Pánih jumna, yoobópdih ní jéihbípa caá. Yoobópdih jéihnit jumna, watnit panihnit ní jumbípa caá. Pánih jumna, ded yéej chájat jenah joyát ā jéuwáchah yahna, caandíh ní jéih yap yohbípa caá. Yeebdíh watni panihni ā jwáub wihcan níit, queétdih ā niijíp jī.

³³Páant ā niijíchah joinít, queétdih nin pah í níj jepahap jī:

—Jwítboó Abrahamji ā jumená jwí jumna caá. Páant jwí jumuchah, ded jwítboodíh watni ā wihcan caá. Páant wihchah yahna, ¿ded pah níj tígaa ‘yeebdíh watni ā jwáub wihcan níit’, ma níj naóh? í niijíp jī.*

³⁴—Yoobópdih yeebdíh wā naóhna caá. Cáacwájuh í yéej chájatdih í jéih

cádashcan caá. Pánihna, queétdih yéej chájat táutni í maáh panihni caá. Pánih yéej chájnit jumna, caandíh teo wáhnit panihnit í jumna caá. ³⁵Ded teo wáhní ā maáh wáuh pah nihcan caá. Bitá caandíh í ubuchah, queétdih teo wáhní ā jumbípa caá. Obohjeéhtih, ā maáh wáuhboó páantjeh ā wáuh ā jumbípa caá. ³⁶Pánihna, weém Dios wáuh jumna, deddih wā watachah, caanbát wā íip wáuh ā jumbípa caá. Páant wā watachah, yéej chájatdih teo wáhní panihni ā jwáub jumcan níit.* ³⁷Yeéb Abrahamji ā jumená ní jummatdih wā jéihna caá. Obohjeéhtih, ā jumená jumna yahna, wā naáwáchah joífcan, weemdíh ní mao yohíhna caá. ³⁸Wā íipjeéh jumna, wā enatjidih yeebdíh wápi naóhna caá. Obohjeéhtih, ní íip, nemépwā í maáh, yeebdíh ā wutuchah joinít, yeéboó nípi jepahna caá, Jesús queétdih ā niijíp jī.

³⁹—Jwí íip yoobát Abraham caá, queét í niijíp jī.

—Abrahamji ā weh yoobát jumna, ded pah ā chájatji bíic yoobó níta cháj tagaá.

⁴⁰Obohjeéhtih, yeebdíh wā íip ā naáwátidih yoobópdih wā naóh yapanachah yahna, yeéboó weemdíh ní mao yohíhna caá. Abrahamjiboó páant áta chájcan tagaá. ⁴¹Pánihna, ní íip panihni ā chájíhat bíic yoobó mun tígaa yeebbút ní jenah joyóp, Jesús queétdih ā niijíp jī.

—Jwít íip wihcannit pohba jwí nihcan caá. Dios bíicjeh caá jwí íip, queét í niijíp jī.

⁴²—Weém Diosjeéh jumnji nin baácna wā jéuwáp jī. Pánihna, Dios ní íip ā jumuchah nihna, yeéb weemdíh ‘jwí úud jeñé’, níta níj oi tagaá. Wā jenah joyátjeh nin baácboó wā dei jéohcan jíí.

Wā íip Dios ninboó weemdíh ā wahachah, wā jéuwáp jī. ⁴³¿Dépanih tígaa wā naáwátidih ní beh joicán? Ní joífcat jíib caandíh ní beh joicán caá.

⁴⁴Ní íipboó yeejéj chájat táutnit í maáh caá. Pánihna, caán ā weñat pínahboodíh nípi chájna caá. Nin baác ā jwíih jumuchah, buebut páantjeh cáacwádih

* 8.33 Mt 3.9; Lc 3.8 * 8.36 Gá 5.1,13

mao yohat tũtũni caá. Caán bícmant yeenjeh jumna, yoobópdiĥ ñi jéih naóhcan caá. Pániĥ yeeat buéhna, nih yáaatdihjeh ápi naóhna caá. ⁴⁵Páant yeebdíĥ yeeni ã naáwáchah joinítji weémboó yeebdíĥ yoobópdiĥ wã naáwáchah yuhna, ñi joíhcan caá. ⁴⁶Páant wã naáwáchah, ‘Meém yeejép chãjni caá’, weemdíĥ ñi jéih niijcán caá. Yoobópdiĥ wã naáwáchah yuhna, ðdépanih tigaá ñi joíhcan? ⁴⁷Det Dios wehboó ã naáwátđih ĩ túi joiná caá. Obohjeéhtih yeéb ã weh nihcannit, ã naáwátđih wã naóh yapanachah yuhna, ñi joíhcan caá, Jesús queétdih ã niijíp jĩ.

Abrahamji jum láa Cristo ã jumát

⁴⁸Páant ã niijíchah joinít, queét nin pah Jesúsđih ĩ niijíp jĩ:

—‘Meém Samaria baácđih bóo jumna, Diosđih jéihcanni, nemép caolih jumni caá’, jwĩ niiját yoobópdiĥ caá, ĩ niijíp jĩ.

⁴⁹—Weemdíĥ nemép wiĥcan caá. Obohjeéhtih, wã íp ã wépatjĩh yeebdíĥ wãpi chãj jéutna caá, caandíĥ ñi wéi naáwát pínah niijná. Páant wã chãjachah yuhna, yeébbóo weemdíĥ wéi naóhcanjeh, yeejép ñipí wéhena caá. ⁵⁰Weemdíĥ ñi wéi naáwátđih wã bidcan caá. Obohjeéhtih, cáacwã weemdíĥ ĩ túi weñat pínahđih wã ípboó ã náah yacna caá. Pániĥna, weemdíĥ ĩ náahcatji jíib queétdih ã peéĥ chãjbiĥna caá.

⁵¹Yoobópdiĥ yeebdíĥ wã naóhna caá. Det wã naáwátđih jepahnit, ĩ wũncan níft, Jesús queétdih ã niijíp jĩ.

⁵²—Bũ báach chah jenah joicánniabeĥ meém ma jumátđih jwĩ jéihna caá. Abrahamji, niĥat Dios naáwátđih naóh yapanitji pah mũntih ĩt wũnũp wũt jĩ. ‘Wã naáwátđih jepahni ã wũncan níft’, niijná ðdépanih tigaá meém páant ma niij? ⁵³¿Jwĩ nũo Abrahamji, Dios naáwátđih naóh yapanitjibut chah wépnit níft ma jumũp? ¿Ded pohba tigaá meém? páant niij naóhni, queét ĩ niijíp jĩ.

⁵⁴—‘Chah wépnit caá’, weemjéh wã jéih niijcán caá. Wã ípjuh ‘Caán chah wépnit caá’, weemdíĥ ã niijná caá. Yeéb ‘Diosjeh caá jwĩ íp’, ñi niijnjeh wã íp ã jumna

caá. ⁵⁵Obohjeéhtih, páant niijná yuhna, caandíĥ yoobópdiĥ ñi jéihcan caá. Weém caá caandíĥ wã jéihyep. ‘Caandíĥ wã jéihcan caá’, niijná, yeéb ñi niĥat pah yeeni wãta jum tagaá. Obohjeéhtih, caandíĥ yoobópdiĥ wã jéihna caá. Pániĥ jéihna, ded pah ã naáwáchah, wãpi chãjna caá. ⁵⁶Jwĩ nũo Abrahamji nin baácboó wã dei jũúwát pínahđih jéihnit, ã weñep jĩ. Pániĥna, wã dei jũúwáchah ennit, búdí ã yoób weñep jĩ, Jesús ã niijíp jĩ.

⁵⁷—Páant, meém cincuenta jópchi ma jwĩbí jwuhcan caá. Páant niijná, ¿jon jãtĩĥ bóo Abrahamjĩđih meém ma ennit jĩ? Jesúsđih ĩ niijíp jĩ.

⁵⁸—Yoobópdiĥ yeebdíĥ wã naóhna caá. Abrahamji jum láa, weém wãát jumũp jĩ, Jesús queétdih ã niij jepahap jĩ.

⁵⁹Páant ã niij jepahachah joinít, queétdiĥ jee dáhnadiĥ mũbnit, Jesúsđih ĩ yohĩhip yuh jĩ. Obohjeéhtih, páant ĩ yohĩhichah, ĩ encat pónih, Jesúsboó Dioĩĥ mũmãmãnt ã bac bejep jĩ.

Jesús jéih encannidih ã booaat

9 ¹Túttimah, jwiitđih Jesús namáboó numah bejna, jéih encannidih jwĩ jwãááp jĩ. ²Caandíĥ enna, Jesúsđih nin pah jwĩ niij mũbĥ joyóp jĩ:

—¿Bohéni, dépanih tigaá nin jáap cáac jumnajeh jéih encanni átãt jumjĩ? ¿Caanjéh yeejép ãt chãjji taniit? ¿Á mánaboó ĩt yéej chãjji taniit? jwĩ niijíp jĩ.

³—Nin ã yéej chãjatji jíib niĥcan caá. Á mánabut ĩ yéej chãjatji jíib niĥcan caá. Obohjeéhtih, pãniĥni ã jumũchah, wã íp ã wépatjĩĥ caandíĥ wã teo wáacbiĥna caá. Páant wã booaachah ennit, wã íp ã wépatđih cáacwã ĩ túi jéihbiĥna caá.

⁴Yeó jáap cáacwã ĩih tewatđih ĩ jéih teona caá. Obohjeéhtih, chei ĩ jéih teocan caá. Pániĥna, bũ caá ã baab jwũĥat panihichah, weemdíĥ wahnĩ ã wũtatđih jwiitđih chãjat ã náahna caá. Túttimah, chei jwĩ teocat pah, caandíĥ jwĩ jéih chãjcan níft. ⁵Pániĥna, nin baácboó wã jum jwũhũchah, baabát panihni cáacwãđih ded pah Dios ã jumátđih wã

* 8.58 Ex 3.14; Jn 8.24; 10.30-33; 13.19

jéihyabipna caá, Jesús jwiít dih ā niijíp jī.”

⁶Páant niij péanajeh, baácboó mao mác ā coí jéenanap jī. Pánih coí jéenanit, baácdih wid teo, jéih encanníh quíibnadih ā ñáñap jī. ⁷Pánih ñái péa, Jesús caandíh nin pah ā niijíp jī:

—Siloé wūt jumni jéehat júána quíib táñadih ma bejeé, ā niijíp jī. Siloé niijná, jwíih wéheatjīh “Wahni”, niijná ā chājap jī.

Jesús páant ā niijíchah joinít, jéih encanni quíib táñadih ā bejep jī. Pánih quíib táiniiji ennit, áih mæuná át jwúub bejjip taga. ⁸Páant ā jwúub juibínachah, ā chéenwá, caán dinero úúbhniiji ā jummatdih jéihnitbút, ennijeh áih mæuná ā jwúub juibínachah ít enep wút jī. Pánih ennit, queétjeh nin pah ít míc niij úúbh joyóp wút jī:

—¿Nin dinero ápi úúbhniiji nihcan níit? ít niijíp wút jī.

⁹—Caanjéh tigaá, biquína ít niijíp wút jī.

—Obohjeéhtih, caán yoobát pohba nihcan caá. Caan páh jígozna caá ā chājap, bitaboó ít niijíp wút jī.

—Caanjéh tigaá, weém, encanniji át niijíp wút jī.

¹⁰—Jéih encanniji jumna yuhna, ¿ded pah tibeé ma nih? bæu ma jéih enat pínahdih, ít niij úúbh joyóp wút jī.

¹¹—Jesús wūt jumni áih mao mácjīh baácdih wid teonit, wíih quíibnadih áí ñáñap be. Weemdíh ñái péanit, ‘Siloé wūt jumni jéehat júána quíib táñadih ma bejeé’, ā niijíchah joinít, caanná wá bejep be. Pánih quíib táinajeh, wá jéih enep be bæu, queétdih át niijíp wút jī.

¹²—¿Meemdíh pánih chājni deyoob tigaá an jum? ít niijíp wút jī.

—Jaóh jūh. Deh caá an jumupna caá, queétdih át niij jepahap wút jī.

Jéih encannijidih fariseowá i úúbh joyát

¹³Páant niij úúbh joí péanit, jéih encannijidih fariseowá maáta pehbhoó ít ub bejep wút jī. ¹⁴Jwiít judfowá jwí chooát yeó jáapdih caán encannijidih

Jesús ā booanap jī. ¹⁵Páant chooát yeó jáapdih ā booanachah jéihnít, caán newédih fariseowá jwuh ít jwúub úúbh joyóp wút jī:

—¿Ded pah tibeé meém ma nih en? ít niijíp wút jī.

—Mao mácjīh baácdih wid teonit, wíih quíibnadih áí ñáñap be. Pánih ñái péanit, ā quíib táñat tútuchah joinít, wá bejep be. Pánih quíib táinajeh, wá yoób enep be, queétdih át niijíp wút jī.

¹⁶Páant ā niijíchah joinít, biquína queéé fariseowá nin pah ít niijíp wút jī:

—Caán jwí chooát yeó jáapdih át tewep taga. Páant chooát tútatdih yap yohna, Diofīh yoobát nihcan caá, ít niijíp wút yuh jī.

Obohjeéhtih, bitaboó

—Yeejép chājni nihna, páant áta jéih booacan tagaá. Pánihna, caán táini nacaá, ít niijíp wút jī. Páant niijná, queéé chénat pah poómp bíic yoobó ít jenah joicáp wút jī. ¹⁷Caán encannijidih queéé nin pah ít jwúub niij úúbh joyóp wút jī, páant muntih:

—Meemdíh míih quíibdih booani Jesúsdih meémboó ¿ded pah ma niij jenah joí? ít niijíp wút jī.

—Caán yoobópdih Dios naáwát dih naóh yapani nacaá an jumup, queétdih át niij jepahap wút jī.

¹⁸Pánihna, jwí maáta nin pah ít niij jenah joyóp wút yuh jī: “Nin jéih encanni át nihjican tagaá”, ít niijíp wút jī. Páant niij jenah joinít, jéih encanniji mánadih ít bid bojop wút jī. ¹⁹Pánih bid bojnít, ā mánadih jwuh nin pah ít niij úúbh joyóp wút jī:

—¿Nin yoobópdih ñi wúúh níit ā jumup? ¿Bíicmantjeh caán jwíih cáac jumna, jéih encanni nitjī wáát jumup? ít niijíp wút jī.

²⁰—Nin jwí wúúh tigaá. Bíicmant jéih encannijeh ā cáac jumup jī. ²¹Caandíh jéihna yuhna, ded pah bæu ā enatdih, caandíh booanidihbút jwí jéihcan caá. Jwí wúúh wébit nihcan caá.

Caandíh jeh ñi úúbh joyoó. Caanjéh ā jéih naóhna caá, ā mána ít niij jepahap wút jī.

* 9.5 Mt 5.14; Jn 8.12

²²Ded “Jesús Dios ã wahni Cristo caá”, niijníndih jwí maátaboó jwí m'fíc wáacat m'ũudíh ãta waadát t'ũutcan tagaá. Páant ã chãjat pínahdih jéihna, encanniji mána jwí maátadilh ãt ãumji tagaá. ²³Pánih ãumna, “Caán wébít nihcan caá. Caandíhjih ñi ãúbh joyoó”, ãt niij jepahap wut jì.

²⁴Páant ã niij jepahachah joinít, jwí maáta jéih encannijidih ãt jw'ãub niijíp wut jì:

—Jesús yéejni ã jumatdih jwiítboó jwí jéihna caá. Pánihna, Diosdih wéinit, jwiít dih yoobóp dih ma naáwá, caandíh ãt niijíp wut jì.

²⁵—Jesús yéejni chãjni ã jumatdih wá jéihcan caá. Nindihjih wá jéihna caá. Jéih encanni wá jumap jì. Obohjeéhtih, b'ũ wá enna caá, queétdih ãt niij jepahap wut jì.

²⁶—¿Ded pah tí meém ma enat pínahdih caán ãf chãj? ãt jw'ãub niij ãúbh joyóp wut jì.

²⁷—Caandíhjih tibeé yeebdíh wáát naáwáp be. Páant wá naáwáchah yuhna, weemdíh ñi joíhcan beé. ¿Dedé chãjat t'ũut tigaá wá jw'ãub naáwáchah, ñi joíh, páant m'ũntih? ¿Yeebbát áihwá ñi jumíh níit? queétdih ãt niijíp wut jì.

²⁸—Meém Jesús ã bohéni caá. Obohjeéhtih, jwiítboó Moisésji ã bohéni caá. ²⁹Dios Moisésdih ã naáwátjidih jwí jéihna caá. Obohjeéhtih, caán Jesúsboó dedmant ã j'ũúwátjidih jwí jéihcan caá, queétdih ãt niij j'ũhñap wut jì.

³⁰—¡Páant! Dedmant ã j'ũúwátjidih ñi jéihcay yuhna, ¿caán weemdíh enani Dios ã wahni ãta nihcan taniit? ³¹Yéejni ã ãúbhchah, Dios ã joicán caá. Caandíh bácah jwiít niht jwí jéihna caá. Obohjeéhtih, Diosdih wéini, ã wutatdih jepahniboó ã ãúbhchah, Dios ã joiná caá.* ³²Jon j'átiñ nin baác ã jwiíh jumachah, jwíh cáac jumnajeh, jéih encannidih ded ã enaat doonádih jwí joicán jì. ³³Pánihna, Jesús Dios ã wahni nihcan, weemdíh ãta jéih enacan tagaá, queétdih ãt niijíp wut jì.

³⁴—Bíicmantjeh yéejni mat jumap wut jì. ¿Pánih yéejni jumna yuhna,

jwiít dih meém ma bohéni níit? jwí maáta caandíh ãt niij j'ũhñap wut jì. Páant niij péanijeh, Diosíh m'ũumánt caandíh ãt bacanap wut jì.

Jéih encannit panihnit ded pah ã jumat

³⁵Jéih encannijidih ã bacaat doonádih Jesús ã joyóp jì. Pánih joinít, jéih encannijidih jw'ãhñit, caandíh nin pah ã niij ãúbh joyóp jì:

—¿Meém niht cáacwá ãud jené dih jepahni níit? ã niijíp jì.

³⁶—¿Maá, déhena tigaá caán? Caandíh jéihna, wá jepahbipna caá, Jesús dih ã niij jepahap jì.

³⁷—Caandíh ma enna caá. Weém meemdíh wéheni caanjéh tigaá, Jesús ã niijíp jì.

³⁸—Maá, meemdíh wá jepahna caá, ã niij jepahap jì. Páant niijnájuh, Jesús pebh bódicha caj yoh ñajnit, caandíh ã weñep jì.

³⁹Páant ã weñechah ennit, Jesús cáacwáboodíh nin pah ã niijíp jì:

—Ded pah t'ũi chãjat, ded pah t'ũi chãjcatdihbut cáacwá ã jéihyat pínah niijná, nin baácboó wá j'ũúwáp jì. Wá ñip ded pah ã wutatdih jéihcan, jéih encannit panihnit ã jumna caá. Det páant ã jumatdih jéihnitdih wá ñip ded pah ã jumatdih wá bohébipna caá, jéih ennit panihnit ã jumat pínah niijná.

Obohjeéhtih, bita jéih encannit panihnit jumna yuhna, ‘Jwiít t'ũi jéihnit caá’, niij jenah joinít dih wá bohécan níit, páantjeh jéih encannit panihnit ã jumat pínah niijná, Jesús ã niijíp jì.

⁴⁰Páant ã niijíchah joinít, biquína caan pébh jumnit fariseowá caandíh nin pah ã jw'ãub niij ãúbh joyóp jì:

—‘Jéih encannit panihnit’, niijná, ¿jwiít dih niij níit ma chãjap? Jesús dih ã niijíp jì.

⁴¹—Jéih encannit panihnit ñi jumatdih ñi jéihyechah, yeebdíh peéh chãjat ãta wihcan tagaá. Obohjeéhtih, jéih encannit panihnit jumna yuhna, ‘Diosdih jwí t'ũi jéihna caá’, ñi niij jenah joyát j'ũib, yeebdíh peéh chãjat ã

jumbipna caá, Jesús queétdih ā niijíp jī.

Ovejawādih en daonít

10¹Táttimah, bíh naáwátjīh, bohéat tét niijná, nin pah Jesús cáacwādih ā niij naáwáp jī: “Yoobópdih yeebdíh wā naóhna caá. Ded ovejawādih wáihyat júdu jēcdih waadčanjeh, jēc wihcapmant aáb páud deini, nūmni tigaá ā jumup. ²Obohjeéhtih, wáihyat júdu jēcdihjeh waadníboó áih ovejawādih en daoní yoobát ā jumna caá. ³Ovejawā mínah wáihyat júduđih ā juyáchah, caán jēcdih wapni caandíh ā wāt wūhbirna caá. Páant ā wātachah, queétdih en daoníboó íih wūtna yoobó ā ezechah, áih wéheatdih áih ovejawā ípí beh joiná caá. Pánih beh joinít, queét ājeéh ípí pée bac bejna caá. ⁴Nihat áihwā í bac beedéchah ennit, queétdih ā waóh bejna caá. Pánihna, ā wéheatdih táí beh joiná, caandíh jeh í táí pée bejna caá. ⁵Obohjeéhtih, bíh í jéihca naáhdih ípí pée bejcan caá. Bitá í wéheatdih joiná, úmni, ípí jwei béjna caá”, Jesús ā niijíp jī.

⁶Jesús páant ā niijíchah yuhna, queét ít beh joicáp jī.

Ovejawādih en daonít naáwátđih Jesús ā beh joyáát

⁷Páant í beh joicátđih jéihnit, Jesús queétdih nin pah ā jwúb niij naáwáp jī: “Yoobópdih yeebdíh wā naóhna caá. Ovejawādih wáihyat júdu jēc panihni tigaá weém wā jumup. ⁸Nihat wá játih jéohnit, nūmni panihnit, cáacwādih ít yee bohénap jī. Queét í wéhenachah yuhna, cáacwā, ovejawā panihnit, queétdih ít joyáh bojop jī. ⁹Weémboó wáihyat júdu jēc panihni caá. Weemdíh jepahnit jēcdih waadní panihnit í jumna caá. Pánihna, queét iiguipna bejnit déejidih wā táí ubna caá. Ovejawā úmcanjeh, íih wáihyat júdumant jumnitji wáica naáhwā jeémédih bac bejnit, jwúb waadní, ípí táí jumna caá. Pánihat pah, wíih cáacwāboó wájeéh

jumna, ípí úmcanjeh, wáica naáhwā panihnit, ded pah í náahatdih í bíbohna caá.

¹⁰“Queét nūmniťboó ovejawā panihnit Dioh cáacwādih mao yohodih í jéohna caá. Obohjeéhtih, búdí wēnit, yeó jáap jummat pah wájeéh í táí jummat pínah niijná, weémboó queét ovejawā panihnitdih bididih wā jūwúp jī.

¹¹Weémboó ovejawā panihnitdih táí en daoní wā jumna caá. Ded ovejawādih táí en daoní caandíh í mao yohat dée tobohat ā jumuchah yuhna, áih ovejawādih ápí en daó cádahcan caá. Pánihat dée pah queét iiguipna bejnit déejidih wā táí ubat tét niijná, weémboó cáacwādih wā wun wūhbirna caá. ¹²Obohjeéhtih, ā maáih ovejawādih en daoníboó yoobópdih ā táí en daocán caá. Áihwā nihcah, jió ovejawādih jeémédih í jūwúchah enna, teo wāhniťboó ā en daonít ovejawādih ā yoh jwei béjna caá. Ā yoh jwei béjat táttimah, jió ovejawādih á tewechah enna, queét í jwei peét bejna caá. ¹³Caán teo wāhniťboó ā jíb chājatdihjeh ā bidna caá. Ā maáih ovejawādih oican, queétdih ā táí en daocán caá.

¹⁴⁻¹⁵“Weém ovejawādih táí en daoní panihni tigaá wā jumup. Wā íip weemdíh ā táí jéihna caá. Weembút caandíh wā táí jéihna caá. Páant wā ípdih wā táí jéihyat pah, wíih ovejawā panihnit weemdíhbut í táí jéihna caá. Wā íip weemdíh ā jéihyat pah, weembút queétdih wā táí jéihna caá. Pánih jéihna, wā ípjeéh í táí jummat pínah niijná, queétdih wā wun wūhbirna caá.* ¹⁶Bíh wáihyat júdu díťboó jumnit ovejawā panihnitbut wíihwā í jumbipna caá. Pánih jumnit, wā naáwáchah, queéťbut í joi póobipna caá. Pánih joinít, wíihwā bícdih queéťbut í jumbipna caá.* Pánihna, weemjéh nihah wíihwādih wā táí en daobipna caá.*

¹⁷“Wíihwā Diosjeéh í jummat pínah niijná, queétdih páant wā wun wáhat pínah, wā jwúb boo pud jūwát pínahdihbut jéihnit, wā íip weemdíh ā oina caá. ¹⁸Ded ā náahat pah weemdíh

* 10.14-15 Mt 11.27; Lc 10.22 * 10.16 Ef 2.11-22 * 10.1-16 Is 40.11; Ez 34; Lc 15.4-5; He 13.20

mao yohni pínah ā wíhcan caá. Wā náahat pahjeh weemdíh ī mao yohbipna caá. Pánihna, wā náahat pahbüt wā jwáub boo pud jüóhbična caá. Páant wā íp weemdíh ā chájat tütütüp jī”, Jesús ā niijíp jī.

¹⁹Páant ā niijíchah joinít, queét jwí déewā bíic yoobó it jenah joicáp jī.

²⁰—Caán nemép jumni caá. Pánih jumna, ā túi jenah joicán caá. ¿Dépanih tigaá caandíh jwí jwáub joíh, páant muntih? dawá ī míic niijíp jī.

²¹Obohjeéhtih, bitaboó

—Nemép jumni nihna, páant āta niíf naóhcan tagaá. Ded nemép jumni jéih encannijidihbüt āta jéih enacan tagaá. Pánih chájna, nemép jumni nihcan caá, ī míic niijíp jī.

Judfowā ī maáta Jesúsdi h ī náahcat

²²⁻²³Túttimah, mah noój láa, jwiít judfowā Jerusalén tütchidih bíih fiesta jwí jwáub chájap jī. Jon játih Dioíh mūdíh cháj péanit, Diosdi h ī wēi wáhtjidih jwí náhnat yeó jáapna ā jumup jī. Caán yeó jáapnadi h Dioíh mūdíh wáap lap numpboó Salomón ā chájat tütüti coahjidih Jesús ā en jibip jī.

²⁴Caan cóahboó Jesús ā jumuchah enna, jwí maáta caandíh ñuh pénda bojnít, nin pah ī niíf wáub joyóp jī:

—Maatápdih jwiítidih ma túi naóhcan caá. Pánihna, buu jwiítidih yoobópdih ma naáwá. ¿Meém Dios ā wahni Cristo yoobát níit ma jumup? Jesúsdi h ī niijíp jī.

²⁵—Yeebdíh játih wáat naáwáp jī. Páant wā naáwáchah yuhna, weemdíh ñi joíhcan jī. Wā íp ded pah weemdíh ā wutuchah joinít, ā wēpatjīh wápi chájna caá. Pánih chájna, weém Cristo yoobát wā jumatdi h jüt tígaa wā chájap.

²⁶Páant wā jéutuchah yuhna, bitaíh ovejawá panihnit jumna, weémboodíh ñi joíhcan caá. ²⁷Ovejawá queétdih en daonidih ī túi joyát pahjeh tih, wíihwá weemdíh ī túi joiná caá. Queétdih wā jéihyechah, weemdíh ī túi péena caá.

²⁸Páantjeh Diosjeéh queétdih wā túi jumat tütuchah, iiguírna ī bejcan níit.

Pánihna, queétdih wā túi en dawáchah, bitaboó weemdíh ī jéih déuc wáican níit.

²⁹Wā íp, wíih cáacwádi h weemdíh wáhní, nihatdi h chah wēpni caá ā jumup. Pánih jumna, wíihwádi h ā wapachah, bitaboó caandíh büt ī jéih déuc wáican níit. ³⁰Weém wā ípji h bíic pahjeh jwí jumna caá, Jesús ā niijíp jī.

³¹Páant ā niijíchah joinít, jwí maátaboó caandíh yohat tütüti niijná, jee dáhnadi h í ubup jī. ³²Páant ī chájachah ennit, Jesús queétdih nin pah ā niíf wáub joyóp jī:

—Wā íp ā wēpatjīh dawá láa yeebdíh wā cháj jéutüp yuh jī. ¿Dedé wā chájatji júb tígaa weemdíh jee dáhnaji h ñi yohíh? ā niijíp jī.

³³—Dios ā wēpatjīh ma cháj jéutatji júb nihcan caá. Obohjeéhtih, meém cáacjeh jumna yuhna, ‘Diosjeh tígaa weém’, ma niíf yee naáwát júb, meemdíh jee dáhnaji h jwí yoh mawíhna caá, queét ī niíf jepahap jī.*

³⁴—Obohjeéhtih, Dios naáwátdih naóh yapani nin pah āt niíf daacáp tají: ‘Yeéb wā naáwát tütüti di h “weem pánihnit ñi jumna caá”, wā niijíp be’, Dios āt niíf daacát tütüp tají.* ³⁵Páant ā niíf daacátji yoobópdih ā jumatdi h jwiít nihat jwí jéihna caá. ‘Yeeni caá’, caán tólihdih jwí jéih niijcán caá. Dios naáwátdih jéihnitdi h ‘Dios panihnit ñi jumna caá’, ā niíf naáwáchah, yoobópdih caá. ³⁶Dios ā náahat pah weemdíh nin baáboó ā wahap jī. Pánihna, ‘Weém Dios wáuh caá’, wā niijíchah joinít, ¿dépanih tígaa weemdíh ‘Jesús Diosdi h yéej naóhna caá ā chájap’, ñipi niíf? ³⁷Wā íp ā náahat pah wā chájach bácah, wā bohéátdih ‘Yoobópdih tígaa’, niijcát caá náahap.

³⁸Obohjeéhtih, wā íp ā wēpatjīh wā cháj jéutuchah yuhna, ‘Caán Dios ā wahni Cristo caá’, ñi niíf jenah joicán caá. Páant niíf jenah joicán yuhna, wā cháj jéutatdi h ‘Yoobópdih Dios ā wēpatjīh chájna caá’, niíf jenah joyát caá náahap. Páant niíf jenah joiná, weém wā íp bíicdi h wā jumatdi h ñi túi jéihbična caá, Jesús queétdih ā niijíp jī.

³⁹Páant ā niijíchah joí íijnit, queét chéneji ī tewíhip yuh jī. Obohjeéhtih, ī

* 10.33 Lv 24.16 * 10.34 Sal 82.6

tewíhichah jéihnit, Jesús queétdih á jwei báb bejep jī.

⁴⁰Pánih bac bejniji Juan cáacwādhíh á daabánapji, Jordán muj conanaáboó jwiít dih á nūmah chūuh bejep jī, páant mūntih. Caanná juibínit, jwiít dih á nūmah jumup jī.* ⁴¹Dawá cáacwā caanná caandíh enedih ípí juibínap jī. Nin pah queét míicjeh í niijíp jī:

—Juan Dios á wēpatíh chāj júutcan yūhna, ded pah Jesús á jumat pínahdih á naáwáchah, yoobópdih tají, í míic niijíp jī.

⁴²Páant níj jenah joinítji dawá Jesús dih í jepahap jī.

Lázaro

11 ¹⁻²Lázaro, María, Marta queét bíic peihcannit, Betania tútchidih moon tájī. Queét yaádh í úud Lázaro bíicdih ípí jumup jī.* Caánt María, Jesúh jítchanadhíh tēi chej jumni macjeh puohnit, míih waó yoócjīh jōp wionih pínah mit jumup tají.* Bíic yeó jáap Lázaro bádí át wunup wut jī. ³Á wunuchah, yad jeñéna yaádh Jesús dih dooná ít wahap tají.

—Ma oini bádí wunna beé á chājap be, Maá, ít níj naáwát tútup tají.

⁴Pánihna, Lázaro á wunat doonádih joinít, Jesús jwiít á bohénitdih nin pah á níj naáwáp jī:

—Lázaro wunna yūhna, á boobipna caá. Wunna, Dios á wēpat júutat pínahjeh caá. Páant á wēpatdih júutnit, á wūúh wā jumatdih, wēpni wā jumatdihbut cáacwādhíh á júutbipna caá, á niijíp jī.

⁵Lázardih, yad jeñéna yaádh dihbut Jesús bádí á oyop jī. ⁶Pánihna, Lázaro á wunat doonádih joiná yūhna, caán yuúpbit bóo tútchidih Jesús chéne yeó jáap jwiít dih á nūmah jum wuhup jī. ⁷Túttimah, Jesús jwiít dih nin pah á niijíp jī:

—Chóbe Judea baácboó, Lázarowā í jumni tútchina, jwí jwúub bejjīh, á niijíp jī.

⁸—Bohéní, jwínah bóonajeh tibeé, jwí maáta meemdíh jee dáhnajī í yoh

mawíhip be. ¿Dépanihna buu ma jwúub bejjīh, páant mūntih? jwí niijíp jī.

⁹Páant jwí niijíchah joinít, caandíh í mao jwuhcat pínahdih naóhna, bíih naáwátjīh jwiít dih nin pah á níj jéihya naáwáp jī:

—Búdí ní jenah joicá bojoó. Bíic yeó jáapdih doce horajeh caá á baabáp. Páant á baabáchah, jwí táí enna caá. Pánihna, yeó jáap jibna, jwí buugcán caá. ¹⁰Chei jibna, baabcáh, jwí pí buugná caá, Jesús á niijíp jī.

Páant niijná, nin pah niijná át chājap jī: “Buu wā íp ded pah á chājat tútatdih wā chāj beedá jwuhcan caá. Páant weemdíh á chājat tútat judh jwuhchah, weemdíh í jéih mao jwuhcan caá”, niijná át chājap jī.

¹¹Páant níj péanit, jwiít dih nin pah á jwúub niijíp jī, páant mūntih:

—Jwí chéne Lázaro, ũona caá an chājapna caá. Páant á ũwuchah, weém caandíh wucúdhíh wā juibíbipna caá, jwiít dih á niijíp jī.

¹²—Caán láa bácah, Maá, ũona, á táí boobipna caá, jwí niijíp jī.

¹³Páant jwí níj jenah joyóchah yūhna, Jesús “Ūona caá an chājapna caá”, niijná “Mujáh bejna beé”, niijná át chājap jī.

¹⁴Páant jwí níj jenah joyátdih jéihnit, Jesús jwiít dih nin pah yoobópdih á niijíp jī:

—Lázaro jáantjeh á wunup be. ¹⁵Wā wíhchah, caán á wunuchah, wā wéina caá. Buu bejnit, ded pah wā chājat pínahdih enna, weemdíh chah ní táí jenah joibípná caá. Pánihna, chóbe tí bácah, caandíh í yohopjina enedih jwií bejjīh, á niijíp jī.

¹⁶Páant á niijíchah joinít, Tomás, waláhni jwí niijní, nin pah jwiít dih á niijíp jī:

—Chóbe jwiítbut ájeéh jwí en péejīh. Caandíh maona, jwiít dihbut í mawa naáh, á niijíp jī. Páant á niijíchah joinít, bíicdih jwí bejep jī.

Jesús cáacwādhíh jwúub booní á jumat

¹⁷Jwiít Jesúsjeéh Betania tútchina jwí juibíat pínah játih, Lázaroíh bácahjidih

* 10.40 Jn 1.28 * 11.1-2 Lc 10.38-39 * 11.1-2 Jn 12.3

jeé fítboó ítát yohop tají. Bícjñh bóo téihya yeó jáap játih átát wunap tají. ¹⁸Betania tútchi Jerusalén tútchi pebhjeh, bíic hora tacdih bejat ā jumap jī. ¹⁹Páant pebhjeh ā jumuchah, dawá jwí déewā María, Marta ī úddih ī jígahat yayáat túut niijná, ī pebhna ít juibínap tají. ²⁰Jwí juibíat doonádih joinít, mummánt bac jüóhñit, Marta Jesúsdiñ jwááádih mi juyáp jī. Obohjeéhtih, yad jupü müé díitboó mit jum jwuhap tají.

²¹Pánihna, Jesúsdiñ jwááhñit, Marta nin pah caandíh mi niijíp jī:

—Maá, ninboó meém ma jumuchah, wā úud áta wuncan tagaá. ²²Obohjeéhtih, ded pah ma úábáchah, Dios ā jepahat pínahdih weém wā jéihna caá, mi niijíp jī.

²³—Ma úud ā boo pud jüóhñipna caá, Jesús ā niijíp jī.

²⁴—Páant tih, Maá, caán péeni yeó jáap, niñat cáacwā ī boo pud jüóhñi yeó jáapdiñ,* wā úudbut ā jwúub boo pud jüúwát pínahdih wā jéihna caá, mi niijíp jī.

²⁵—Weemjéh wunnidih wā jéih jwúub booana caá. Ded weemdíh jepahni wunna yuhna, ā jwúub boo pud jüóhñipna caá.

²⁶Ded báadhñibut weemdíh jepahni, iiguípna ā bejan niít. ¿Caandíh ma jenah jói niít? Martadiñ Jesús ā niijíp jī.*

²⁷—Maá, meém Cristo Dios wúuh ma jumatiñ wā téi jéihna caá. Nin baácboó meemdíh ā wahatiñdihbut wā jéihna caá, Marta mi niñ jepahap jī.

Jesús ā juñát

²⁸Páant Marta caandíh niñ péanit, Mariadiñ naáwádih mi jwúub bejep jī. Pánih jwúub bejñit, mi jwandiñ mit juibí jéyé naáwáp wut jī.

—Bohéni át jui tábeé. ‘Mi jüúwú naáh’, meemdíh ā niijná beé, mit niijíp wut jī.

²⁹Páant mi niijíchah joinít, María waícanjeh Jesúsdiñ jwááádih mit bac jüúwáp tají. ³⁰Marta mi jwúub bejat túttimah, tútchiboó waadcan, caanjíhñeh jwí páñap jī. ³¹Jwí déewā, Mariajeéh jumñit, wēpép mi bac bejatdiñ enñit, “Mi úuddih yohopjiboó juñádih bejna caá mi

chāhap”, ít niñ jenah joyóp tají. Páant niñ jenah joinít, caántdih ít péé jüúwáp tají.

³²Jwí pebhna juñit, Jesúsdiñ enna, ā pebh María baácboó mi páah yoh ñajap jī. Pánih páah yoh ñajñit, caandíh nin pah mi niijíp jī:

—Maá, ninboó meém ma jumuchah, wā úud áta wuncan tagaá, mi niñ jüú naáwáp jī.

³³Páant mi jüú naáwáchah enñit, mijeéh péenit jwí déewā ī juñátdihbut enñit, Jesús búdí ā jígahap jī. ³⁴Pánih jígahñit, Jesús queétdih nin pah ā niñ úábñ joyóp jī:

—¿Dee tñbeé caandíh ñi yoh? ā niijíp jī.

—Maá, caandíh jwí yohopjiboó ma en jüúwá, ī niñ jepahap jī.

³⁵Pánih jígahñit, Jesúsbut ā juñáp jī.

³⁶Páant Jesús ā juñáchah enñit, mijeéh péenit jwí déewā nin pah queétjeh ī míc niijíp jī:

—Jesús Lázarodih búdí át oi tagaá, ī míc niijíp jī.

³⁷Obohjeéhtih, bita caanjíh jumñit nin pah queétjeh ī míc niijíp jī:

—¿Dépanih tígáá jéih encannidih ā jéih booana yuhna, Lázaroji ā wunat pínah játih, caandíh át jéih booaji caá? ī niijíp jī.

Lázaro ī yohñidih Jesús ā booaat

³⁸Páant ī niñ míc wéheat pónih, Jesús búdí ā jwúub jígahachah, Lázarodih ī yohopjiboó jwítdih ī numah juibínap jī. Caán fítdih búdí jee dájhñh ít nemep tají.

³⁹Páant ī nematiñdih enñit, Jesús queétdih nin pah ā niijíp jī:

—Can jeé júdudih ñi pütú dodhdoó, ā niijíp jī.

—Maá, bícjñh bóo téihya yeó jáap játih ā wunuchah, jwí yohop be. Pánihna, buñ áih báach an wíjina nacaá buca, Marta mi niijíp jī.

⁴⁰—Wā naáwátjidiñ ma téi náhninaá. Dios ā wēpatdih ma enat pínahdih meemdíh wáat naóhna beé, caántdih ā niijíp jī.

⁴¹Páant caántdih ā niñ péanachah, queét jeé júdudih ī pütú dodhdop jī. Í

* 11.24 Dn 12.2 * 11.25-26 Ro 6.4-5; Col 2.12; 3.1

pütá dodh péanachah, Jesús jeáboó chéi ennit, Diosdih nin pah á niŷ úábúp jī:

—Weemdih ma joyátji táina caá, Paá.

⁴²Wá úábát pah ma joyátdih wá jéihna caá. Pánihna, weemdih ma wahatjidih nit jumnit í jéihyat pínah niijná, bæu meemdih páant wá niŷ úábhna caá, Jesús á niijíp jī.

⁴³Páant niŷ úábh péanit, Jesús nin pah á niŷ wēp ejep jī:

—ÍLázaro, ma bac jūúwá! á niijíp jī.

⁴⁴Páant páant á niŷ ezechahjeh, Lázaro í yohniji yuhna, jeé ítmant á bac jūúwúp jī. Pánih bac jūóhna, áih bácah, áih wao dáhdihbat yégueh chóo tópjih í pinatji pahjeh á duo bác jūúwúp jī.

Páant á bac jūúwúchah, Jesús queétdih nin pah á niijíp jī:

—Caandih ni pinatji yégueh chóo tópnadih ni wataá, á niijíp jī. Páant á niijíchah joinít, í pinatji tópnadih Lázarodih í watap jī.

Jesúsdiŷ í tewat pínahdih í míic wéheat

(Mt 26.1-5; Mr 14.1-2; Lc 22.1-2)

⁴⁵Páant Lázarodih á boanachah ennit, María pebh junítji dawá jwí déewá, Jesúsdiŷ í jepahap jī.

⁴⁶Obohjeéhtih, biquína jepahcannitboó fariseowá pebhna juibínit, ded pah Jesús á chājatjidih ít naáwáp wut jī.

⁴⁷⁻⁴⁸Pánihna, sacerdotewá í maáta, fariseowá, bita jwí maáta bícdih míic wáacnit, queétjeh nin pah ít niŷ míic wéhenap wut jī:

—Jesús dawá láa Dios á wēpatjih á chāj jéutna caá. Pánihna, ‘Páant ma chāca bojó’, jwí niijcáh, niŷ caácwá ájeéh í bejbipna caá. Páant dawá bícdih í jumuchah ennit, Jesúsdiŷ maáh í waadáat pínahdih jenah joinít, Romadih moón í maáta ‘Jwiítdih yohna caá í chājap’, niijnít, jwiít judíowáboodih í peéh chājbipna caá. Pánih peéh chājnit, Dioŷ muúdiŷ í yohat pínah niijná, íih soldadowádiŷ í wahbipna caá. Jwiíh baácdihbat í dúuc wáibipna caá. Pánihna, í bæu ded pah tigaá jwí chājbi? ít míic niijíp wut jī.

⁴⁹Páant í niijíchah yuhna, bíic íjeéh jumni, caán jópchidih sacerdotewá í

maáh yoobát Caifás wut jumni, queétdih nin pah át niŷ naáwáp wut jī:

—Wá déewáá, weemdih ni joi jwáhuá.

Páant niŷ míic wéhená, yeéb ni táí jéihcan caá. ⁵⁰Nihat jwiít judíowá jwí táí jummat pínahdih bíic cáac á wun wáhuachah, á táibipna caá. Á wun wáhcach, jwiít niŷ Romadih moón í maáta í yoh beedábiŷna caá. Caandih yeéb ni táí beh joi jwáhcach caá, Caifás át niijíp wut jī.

⁵¹Páant niŷ naóhna, á jenah joyátjeh niijná át chājcap wut jī. Sacerdotewá í maáh yoobát á jumuchah, jwí déewá í táí jummat pínah niijná, Jesús á wun wáhat pínahdih Diosboó Caifásdih át naáwát túutap wut jī. ⁵²Obohjeéhtih, pániŷ wunna, jwiít judíowádiŷ pohba át wun wáhcap tají. Nihat baácdih moón Dios á weh pínah bíic weh pah jwí jummat pínah niijná, jwí yéejat júb Jesús át wun wáhcup tají. ⁵³Páant Caifás á niijíchah joinít, caán yeó jáapjeh “¿Jesúsdiŷ ded pah tigaá jwí mao yohbi?” queét ít niŷ míic wéhe jwíhip tají.

⁵⁴Pánihna, caandih í mao yohíhatdih jéihnit, Jesús dahwani tútchinadih jibidih á bejhcup jī. Tútchi wihcapboó bejnit, caán pehbít Efraín wut jumni bainí tútchibitna jwiítdih á numah juibínap jī. Pániŷ juibínit, caanjíh jwí jum jwúhup jī.

⁵⁵Caán láa jwiít judíowá jwí pí wéini Pascua yeó jáapna pínah bahniŷeh á judhdup jī. Moisés á naóh yapaatji pah, Diosdih jwí weñat pínah játih táí míic ámohat ápi náahap jī, Dios á enechah, yéejat wihcannit jwí jummat pínah niijná. Pánihna, caandih chājat túut niijná, dawá jwí déewá niŷ tútchinadih moón Jerusalén tútchina ít aab béjep tají.

⁵⁶Caán tútchina juibínit, queét Jesúsdiŷ bidna ítih chājap ta yuh jī. Pániŷ bidna, Dioŷ muúdiŷ jumnit, queétjeh nin pah ít niŷ míic wéhenap wut jī:

—¿Pascua yeó jáapnadiŷ Jesús enedih á júóhca naniít? ni jenah joyóchah, ít niijíp wut jī.

⁵⁷Sacerdotewá í maáta, fariseowábut játih nin pah cáacwádiŷ ítát niŷ wutap wut jī: “Jesús dedboó á jummat doonádiŷ joinít, jwiítdih ni naáwá”, ítát niijíp wut

jī. Caandíh tewat tútut niijná, páant ít niijp wat jī.

Jesúh jítchanadih

María miíh chej jumnijih mi puhwat
(Mt 26.6-13; Mr 14.3-9)

12 ¹Pascua yeó jáapna pínah seis yeó jáap ā judhdūchah, Efraín tútchimant Betania tútchina Jesús jwiítidih ā nūmah jwáub juibínap jī. Caanná juibínit, Lázaro wunniji, Jesús ā booníh munná jwí juibínap jī. ²Páant jwí juibínachah, jwí jeémát pínahdih í chāj wūhup jī. Pánihna, Lázaro, Jesús, jwiít biícidih jeémát cáagat naadíh jwí laj púda bojop jī. Páant jwí laj púda bojochah, Marta jwiítidih jeémát mi cáagap jī. ³Mariaboó nardo wút jumni chej jumni quíftidih, biíc kilo tac yoób ub jūóhnit, Jesúh jítchanadih mi puhwup jī. Puhnit, miíh waó yoócjih mi jōp wiwip jī. ⁴Páant mi puhwat túttimah, caán nihat muú ā tūi chej jum chéyah bejep jī. ⁵Páant mi chājachah ennit, jwiít biícidih jumni Judas Iscariote wút jumniboó, Jesúsdih enhcannitdih duó wáini pínah, nin pah ā niijp jī:

⁵—¿Dépanih tigaá nint caan mácdih mi bíbohna yuhna, mit jíib chāj wūhcan? Caandíh jíib chājna nihna, biíc jōpchi tewat pah bóo mita jíib teo tagaá. Pánihna, caán dinerojih moh yéejnitdih jwíta jéih teo wáac tagaá, ā niijp jī.

⁶Obohjeéhtih, Judasboó moh yéejnitdih teo waaqufhcan, caanjéh dinerodih náahna, nih yáana, páant át niijp jī. Caán jwíih dinerodih en daoní jumna yuhna, bíquí láana árp nūmúp tajī.

⁷Páant ā niijjichah joinít, Jesús nin pah ā niijp jī:

—Caántdih páant ma niijcá bojoó. Mí ámohniji chej jumnijih wíih bácahdih í yohat pínah játih náanat dée pah weemdíh páant mi puohna caá. ⁸Moh yéejnitboó páantjeh níjeéh í jumbipna caá. Páant í jumuchah, débólih wūhíhna, queétdih ní jéih wāhna caá. ⁹Obohjeéhtih, weémboó níjeéh maatápdih wā jumcan níit, ā niijp jī.

Sacerdotewā í maáta

Lázarodihbut í mao yohíhat

⁹Jesús biícidih Betania tútchiboó jwí jumuchah, dawá jwí déewā caandíh enedih ít jūúwúp tajī. Obohjeéhtih, caandíhjuh pohba nihcan, ā booniji Lázarodihbut enedih jūóhna ít chājap tajī. ¹⁰Páant enedih í juibínachah jéihnit, sacerdotewā í maáta Lázarodihbut ít mao yohíhip jī. ¹¹Lázaro wunnijidih ā booaat doonádih joinít, dawá jwí déewā Jesúsdih ít jepahap tajī. Pánih jepahnit, sacerdotewā í bohéatboodíh ít cádahap tajī. Páant í cádahachah ennit, sacerdotewā í maátaboó íj yapnit, Lázarodihbut ít mao yohíhip ta yuh jī.

Jesúswā Jerusaléna í waadát

(Mt 21.1-11; Mr 11.1-11; Lc 19.26-40)

¹²Jwí juibíni daanimant bóo yeó jáapdíh dawá cáacwā Jerusalén tútchina juibínitji jwí juibíat pínah doonádih ítát joyóp tajī. ¹³Pánih joinítji táam néonadih bóodnit, Jesúsdih í ub jwááh dei jūúwúp jī. Pánih jwááh dei jūóhnit, nin pah í níj wéi náacáp jī:

—íDiosdíh jwí wéi naóh jíih! íHosana, nin Dios ā wahni jwiít judíowādih teo wáacni pínah ā tūi jummu naáh! íNin jwí Maáh yoobát tigaá! queé í níj wéi náacáp jī."

¹⁴Burrodih bid junít, Jesús caanjíh ā chúudup jī. Pánih chúudna, Dios naáwátidih naóh yapaniji ā daacátji pahjeh ā yapap jī.

¹⁵"Jerusalén tútchidih moón, ní úmca bojoó. Eneé, ní Maáh burro wūhíhjuh chúudnit, ā jūóhna caá", át níj daacáp tajī. (Zac 9.9)

¹⁶Obohjeéhtih, 'Caán ā daacátji Jesúsdih niijná caá át chājap', jwiít ā bohénit jwí níj jéih jwūhcap jī. Pánih jéihcan yuhna, jeáboó Jesús ā pūuh laab béjat túttimah, ā daacátjidih náhnit, jwí beh joyóp jī. Pánih beh joinít, "Dios naáwátidih ā daacátji biíc yoobó Jesúsdih ā yapap jī", níj jenah joinít, jwí yoób jéihyep jī.

¹⁷Jesús ā ezechah, Lázaroíh bácahdih í yohatji ítmant báadhni ā bac jūúwúchah

* 12.3 Lc 7.37-38 * 12.8 Dt 15.11 * 12.13 Sal 118.25-26

ennitjiboó bitadih it naáwáp tají. ¹⁸Caán doonádih joinítj dawá cáacwá Jesúsdi h̄ jwāáh jūúwáp jī. ¹⁹Páant dawá í bejchah ennit, fariseowā queétjeh nin pah it m̄íc niijjíp w̄t jī:

—iEneé buca! Nihat Jesúshwā m̄ícjeh buu jumna caá í ch̄jap. Queétdih jwī naáwáchah yuhna, í joicán caá. Pánihna, ded pah queétdih jwī jéih chāwácan caá, it m̄íc niijjíp w̄t jī.

Biquína griegowā Jesúsdi h̄ bidat

²⁰Fiesta yeó jáapnadih Diosdi h̄ weñedih jūóhñitjééh, biquína griegowāb̄t it juyúp tají. ²¹Pánih joinít, jwiyééh jumni Felipe pebhna queét it juyúp tají. Felipeboó Galilea baácđih jumni Betsaida w̄t jumni táthđidih bóo ā jumup jī. Caan pébh joinít, nin pah caandíh it niijjíp w̄t jī:

—Jwiít Jesúsdi h̄ jwī eníhna caá, it niijjíp w̄t jī.

²²Páant í niijíchah joinít, Felipe Andrésdi h̄ naáwádih át bejep w̄t jī. Queét chénat pah Jesúsdi h̄ naáwádih í juyúp jī. ²³Páant í naáwáchah joinít, Jesús queétdih nin pah ā niij naáwáp jī:

—Weém nihat cáacwā úud jené wā wunat pínah, wā boo pud jūúwát pínah, jeáboo wā jwúub bejat pínahbut bahñijeh ā jđhna caá. ²⁴Nin naáwátjij yeebđih wā bohébi pna caá. Pácahi tíbđih jwī momat táttimah, áih japih bóo chóo ā moopáh bejna caá. Páant ā moopóchah, áih dítmant bóo tíb āpí chíh jūóhna caá. Pánih chíh, behna, dawá ā quehna caá. Obohjeéhtih, caán tíb moópcan, āta chíhcan tagaá. Chíhcan, caanjééh āta jum tagaá. Pánihat pah, weémboó wunna, wā boo pud jūúwát táttimah, dawá cáacwádih Diosjeéh wā táí jumat túutbipna caá. Obohjeéhtih, wuncan, weemjéh wāta jum tagaá. ²⁵Det í weñat pínahđihjeh jenah joiná, Dios ā weñat pínahboodíh ch̄h̄ijcan, iiguúpna í bejbipna caá. Obohjeéhtih, det í weñat pínahđih joyáh bojnit, Diosdi h̄ táí jepahna, páantjeh ájeéh í táí jum̄bipna caá. ²⁶Det weemđih teo w̄hñit jumíhna, wā naáwátđih táí joyát caá náahap.

Pánih ch̄ajna, queétdih wājeéh í jum̄bipna caá. Pánihna, queét weemđih teo w̄hñitđih búdí oina, wā ípbut ájeéh ā táí jum̄at túutbipna caá, Jesús ā niijjíp jī.

Jesús ā wunat pínahđih ā naáwát

²⁷“Buu búdí wā jígahna caá. Ľwā ípđih ded pah tigaá wā niijbí? ‘Paá, weemđih yeejép ā yapca bojo naáh’, Ľwāta niij tániít? Caandíh páant wā niij úúbhcan caá. Yeejép yapnit, wunat túut niijná, nin baácboo wā jūúwáp jī. Pánihna, buu weemđih chah yeejép buwat ā jum̄bipna caá. ²⁸Paá, buu ded pah wépn̄i ma jum̄atđih cáacwádih ma jéihyanaá”, Diosdi h̄ niijjíp jī.

Páant ā niijíchahjeh, jeámant Dios nin pah áí niijjíp jī:

—Wā wépatđih queétdih wāát jūútp̄ be. Pánihna, wā jwúub jūútp̄bipna caá, páant muntih, ā niijjíp jī.

²⁹Páant ā niijíchah joiná, dawá caanjíh joi n̄hñit, í joí wáhi bejep jī. Pánih joí wáhi bejnit, nin pah í niijjíp jī:

—Énoh niít páant yáani, biquína í niijjíp jī.

—Ángel Jesúsdi h̄ naóhna caá ā ch̄jap, bita í niijjíp jī.

³⁰Queét páant í niijíchah joinít, Jesúsboó nin pah ā niijjíp jī:

—Jeámant wéheni wíh pínah niican, weém Dios ā wáhi wā jum̄atđih yeéb n̄i jéihyat pínah niijná, páant áí niijjíp be.

³¹Buu nin baácđih moón yeejép wā í yeej ch̄aj̄at j̄iib wā íp queétdih ā peéh ch̄aj̄bipna caá. Queétdih w̄tni nemépwā í maáhdihbut ā yohbipna caá.

³²Weemđih cruzboó péoh dodhñit í mawachah, dawá cáacwā wíh wā pínah wā ch̄aj̄bipna caá, Jesús ā niijjíp jī.

³³Páant niijná, ded pah ā wunat pínahđih Jesús cáacwádih naóhna át ch̄aj̄ap tají. ³⁴Páant ā niijíchah joinít, cáacwāboó caandíh nin pah í niij úúbh joyóp jī:

—Dios naáwátđih daácnitji nin pah it niij daacáp tají: ‘Dios ā wáhi Cristo páantjeh ā jum̄bipna caá’, it niij daacáp

* 12.24 Mt 10.38; 16.24; Mr 8.34; Lc 9.23 * 12.25 Mt 10.39; 16.25; Mr 8.35; Lc 9.24; 17.33

tají.* ¿Páant í níj daacáchah, meém nihát cáacwā úud jeñé, Dios ā wahnidih dépanihna pohba cruzboó í péoh dodh mao yohcan níit? ¿Meém Dios ā wahní nihcan níit? Í níjíp jī.

³⁵Páant í níjíchah joinít, Jesús queétdih nin pah ā níj jepahap jī:

—Weémboó baabát panihni ded pah wā íp ā jumatdih yeebdíh wā jéihyana caá. Obohjeéhtih, maátcanbitjeh níjeéh wā jumbipna caá. Pánihna, túi jumat túut níjíná, yeebdíh wā bohéátjidih ní quíib bũdcá bojoó. Ded dupánapboó jib bejni dedboó ā bejat pínahdih ā en jucán caá. ³⁶Pánihna, weém baabát panihni wā jumuchah, bũ wā bejat pínah játih weemdíh ní jepahaá. Pánih jepahna, baabátboó jumnit panihnit wíhíh wā ní jumbipna caá, ā níjíp jī.

Páant níj naóh péanit, jwítdih ā numah bac bejep jī. Pánih bac bejnit, queétdih ā jwei béjep jī.

Judíowá Jesúsdihi í náahcat

³⁷Dawá láa Dios ā wēpatjīh Jesús queétdih ā chāj júutuchah yuhna, dawá jwí déewā caandíh í joíhcap jī. ³⁸Dios naáwátidih naóh yapani Isaías ā naáwátjī pahjeh queét í chājap jī. Nin pah át níj daacáp tají:

“Maá, ma naáwátidih wā bohénachah yuhna, cáacwā í joíhcan caá. Ma wēpatjīh queétdih wā chāj júutuchah yuhna, ‘Caán naáwát yoobópdihi nihcan caá’, í níj jenah joiná caá”, Isaías át níj daacáp tají. (Is 53.1)

³⁹Páant í joíhcat ennit, Dios queétdih ā jéihyat túutcan caá. Caandíhbut Isaías nin pah át níj daacáp tají:

⁴⁰“Jéih encannit panihnit Dios queétdih át chājap wut jī. Pánih chājnit, ā naáwátidih queétdih át jéihyat túutcap wut jī. Pánihna, ā wēp chāj júutadidih enna yuhna, í beh encan caá. Á bohéátidih joiná yuhna, í beh joicán caá. Á bohéátidih jéihna nihna, í yéej chājatidih íta cádahji tagaá. Páant í

cádahachah, queétdih Dios āta túi úbji tagaá”, Isaías át níj daacáp tají. (Is 6.10)

⁴¹Páant níj daácna, Isaías Cristo ā wēpat, búdí ā yeh iigátidihbut enniiji jumna, ded pah Cristo ā yapat pínahdih naóh daácna át chājap wut jī.

⁴²Obohjeéhtih, dawá cáacwā, biquína jwí maátatub “Caán Dios ā wahní Cristo yoobát caá”, Jesúsdihi í níj jenah joyóp tají. Páant níj jenah joiná yuhna, queét fariseowádihi úumna, bita “Jesúsjeéh wā waadáp be”, í níj naáwíhcap wut jī. Páant í naáwáchah nihna, jwí míic wáacat mũná fariseowáboó queétdih íta waadát túutjican tagaá. ⁴³Queétdih Dios ā wēi naáwátidih náahna yuhna, cáacwáboó í weñatdih chah í bidip wut jī. Pánihna, queét “Weém Jesúsíh caá”, bitadidih í níj naáwíhcap wut jī.

Jesús ā naáwátidih í joíhcat jīb peéh chājat ā jumat

⁴⁴Túttimah, Jesús cáacwádihi nin pah túbit ā níj íaac naáwáp jī: “Ded weemdíh jepahni weemdíhjah pohba jepahna ā chājcan caá. Weemdíh wahnidihbut ā jepahna caá. ⁴⁵Ded weemdíh enni weemdíh wahnidihbut ā enna caá. ⁴⁶Ded dupánapboó jumniiji, weemdíh jepahna, baabát panihhipboó ā jwíub jumat pínah níjíná, weém baabát panihni nin baácboó wā jūwúp jī. ⁴⁷Obohjeéhtih, ded wā naáwátidih joiná yuhna, ā jepahcah, weémboó wā peéh chājcan níit. Nin baácdih moón weemdíh jepahcannitdih peéh chājadidih jūóhna wā chājcan jī. Obohjeéhtih, iiguípná bejnit déedidih túi úbat túut níjíná, wā jūwúp jī. ⁴⁸Ded weemdíh náahcanni, wā naáwátidihbut joíhcannidih peéh chājat ā jumbipna caá. Wā naáwátidih í joíhcatjī jīb péeni yeó jáapdihi wā ípboó queétdih ā peéh chājipna caá. ⁴⁹Weém wā jenah joyátjeh yeebdíh naóhna wā chājcan caá. Wā íp weemdíh wahniboó ded pah wā naáwát pínahdih ā naáwát túutna caá. Pánihna, wā naáwátboó ā naáwátjeh tígáa. ⁵⁰Ded ā naáwátidih joí waadána, wā ípjeéh páantjeh ā túi jumbipna caá.

* 12.34 Sal 110.4; Is 9.7; Ez 37.25; Dn 7.14

Pánihna, wā íp ā naáwát t́t́tatdihjeh tigaá, yeebdíh wā naáwáp”, Jesús queétdih ā niijíp j́i.

Jesús ā bohénitíh jí́tchanadih ā chocat

13 ¹Pascua yeó jáapna pínah játihbit, Jesús nin baácdih cádahnit, ā íp pehbboó ā bejat pínah bahni ā júhdatdih átát jéihyep tají. Áihwá nin baácdih moondíh búdí oina, queétdih ā oi cádahcap j́i. Pánihna, ā oyatdih júatna, áihwádhíh ā wun wúhup j́i.

²Caan chéi Jesús jwiítidih ā numah jeéméchah, Jesúsdi h eníhcannitdih ā naáwát pínah niijná, Judas, Simón Iscariote wúáhdih neméboó át waoe dée tají. ³Dios pebhmant ā júáwátjídih, ā jwúub púuh laab béjat pínahdihbut Jesús átát jéihyep tají. Á íp caandíh chah maáh ā waadaát pínahdihbut átát jéihyep tají. ⁴Pánih jéihna, jwíjeéh jeémp lajniji ñah ñuhnit, áih yégueh jih bóo chóodih too ñugnit, jóp wiwat pínah yégueh chóojih chúhilit yoób ā chéwep j́i. ⁵Chéo péanit, pamapdíh mah puoh yacnit, jwíih jí́tchanadih ā choc jwíhip j́i. Pánih chocnit, ā chéó búadhni chóojih jwíih jí́tchanadih ā jóp wiwip j́i.

⁶Pánihna, biquínadih choc péa bejnit, Simón Pedro pebhna ā juibínap j́i. Áih jí́tchanadih chocat t́t́t ā chájachahjeh, Pedroboó caandíh nin pah ā niijíp j́i:

—¿Maá, wíih jí́tchanadih chocodih júóh níit ma chájap? ā niijíp j́i.

⁷—Weém butéh yeebdíh ded pah wá chocatdih ma jéih jwuhcan yuhna, t́ttimah ma jéihbipna caá, Jesús caandíh ā niijíp j́i.

⁸—Obohjeéhtih, wíih jí́tchanadih meemdíh wá chocat t́t́tucan caá, Pedro ā niijíp j́i.

—Meemdíh wá chocchah, wíih ma nihcan níit, Jesús caandíh ā niijíp j́i.

⁹—Pánihna, Maá, wíih jí́tchanadihjih nihcan, wíih téihyanadih, wíih wao dáhdihbut ma chocoó bácah, Pedro ā niijíp j́i.

¹⁰—Ded jééhna, nihát áih bácahdih ā t́i chocna caá. Caandíh chéne jwúub chocat ā náahcan caá. Áih jí́tchanadihjih chocat caá náahap. Pánihna, yeebboó jéehnit panihnit ní j́umúchah yuhna, bíic níjeéh j́umni jéehcanni panihni ā yéejatdih cádahcanni ā j́umna caá, Jesús Pedrodi h ā niijíp j́i.

¹¹Páant niijná, Jesús caandíh eníhcannitdih duó wáini pínahdih jéihnit, jwiítidih páant át niijíp tají.

¹²Jwíih jí́tchanadih choc péanit, áih yégueh chóodih jwúub ñonít, ā lajapjina ā jwúub júi lajap j́i, páant mantih. Pánih jwúub júi lajnit, nin pah jwiítidih ā níj naáwáp j́i:

—¿Butéh yeebdíh wá chocatjidi h ní jéih níit? ¹³Yeéb weemdíh ‘Bohéní’, niijná, ‘Maá’, niijná, yoobópdih níj t́gaá ní chájap. Weém yeebdíh bohéni, ní Maáh yoobát t́gaá. ¹⁴Páant yeebdíh bohéni, ní Maáh j́umna yuhna, teo wáhnit ípí chájat pah níih jí́tchanadih wá chocna beé. Páant wá chájachah ennitji j́umna, yeebbát níih jí́tchanadih míic chocat caá náahap. ¹⁵Ded pah níjeéh j́umnitdih ní teo wáacat pínahdih butéh wá júutup be. Pánihna, yeebdíh ded pah wá chájatji pah yeebbát bíic yoobó ní chájaa.* ¹⁶Yoobópdih yeebdíh wá naóhna caá. Ded teo wáhniboó ā maáh chah nihcan caá. Ded ā wahniboó caandíh wahní chah nihcan caá.* Obohjeéhtih, yeéb chah j́umna yuhna, yeebdíh teo wáhní pah níih jí́tchanadih yeebdíh wá choc wáuhup be. Pánihna, wá chájatjidi h ennitji bíic yoobó ní chájaa. ¹⁷Páant wá watatdih jéihnit, chájna, búdí ní wéibipna caá.

¹⁸“Obohjeéhtih, yeéb nihatdih páant wá niijcán caá. Det wá ñonitdih wá t́i jéihna caá. Dios naáwátidih naóh yapanit í daacátji bíic yoobó ā yapbipna caá. ‘Wájeéh jeémpni h jih t́gaá weemdíh yeejép ā chájipna caá’, ít níj daacáp tají.* ¹⁹Páant ā chájat pínah játih yeebdíh naóhna caá wá chájap, páant ā yapat t́ttimah, ‘Caán Jesús, Dios ā wahní Cristo ta t́gaá’, ní níj jéihyat pínah

* 13.12-15 Mt 20.28; Mr 10.45; Lc 22.27 * 13.16 Mt 10.24; Lc 6.40; Jn 15.20

* 13.18 Sal 41.9

nijná. ²⁰Nindihbut yoobópdih yeebdíh wā naóhna caá. Wā wahnidih ded tui wēi jwāáhni, weemdíhbut ā tui wēi jwāáhna caá. Pánih weemdíh wēi jwāáhni, weemdíh wahnijidihbut ā wēi jwāáhna caá”, Jesús jwiítidih ā niijíp jī.*

**Judas ā duó wáyat pínahdih
Jesús ā naáwát**

(Mt 26.20-25; Mr 14.17-21; Lc 22.21-23)

²¹Páant niij péanit, Jesús búdí ā jígahap jī. Pánih jígahnit, jwiítidih nin pah ā niijíp jī:

—Yoobópdih yeebdíh wā naóhna caá. Biíc ñi cáth jūmni weemdíh enfhcannitdih ā duó wáibipna caá, ā niijíp jī.

²²Páant ā niijíchah joinít, caandíh júutni pínahdih jéihcan, jwiítjeh jwí míc en jáhanap jī. ²³Weém, Jesús búdí ā oiniboó caandíh wā dodh jáah lajap jī.

²⁴Pánihna, Simón Pedro weemdíh áih téihyajíh jenah júutnit, nin pah ā niijíp jī:

—Caandíh ma wábh joí enee dedna tígaa caandíh duó wáini pínah, weemdíh ā niijíp jī.

²⁵Páant ā niijíchah joinít, weemboó Jesúsdi h jwáub dodh jáah lajnit, caandíh nin pah wā niij wábh joyóp jī:

—¿Maá, deddih niij tígaa ma chá? wā niijíp jī.

²⁶—Nin pandih dajnit wā neéh wúhni pínah weemdíh enfhcannitdih ā duó wáibipna caá, weemdíh Jesús ā niij jepahap jī.

Páant niij péanitjeh, pan dahdih daj wá neéhni, Judas, Simón Iscariote wúúhdih ā wúhup jī. ²⁷Páant Jesús ā daj neéh wúhni pandih Judas ā jeéméchah, nemépbóó caandíh yeejéj át chájat túutur tají. Pánih jéihna, Jesús caandíh nin pah ā niijíp jī:

—Ded pah ma chájat pínahdih waícanjeh chájadih ma bejeé, Judasdi h ā niijíp jī.

²⁸Páant Judasdi h ā niijíchah joiná yuhna, jwiít ni h jwí jéihcap jī. ²⁹Pánih jéihcan, “Judas jwíih dinerodih en daoní ā jumuchah, jwí jeémát pínahdih jíh

chájat túutna, Jesús páant ā niij wahna caá”, biquína it niij jenah joyóp ta yuh jī. Bitaboó “Moh yéejnitdih dinero wáhat túutna caá át chájap”, it niij jenah joyóp tají. ³⁰Pánihna, Jesús ā neéh wúhni pandih jeémp péanit, Judas ā bac bejep jī. Páant ā bac bejehchah, chei wáat jumup jī.

Jesús jáap wutatdih ā naáwát

³¹Páant Judas ā bac bejat túttimah, Jesús jwiítidih nin pah ā niij naáwáp jī:

—Buu láa bácah weém ni h cáacwá úud jeñé wā íip ā wahní wā jumatdih, wā wēpatdihbut cáacwádi h ā jéihyabipna caá. Caán ā wēpatdih weembát queétdih wā jéihyabipna caá. ³²Páant wā íip ā wēpatdih wā jéihyanachah, caán wā wēpatdihbut waicanjeh ā jéihyabipna caá. ³³Yeeb wā weh panihnit, nindihbut wā naáwáchah ñi tui joyoó. Daocánni yeó jáapbitjeh níjeéh wā jum jwáhbipna caá.

Wā bejat túttimah, weemdíh búdí ñi bidbipna caá. Jwí déewádi h wā niijátji pah yeebdíhbut biíc yoobó niijnít, ‘Wā bejep pínahna yeebboó ñi jéih bejcan caá’, wā niijná caá.* ³⁴Pánihna, jáap wutatdih yeebdíh wā naóhna caá.

Yeebjéh ñi míc oyoó. Yeebdíh wā oyatji pah, yeebjéhbut ñi míc oyoó.* ³⁵Páant ñi míc oyochah ennit, wáíhwá ñi jumatdih bita í jéihbipna caá, Jesús jwiítidih ā niijíp jī.

**Pedro ā yeeat pínahdih
Jesús ā naáwát**

(Mt 26.30-35; Mr 14.26-31; Lc 22.31-34)

³⁶Páant ā niijíchah joinít, Simón Pedro Jesúsdi h nin pah ā niij wábh joyóp jī:

—¿Maá, dedboo tígaa ma bejbi, páant ma niijná? ā niijíp jī.

—Wā bejat pínahna wájeéh ma jéih bej jwáhcán caá. Obohjeéhtih, buu jéih bejcan yuhna, túttimah wā pebhna ma juibí bipna caá, Pedrodi h Jesús ā niijíp jī.

³⁷—¿Maá, dépanih tígaa buu majeéh wā jéih bejcan? Weemdíh í mawachah yuhna, meemdíh wā cádahcan níit, Pedro ā niijíp jī.

* 13.20 Mt 10.40; Mr 9.37; Lc 9.48; 10.16 * 13.33 Jn 7.34 * 13.34 Jn 15.12,17; 1 Jn 3.23; 2 Jn 5

³⁸—Páant niijná, ¿weemdíh wapna, ma wun wáhmni nanít? Obohjeéhtih, yoobópdih weemdíh wá naóhna caá. Mújbai á ewat pínah játih, ‘Caandíh wá jéihcan caá’, bíc peihcanni láa pohba bitadíh ma níj yeebipna caá, Jesús Pedrodíh á niijíp jí.

Jesús Dios pebhna bejni namá panihni á jumát

14 ¹Táttimah, Jesús jwiítidih nin pah á niijíp jí: “Butéh wá niijátidih náhninit, ní jígahca bojoó. Wá ípdih táí jenah joinít, weemdíhbut bíc yoobó ní táí jenah joyoó. ²Wá íp á jumapboó dawá jumát pínah múná á jumna caá. Pánihna, caanná juibínit, ní jumát pínahdíh ámohodíh wá bejbipna caá. Wá naáwát pah bíc yoobó á wihcah, páant yeebdíh wáta níj naóhcan tagaá. ³Yeéb ní jumát pínahdíh táí ámoh péanit, yeebdíh ubudíh wá jwáub dei jüóhbiipna caá, wájeéh ní jumát pínah niijná. ⁴Wá bejat pínah namá panihnidíh ní jéihna caá”, á niijíp jí.

⁵—Maá, deh ma bejat pínahboó jwiít jwí jéihcan caá. ¿Ded pah tigaá caán namá panihnidíh jwí jéihbi? Tomás Jesúsdih á níj wáubh joyóp jí.

⁶—Weemjéh tigaá namá panihni wá jumap, wá íp pebhboó ní juibíat pínah niijná. Weemjéh mun tigaá yoobópdih naóhni. Jeáboó juibínit pínahdíh weemjéh mun tigaá caolíh booani wá jumna caá. Caolíh wá booanit mífíjeh wá íp pebhboó páantjeh í jumbiipna caá.* ⁷Weemdíh táí jéihna nihna, wá ípdihbut níta jéih tagaá. Pánihna, buu caandíh ennit panihnit jumna, caandíh ní táí jéihna caá buca, Jesús jwiítidíh á niijíp jí.

⁸Páant á niijíchah joinít, Felipe jwáuh nin pah á niijíp jí:

—Maá, jwí ípdih jwiítidíh ma júutá. Páant bóojeh tigaá jwí eníhip, á niijíp jí.

⁹—¿Felipe, maátápdíh wájeéh jumna yuhna, weemdíh ma táí jéih jwáuhcan níít? Weemdíh enna, wá ípdihbut maát enep be. ‘Jwí ípdíh ma júutá’, niijná, ¿dépanih tigaá weemdíh páant ma níj?

¹⁰Weém wá ípíh chénewá jumna yuhna, bícíjeh caá. ¿Páant caán yoobópdíh nihcan caá’, ma níj jenah joyááh? Yeebdíh naóhna, wá jenah joyátíh wápi naóhcan caá. Wá íp á naáwát túutuchahjeh, wá naóhna caá. Pánihna, caán bícdíh jumna, á wépatíh wápi cháí júutna caá. ¹¹Weém wá ípíh chénewá jumna yuhna, bícíjeh caá. Caán ‘Yoobópdíh tigaá’, níj jenah joyáán, wá íp á wépatíh wá cháí júutatíjdíh náhninit, bícíjeh jwí jumadíh ní jéihbiipna caá. ¹²Yoobópdíh yeebdíh wá naóhna caá. Det weemdíh táí jenah joinít wá cháíat pah bíc yoobó í chájbipna caá. Buu wá íp pebhboó jwáub bejna, wá cháíat chah pohba wá íp á wépatíh í chájbipna caá. ¹³Weemdíh táí jenah joinít í wáubát pah wá chájbipna caá, wá íp á wépatíh cáacwá í jéihyat pínah niijná. ¹⁴Pánihna, weemdíh jepahnit ní jumuchah, dedé ní wáubát bíc yoobó wá chájbipna caá, Jesús á niijíp jí.*

Táini Espíritu á wahat pínahdíh Jesús á naáwát

¹⁵“Yeéb weemdíh oina, wá wutatdíh ní jepahbiipna caá.* ¹⁶Yeebdíh Táini Espíritu á wahat pínah niijná, wá ípdíh wá wáubhbiipna caá, wá wihcah, níjeéh á jumát pínah niijná. Caán Táini Espíritu yeebdíh teo wáacniboó yoobópdíh naóhni jumna, yeó jáap jumát pah níjeéh á jumbiipna caá. ¹⁷Nin baácdíh moón wá ípdíh jéihcannit, caán Táini Espíritudíhbut í jéihcan caá. Pánih jéihcan, caandíh í táí jenah joyáán caá. Obohjeéhtih, caán níjeéh jumni pínahdíh yeébbóo ní táí jéihbiipna caá.

¹⁸“Yeebdíh wá éemp bejcan níít. Pánih éemp bejcan, caán Táini Espíritu yeebdíh á juyáchah, weém wá jumát pahjeh muntíh níjeéh á jumbiipna caá. ¹⁹Wá bejat pínah bahníjeh á júdhna caá. Páant wá bejat táttímah, nin baácdíh moón weemdíh jepahcannit, weemdíh í jwáub encan níít. Obohjeéhtih, yeébbóo weemdíh ní enbiipna caá. Weém jwáub boo pud júóhni wá jumát pah muntíh,

* 14.6 Mt 11.27; Jn 1.18; 6.46; Hch 4.12 * 14.13-14 Mt 7.7-11; Lc 11.9-13; Jn 15.7,16; 16.23-24; 1 Jn 3.21-22; 5.14-15 * 14.15 Dt 6.4-9; 11.1

yeebbát jwáub boonit Diosjeéh páantjeh ñi jumbipna caá. ²⁰Jwí wahní Túini Espiritu yeebdíh joinít, wá íp bícdih wá jumadíh yeebdíh á túi jéihyabipna caá. Pániha, wá íp bícdih wá jumát pah muntih, yeéb bícdih wá jumadihbut á jéihyabipna caá. ²¹Ded wá wutatdih jói waadáni weemdíh oini caá. * Weemdíh oinidih wá ípbut á oibipna caá. Weembát caandíh bíc yoobó wá oibipna caá. Páant weemdíh oinidih ded pah wá jumadih wá túi jéihyabipna caá”, Jesús jwiútdih á nijíp jí.

²²Jwíjeéh jumni bíh Judas, Iscariote nihcanni, Jesúsdih nin pah á nijí wábh joyóp jí:

—¿Maá, dépanihna jwiútdihjeh páant ma jéihyana yuhna, bita meemdíh jepahcannitboodíh ma jéihyabican? á nijíp jí.

²³—Ded weemdíh oini wá naáwátidih á túi jói waadábipna caá. Páant á túi jói waadánachah, wá íp caandíh á oibipna caá. Pánih oina, wá íp bícdih áih caolihdih waadní, ájeéh jwí jumbipna caá. ²⁴Obohjeéhtih, weemdíh oicanniboó wá wutatdih á jepahcan caá. Páant á jepahcah, ájeéh jwí wihcan níít. Butéh ñi joiní weemjéh wá naáwát pohba nihcan caá. Obohjeéhtih, wá íp weemdíh wahnijeh páant á naáwát túttur be.

²⁵“Níjeéh jum jwuhna, páant yeebdíh wáát nijí naáwáp be. ²⁶Obohjeéhtih, túttimah wá ípdih wá wábhúchah, Túini Espiritudih yeebdíh á wahbipna caá. Pániha, caán Túini Espiritu yeebdíh teo waacni jumna, á túi bohébiipna caá. Pánih bohénit, nihát yeebdíh wá naáwátjidih á náhniabipna caá.

²⁷“Yeebdíh wá túi jumát túttina caá. Weém wá túi jumát pah muntih yeebbát ñi túi jumbipna caá. Wá wáhni túi jumát pah nin baácdih moón í jéih wáhcan caá. Pániha, búdí náhni dahwanit, ñi úmca bojóó. ²⁸“Weém wá bej jwahbipna caá. Obohjeéhtih, níjeéh jumát tútt níijná, wá jwáub dei jwóhbiipna caá, páant muntih’, yeebdíh páant wá nijí naáwáchah, níát joiná jíí. Páant wá nijíjchah joinít, weemdíh yoobópdih ñi oina nihna, ñita

wéi tagaá. Wá ípboó weém chah wéjni á jumuchah, ájeéh jumnit, chah yeebdíh wá jéih teo wáacbiipna caá. Páant wá chájat pínahdih jéihna, yeebdíh weñat caá náahap. ²⁹Weemdíh ded pah á yapat pínahdih yeebdíh wáát naóhna jí, wá nijátji bíc yoobó á yapachah, weemdíh túi jenah joinít ñi jumát pínah níijná.

³⁰“Yeebdíh wá míc wéhe jwuhát pínah bahniitjeh á judhna caá. Waícanjeh, nin baácdih moón í maáh, weemdíh yeeyép chájadih á jwóhbiipna yuh caá. Nemépwá í maáh wéjni jumna yuhna, weemdíh á jéih yap yohcan níít. ³¹Obohjeéhtih, weemdíh wá íp á wutat pahjeh wá chájbiipna caá, nihát cáacwá caandíh wá oyatdih í jéihyat pínah níijná. Ñi ñah ñuhú. Chóbe bejjíh”, Jesús jwiútdih á nijíp yuh jí.

Jesús jiwá iguúh páuj panihni á jumát

15 ¹Páant níijná yuhna, nin pah jwiútdih á jwáub nijí bohénap jí, páant muntih: “Weém jiwá iguúh páuj panihni, wá ípboó iguúhadih en daoní panihni, wíh cáacwá iguúh pihna panihnit í jumna caá. ²Quehcanni pihdih iguúhadih en daoní á bóod yohbipna caá. Páant á bóod yohat pah, det weemdíh túi jenah joicannitdih wá íp á yohbipna caá. Ded túi quehni pihboodíh á bóod ámohna caá, dawá á quehat pínah níijná. Páant á chájat pah det wíhwa í náahatdihjeh í chájachah enna, wá íp queétdih á cádahat túttbipna caá, ded pah wá náah yacatboodíh í chájat pínah níijná.

³Yeéboó wá naáwátidih jói jepahnit, bóod ámohni panihnit ñi jumna caá. ⁴Túí bícdih wájeéh ñi jumú. Páant wájeéh ñi jumuchah, weembát yeéb bícdih wá jumbipna caá. Ded iguúh pih áih páujdih túi duuj lájcan, á jéih quehcan caá. Pánihat pah, yeebbát weemdíh túi joicán, wá wépat á wihcah, wá weñat pínahdih ñi jéih chájcan níít.

⁵“Weém jiwá iguúh páuj panihni, yeéboó áih pihna panihnit caá ñi jumup. Ded weemdíh túi joiní wájeéh túí bícdih á jumuchah, weembát ájeéh túí bícdih

* 14.21 Dt 6.4-9; 11.1 * 15.1 Is 5.1-7

wā jum̄bipna caá. Pánih jum̄na, túi quehni pih panihni wā weñat pínahdih ā túi chāj̄bipna caá. Obohjeéhtih, weemdíh joicánnitboó, wā weñat pínahdih ī jéih joichan níft. ⁶Ded wun̄ jwóhni pihdih ā yohat pah, weemdíh cádahni, wājeéh túi jum̄cannidih wā íp ā yohbipna caá. Pánihna, caán yohni iguíf̄ pihna ā diib téhechah, iguíf̄hadih en daoníboó caán tehni pihnadih wao wáacnit, ā cáo yohbipna caá. Páant ā chāj̄at pah, weemdíh cádahnitdih Dios peéh chāj̄na, iiguípna ā yohbipna caá.

⁷“Yeéb weemdíh cádahcan, wā naáwát̄dih túi joiná, ded ní náahatdih ní wúbúchah, bíc yoobó wā chāj̄bipna caá. ⁸Wā weñat pínahdih ní chāj̄achah ennit, ‘Queét̄ Jesúsíh wā caá’, bita ī níj̄ jéihbipna caá. Páant níj̄ jéihnit, wā ípdihbut ī wēibipna caá. ⁹Wā íp̄ weemdíh ded pah ā oyat pah muntih weembút̄ yeebdíh bíc yoobó wā oina caá. Páant yeebdíh wā oyatdih ní túi náhninaá. ¹⁰Wā íp̄ weemdíh ded pah ā wutúchah, caandíh jepahna, ā oyatj̄ih ájeéh wā túi jum̄na caá. Páant wā chāj̄at pah, weem̄ jwáh yeebdíh ded pah wā wutatdih jepahna, wā oyatj̄ih wājeéh ní túi jum̄bipna caá.

¹¹“Páant yeebdíh wā naóhna caá, wājeéh túi jum̄nit, búdí ní weñat pínah níjná. Bainí ní wéican níft. ¹²Nin pah yeebdíh wā níj̄ wutna caá: Yeebdíh wā oyat pahjeh muntih, yeebjéhub̄t̄ ní míc oyoó.* ¹³Ded ā chéendih búdí oina, caanjéh ā wunat pínah tobohohah yuhna, caandíh ā túi teo wáacbipna caá. ¹⁴Ded pah wā wutatdih jepahna, yeebboó wā chéenwā ní jum̄na caá. ¹⁵Wā chéenwā yoobát̄ ní jum̄uchah, ‘queét̄ wā pebh moonjéh caá’, yeebdíh wā níj̄cán caá. Í maáh ded pah ā chāj̄atdih ā pebh moón ī jéihcan caá. Obohjeéhtih, wā chéenwā ní jum̄uchah, ded pah wā íp̄ ā naáwát̄dih yeebboodíh wáat̄ naóh yapanap̄ jī. ¹⁶Yeéb weemdíh ní níocan beé. Obohjeéhtih, weémboó yeebdíh wā níwip̄ jī, wā íp̄íh wā jum̄na, ā wutatdih jepahnit, ní túi chāj̄ cádahcatdih ennit, bitabut Diosdih ī jepahat pínah níjná. Pánih túi

chāj̄ cádahcannit, wíihwā jum̄na, ded pah wā ípdih ní wúbúchah, yeebdíh ā wáh̄bipna caá. ¹⁷Pánihna, nin pah yeebdíh wā jwúb̄ wutna caá: Yeebjéh ní míc oyoó”, Jesús̄ jwiúftdih ā níj̄p̄ jī.

**Jesús̄dih, áihwádihbut
nin baácdih moón ī iiat̄**

¹⁸“Nin baácdih moón yeebdíh ī iináchah, weemdíhbut ī iiat̄jidih ní túi náhninaá. ¹⁹Diosdih jepahcannit ní jum̄uchah nihna, queéjeh ī míc oyat pahjeh, yeebdíhbut̄ ita oi tagaá. Obohjeéhtih, yeéb wā níonit jum̄na, ded pah queét̄ ī chāj̄at pah bíc yoobó ní chāj̄catdih ennit, yeebdíh ī eníhcan caá.* ²⁰Wíihwā jum̄na, weem̄ cháh ní jum̄can caá’, yeebdíh wā níj̄at̄jidih ní túi náhninaá. Pánih weém̄ nump̄ jum̄na, weemdíh yeejép̄ ī chāj̄at pahjeh yeebdíhbut̄ bíc yoobó ī chāj̄bipna caá. Bitaboó wā bohéat̄dih jepahnit, yeebút̄ queétdih ní bohénachah, ī jepahbipna caá.* ²¹Pánihna, nin baácdih moón weemdíh wahnidih ī jéihcat̄ jīb, yeéb wíihwā ní jum̄uchah ennit, yeebdíhbut̄ yeejép̄ ī chāj̄bipna caá.

²²“Queétdih bohénadih wā jwóhchah, weemdíh ī náahcat̄jī jīb queétdih peéh chāj̄at̄ ita wihcan tagaá. Obohjeéhtih, bun̄ queétdih wā bohéat̄ túttimah, ‘Yeejat̄ jīb weemdíh ā wihcan caá’, queét̄ ī jéih níj̄cán caá. ²³Ded weemdíh eníhcanni wā ípdihbut̄ eníhcanni caá. ²⁴Wā íp̄ ā wēpat̄j̄ih cáacwā ī jéih chāj̄ca naáhdih wā chāj̄ jéut̄up̄ be. Páant wā chāj̄ jéut̄cchah, queétdih yeejat̄ jīb ita wihcan tagaá. Obohjeéhtih, wā chāj̄ jéut̄atdih enna yuhna, weemdíh, wā ípdihbut̄ ī eníhcan caá. Páant ī eníhcat̄ jīb, Dios queétdih ā peéh chāj̄bipna caá. ²⁵Pánih eníhcan, Dios naáwát̄dih naóh yapanit̄ ī daacát̄jī bíc yoobó chāj̄na caá ī chāj̄ap̄. ‘Queétdih yeejép̄ wā chāj̄cchah yuhna, weemdíh ī eníhcan caá’, it̄ níj̄ daacáp̄ tajī.*

²⁶“Túttimah, wā íp̄jeéh̄ jum̄ni Túini Espiritudih wā wahbipna caá, yeebdíh ā teo wáacat̄ pínah níjná. Yeebdíh yoobóp̄dih naóhni pínah jum̄na, yeebdíh

* 15.12 Jn 13.34; 15.17; 1 Jn 3.23; 2 Jn 5 * 15.18-19 Jn 17.14-18 * 15.20 Mt 10.24; Lc 6.40; Jn 13.16 * 15.25 Sal 35.19; 69.4

ded pah wā jumatdih ā tūi jéihyabipna caá. ²⁷Cáacwádih wā bohé jwíhichah, yeéb wājeéh níat jumap jī. Pánih wājeéh jumnit, ded pah wā chājatdih ennitji yeeb jwáh bitadih naáwát caá náahap.

16 ¹“Butéh yeebdíh ded pah ā yapat pínahdih wā naáwáp be, caandíh tūi náhnit, bíc yoobó yeebdíh ā yapachah, weemdíh ní cádahcat pínah níijná. ²Túttimah, wíihwā ní jumap jíib, ní maáta jwí míc wáacat múná ī waadát tútcan níit. Bíh lāa ded yeebdíh mao yohna, ‘Dios ā náahat pah chájna caá wā chájap’, ā níj jenah joibípna yuh caá. ³Wā ípdih, weemdíhbut ī jéihcat jíib páant ī chájipna caá. ⁴Pánihna, yeebdíh yeejéj ā yapachah enna, ‘Páant ā yapat pínahdih Jesús jwiítidih ā naáwáp jī’, ní níj náhnibipna caá. Caandíh ní náhnit pínah níijná, buu yeebdíh wā naóhna caá”, Jesús jwiítidih ā níijp jī.

**Túini Espiritu ded pah
ā teo wáacat pínah**

“Weemdíh ní jwíh pej jum lāa weémboó níjeéh jumna, butéh wā bohéatdih yeebdíh wā naóh jwuhcap jī. ⁵Obohjeéhtih, buu weemdíh wah deyani pehbhoó wā jwúub béjat pínah bahnijeh ā judduchah, yeebdíh páant wā naóhna caá. Obohjeéhtih, ‘¿Dee tígáa ma bejbi?’ weemdíh ní níj wábh joicán caá. ⁶Wā púuh laab béjat pínahdih yeebdíh wā naáwáchah, búdí ní jígha caá. ⁷Obohjeéhtih, túbit ní jíghacat pínah níijná, yeebdíh yoobópdih wā naóhna caá. Wā púuh laab béjat túttimah, yeebdíh teo wáacni pínah, Túini Espiritudih wā wahachah, chah ní tūi jumbipna caá. Wā púuh laab béjcah, yeebdíh teo wáacni pínahboó āta jūóhcan tagaá. ⁸Wā wahachah, caán dei júiná, nin baácdih moón ī yéejatdih queétdih ā jéihyabipna caá. Ded pah tūi chājat pínahdihbut ā jéihyabipna caá. Yéej chājnitdih ī yéejat jíib Dios ā peéh chājat pínahdihbut caán ā jéihyabipna caá. ⁹Caán Túini Espiritu cáacwádih nin pah ā níj jéihyabipna caá: ‘Jesucristodih ma jepahcat caá ma yéejat’, ā níjibipna caá. ¹⁰Wā íp pehbhoó wā jwúub bejat túttimah, cáacwā weemdíh ī jwúub

encah, Teo Wáacni jwuh queétdih ā bohéipna caá, ded pah ī tūi jumap pínahdih ī jéihyat pínah níijná. ¹¹Nin baácdih moón ī maáh nemépdih Dios ā peéh chājat pínahdih Túini Espiritu ā jéihyabipna caá.

¹²“Búdí caá yeebdíh wā naáwát pínah ā judhdup. Obohjeéhtih, buu caandíh wā naáwáchah, níta beh joicán tagaá.

¹³Páant wā naóhcah yuhna, Túini Espiritubó yeebdíh ā jéihyabipna caá. Caán ā jenah joyátjeh ā naóhcan níit. Obohjeéhtih, wā íp caandíh ā naáwát tútuchah, yeebdíh yoobópdih ā naóh beedáipna caá. Túttimah ded pah ā yapat pínahdihbut ā bohéipna caá. ¹⁴Pánihna, ded pah wā jumatdih ā naáwáchah jointí, yeéboó weemdíh búdí ní wéibipna caá. ¹⁵Wā íp ā jéihyat pah, weembút wā jéihna caá. Páant tígáa ‘Túini Espiritu ded pah wā jumatdih ā jéihyabipna caá’, yeebdíh wā níj naáwáp be.

¹⁶“Bahnitjeh weemdíh ní en jwuhbipna caá. Obohjeéhtih, maátcanjeh encannitji, weemdíh ní jwúub enbipna caá, páant muntih”, Jesús jwiítidih ā níijp jī.

**Buu jíghahnit, túttimah wéinit
jwí jumap pínah**

¹⁷Páant ā níjíchah jointí, jwiít biquína nin pah jwí míc níj wábh joyóp jī:

—Bahnitjeh weemdíh ní en jwuhbipna caá. Obohjeéhtih, maátcanjeh encannitji, weemdíh ní jwúub enbipna caá, páant muntih’, níijná, ¿ded pah níj tígáa páant ā níj? ‘Wā íp pehbhoó wā jwúub púuh laab béjipna caá’, níijná, ¿ded pah ā chājat pínahdih níj naóh tígáa jwiítidih páant ā níj?

¹⁸“Bahnitjeh’, ‘maátcanjeh’, níijná, ¿ded pah níj tígáa ā chā? Obohjeéhtih, jwí beh joicán caá, jwí míc níjip jī.

¹⁹Páant níijnit, caandíh jwí wábh joíhatdih jéihna, Jesús nin pah jwiítidih ā níj naáwáp jī:

—Bahnitjeh weemdíh ní en jwuhbipna caá. Obohjeéhtih, maátcanjeh encannitji, weemdíh ní jwúub enbipna caá páant muntih’, ¿wā níjátidih beh joicán, wábh joíh níit ní chájap?

²⁰Yoobópdih yeedb́h wā naóhna caá. Wā wunat pínah bahnitb́tjeh ā judhna caá. Pánihna, wā wunuchah enna, búdí nī jūib́pna caá. Obohjeéhtih, weemd́h enhcanitboó búdí ī wēibpna caá. Yeéboó búdí j́gahnitj́, túttimahb́tjeh nī jwúub wēibpna caá. ²¹Nin pah ā jumna caá: Yad wili mi weép jáana, yeejép mi yapat pínah ā jumuchah, búdí mi j́gahna caá. Pánih j́gahna yuhna, mi weép jumat túttimah, caántdih ā tabatj́dih náhnican, wébit ā cáac jumuchah ennit, búdí mi wēina caá. ²²Páant mi jumat pah tigaá buu yeé nī j́gahb́pna caá. Túttimah, yeedb́h wā jwúub enechah, yeebbát búdí nī jwúub wēibpna caá. Páant nī weñechah, det yeedb́h ī jéih jwúub j́gahacan níit.

²³“Weemd́h nī jwúub enni yeó jáapdih túi beh joinít jumna, weemd́h nī úbbh joicán níit. Yoobópdih yeedb́h wā naóhna caá. Wíihwā jumna, wā wēpatj́h nī úbbúchah, wā íp yeedb́h ā jepahb́pna caá. ²⁴Játih wā ípdih páant nī úbbh jwuhcap j́. Obohjeéhtih, yeedb́h wā wun wúhat túttimah, wíihwā jumna, páant caand́h nī úbbú. Páant nī úbbúchah, nī úbbátb́dih ā wúhb́pna caá, búdí nī weñat pínah niijná.*

Jesús yéejatdih yap yohni ā jumat

²⁵“Játih wā jenah joinít naáwátj́hkeh yeedb́h wā bohénachah, nī túi beh joicán beé. Obohjeéhtih, wā boo pud j́úwát túttimah, ded pah jwí íp ā jumatdih túi buocannijeh wā naóhb́pna caá. ²⁶Caán láa wíihwā jumna, wā wēpatj́h yeebjéh wā ípdih nī úbbhb́pna caá. Weéboó níih pínahdih wā jwúub úbbh wúhcan níit. ²⁷Pánihna, wā íp pebhmant jūóhni wā jumuchah ‘Yoobópdih tigaá’, níj jenah joinít, weemd́h nī oyochah ennit, wā ípboó yeedb́hbut ā oibpna caá. Páant ā oyatdih jéihnít, yeebjé caand́h nī úbbhb́pna caá. ²⁸Weém wā íp bíicdih jumni nī nin baácboó wā jūúwáp j́. Pánihna, buu nin baácboó jum jwuhni wā íp pehbboó wā jwúub páuh laab béjb́pna caá”, Jesús jwíitdih ā niijp j́.

²⁹Páant ā niijchah joinít, jwíit caand́h nin pah jwí niijp j́:

—Buu bácah ma jenah joinít naáwátj́hkeh bohécan, buocannijeh jwíitdih ma naóhna caá. ³⁰Pánihna, meém jéih beedáni ma jumatdih buu jwuhna jwí jéihna caá. Ded meemd́h bohéni pínah ā wihcan caá. Páant tigaá Dios pebhmant jūóhni ma jumatdih jwí túi jéihna caá, jwí niijp j́.

³¹—Buu ‘Yoobópdih Dios pebhmant jūóhni tigaá át jumap’, úni níj níit buca? ³²Páant niijnítj́i yuhna, buu cheijeh nihah yeé nīih muunáboó nī jwéi jwúub bejehah, weém bíicjeh wā cháob́pna caá. Obohjeéhtih, bíicjeh pohba wā nihcan níit. Weemd́h nī yoh bejehah yuhna, wā ípboó wájééh ā jumb́pna caá. ³³Páant wā yapat pínah játih yeedb́h naóhna caá wā chájap, j́gahcanjeh nī túi jumap pínah niijná. Nin baácboó nī jum jwuhuchah, Diosdih náhcannit yeedb́h yeejép ī chájb́pna caá. Obohjeéhtih, nin baácđih moón ī yéj chájatdih yap yohni wā jumatdih jéihnít, búdí nī weñéé, jwíitdih ā niijp j́.*

Jesús áih pínahdih Diosdih ā úbbát

17 ¹Páant níj péanít, Jesús jeáboó chéi ennit, Diosdih nin pah ā níj úbbúp j́: “Paá, buu ma niijátj́i pah tih weemd́h ī mawat pínah ā júná caá. Pánihna, weém ma wúh wā jumatdih cáacwádih ma jéihyanaá, weemd́h ī weñat pínah niijná. Páant ma chájachah, weem jwúh meemd́hbut queéđih wā weñat túutb́pna caá. ²Nihat cáacwá ī maáh weemd́h ma waadánap be. Pánih maáh jumna, det weemd́h ma wúhntidih majeéh wā jumap túutb́pna caá. ³Det meém Dios bíicjeh jumnidih jéihna, weém ma wahnidihbut jéihna, japboó jwíjééh bíicđih páantjeh ī túi jumb́pna caá.

⁴“Nin baácboó jum jwuhna, ma chájat túutatj́dih wā cháj péanap be. Pánih chájna, ded pah ma jumatdih cáacwádih wā túi jéihyanap be, meemd́h ī weñat pínah niijná. ⁵Pánihna, nin baácđih jwí

* 16.23-24 Mt 7.7-11; Stg 1.5-6 * 16.33 Ro 8.37; 2Co 2.14; Ap 3.21; 5.5

chājat pínah játih, majeéh bícdih jum jwuhna, bíc yoobó jwípí wutat pah muntih, weemdíh ma jwúb maáh waadánaá.

**Jesús ā bohénitíh pínahdih jwuh
Diosdih ā úbát**

6“Paá, nit wíhwādih jwuh wā úbhna caá. Nit weemdíh ma wúhniit nin baácboó yeejépwā cātíh ī jumuchah yuhna, queédih ded pah ma jumatdih wā jéihyanap be. Queét míhwādih weemdíh ma wúhuchah, queét ma wutat pah ī chājna beé. 7-8Weemdíh ma naáwátjidih queédih wā bohénachah, ī tūi wēi joyóp be. Pánih wēi jointí, ma pebhmant jóhni wā jumatdih, ma wahní wā jumatdihbut ī tūi jéihna caá. Pánih jéihniit, ‘Nihat jwiítidih ā bohéátjidih, nihat ā chāj jútutjidihbut Dios át wutap taga’, ī níj jéihna caá.

9“Paá, nit wā bohénitíh pínahdihjeh úbhna caá wā chājap. Bitahí pínahdih úbhna wā chāj jwuhcan caá. Nit weemdíh ma wúhniit míhwā caá ī jumap. Íih pínahdih meemdíh úbhna caá wā chājap. 10Nit wíhwā nihat míhwā mun tigaá. Pánihna, míhwāboó wíhwā mun tigaá. Weemdíh jepahna, ī tūt nūmúchah ennit, bitabut weemdíh ī wéina caá.

11“Būū nin baácboó wā chāocán níit. Ma pebhna jwúb bejat tūt caá wā chājap. Páant ma pebhna wā jwúb bejehchah yuhna, nit weemdíh ma wúhniit nin baácboó ī chāobípna caá. Paá, meém túini jumna, nit weemdíh ma wúhniitdih ma wēpatjéh, weemdíh ma wúhni wēpat bícdih, ma tūi en dawaá. Páant ma tūi en dawáchah, jwiít tūi bícdih jwí jummat pah muntih nitbut tūi bícdih ī jumbipna caá. 12Íjeéh jum jwuhna, ma wēpatjéh nitdih wā tūi en dawáp be, bícboó ā būdcát pínah níijná. Obohjeéhtih, ma naáwátidih ī daacátjé pahjeh tih, bíc bācāh iiguípna ā bejipna caá.*

13“Būū ma pebhboó bejat tūt caá wā chājap. Nin baácboó jum jwuhna, íih pínahdih páant wā níj úbáp be, caandíh jointí, weém bícdih búdí ī weñat pínah

níijná. 14Ded pah ma jummatdih nitdih wáat naáwáp be. Weém yeejép wā chājcat pah nit wíhwāboó yeejép chājnitjé ī tūt nūmúchah ennit, bita tūt nūmúcnitboó queédih ī iiná caá. 15‘Nin baácđih jumnit wíhwādih ma úb bejeé’, wā níj úbhcan caá. Obohjeéhtih, ‘nin baácđih ī jum jwuhuchah, ma tūi en dawaá, Nemép queédih ā yeejacat pínah níijná’, wā níj úbhna caá. 16Weém nin baácđih moón yeejép ī jenah joyát pah wā jenah joicán caá. Pánihna, weemdíh jepahniit jumna, nin baácđih moón ī jenah joyát pah queébtut ī jenah joicán caá. 17Ma naáwát yoobópdih ā jumuchah, caandíh nit wíhwādih ma tūi bohénaá, meemdíh chah ī jepahat pínah níijná. 18Nin baácboó weemdíh ma wahat pahjeh muntih, weembút nit wíhwādihbut wā wahná caá, ded pah jwí jummatdih queét jwuh bitadih ī bohéat pínah níijná. 19Cáacwādih wā wun wúhbiipna caá, míhwā jumna, ma weñat pínahdihjeh ī chājat pínah níijná.

**Jesús nihat áihwā pínahdihbut
ā úbát**

20-21“ ‘Nit wíhwādihjeh ma teo wáacá’, wā níj úbhcan caá. Būū queébtóo bitadih wíhwā doonádih ī bohénachah jointí, weemdíh jepahniitdihbut ma teo wáacat pínahdih wā úbhna caá, nihat wíhwā bícdih ī jummat pínah níijná. Weém majeéh jwiít chénewā jumna yuhna, bícjuh caá. Pánihna, jwiít bícjuh jwí jummat pah queébtut jwíjeéh tūi bícdih ī jumna náah, ma wahní wā jummatdih nihat cáacwā ‘Yoobópdih tigaá’, ī níj jéihyat pínah níijná. 22Weemdíh ma wúhni wēpatdih wíhwādihbut wáat wúhup be, bícdih jwiít jwí jummat pah, queébtut tūi bícdih ī jummat pínah níijná. 23Weém queét bícdih wā jumuchah, meembút weém bícdih ma jumna caá. Páant bícdih jwí jumuchah, wíhwā yoobópdih bícwā pahjeh ī jumbipna caá. Páant bícwā pah ī jumuchah enna, ma wahní wā jummatdih cáacwā ī jéihbiipna caá. Pánihna,

* 17.12 Sal 41.9; Jn 13.18

weemdih ma oyat pah muntih, queétdihbut biíc yoobó ma oyatdih ī tái jéihbipna caá.

²⁴“Paá, nin baácdih jwí chājat pínah játih weemdih búdí oina, ma wēpat weemdih wāhñit, biíc yoobó maáta jwí jumup jī. Pánihna, wíhñwā jwí pehbóó wājééh ī jumát pínahdih queétdih wā náah yacna caá, weemdih maáh ma jwúub waadáatdih ī enat pínah niijná. ²⁵Paá, meém táini yoobát chājni, nin baácdih moón yeejépwā meemdih ī jéihcah yuhna, weémboó meemdih wā tái jéihna caá. Ma wahní wā jumát dih nit wíhñwā ī tái jéihna caá. ²⁶Ded pah meém ma jumát dih queétdih wā jéihyanap be. Túttimahbut, páantjeh wā jéihyabipna caá, weemdih ma oyat pahjeh muntih queétdihbut ma oyatdih ī jéihyat pínah niijná. Pánih jéihñit, queétdjehbut ī míic oyochah, ĩjééh bífcdih wā jumáipna caá”, Diosdih ā niijp jī.

**Jesúsdi h eníhcannit
caandih ī tewat**

(Mt 26.47-56; Mr 14.43-50; Lc 22.47-53)

18 ¹Páant niij úubh péanit, Jesús jwiít ā bohénitdih numah bac bejnit, Cedron wūt jumni mujdih cháuh bej, Olivo pácahi jumni jeená jwí jwibínap jī. ²Dawá láa caán pácahi jumupna Jesúsjih jwípí míic wáacap jī. Pánihna, Judas Jesúsdi h eníhcannitdih duó wáini pínah caanná jwí bejat pínahdih āt jéihyep tajī. ³Pánih jéihna, Jesúsdi h jéutat tétut niijná, Romano soldadowādih, Dioh mūdih wapnitdihbut āt duó wái jūúwúp tajī. Queétdih sacerdotewā maáta, fariseowā maátatbut it wahap tajī. Pánih jūóhna, ĩh jiiát yuyú déejih jiniit, itah tóopna, íbat naaná, máa quiñtajih man jumnit, ī juyúp jī. ⁴Pánihna, jwí jumupdih ī tóah jūúwúchah ennit, yeejép ā yapat pínahdih jéihna, Jesúsboó queétdih jwááh bejnit, nin pah ā niij úubh joyóp jī:

—¿Déhedih bid jūóh tígáá ñi chāj? ā niijp jī.

⁵—Jesús Nazaret tətchidih bóodih bid jūóhna caá jwí chājap, queét ī niij jepahap jī.

—Caan tígáá weém, Jesús ā niijp jī.

Queétdih duó wáini, Judas, queét cátna ā jumup jī. ⁶“Caan tígáá weém”, Jesús ā niij jepahachah joinít, caandih tewedih jūóhñitji táahjih ī chéi jwúub bej buugúp jī. ⁷Páant ī buugúchah ennit, queétdih Jesús nin pah ā jwúub niij úubh joyóp jī:

—¿Déhedih bid tígáá ñi chāj? ā niijp jī.

—Jesús Nazaret tətchidih bóodih bidna caá jwí chājap, queét ī jwúub niij jepahap jī.

⁸—‘Caan tígáá weém’, yeebdih wáat niij jepahap be. Pánihna, weemdih teona, nit wājééh jumnitdih ñi teoca bojóó, Jesús queétdih ā niijp jī.

⁹“Míihwā weemdih ma wāhñitdih biíc cáacdi h wā buúdat tútcap be”, Diosdih ā niij úubátji pah biíc yoobó ā yapat pínah niijná, “Nitdih ñi teoca bojóó”, ā niijp jī. ¹⁰Simón Pedro áh íbat naadih jwáat wáinit, sacerdotewā ī maáhdih teo wāhni Malco wūt jumniíh jéihyepmant bóo moli chóodih ā bóod yohop jī. ¹¹Páant ā bóod yohochah ennit, Jesús Pedrodih nin pah ā niijp jī:

—Míih íbat naadih ma jwúub yacaá. Wā íp ded pah weemdih ā náah yacat pah biíc yoobó yeejép wā yapbipna caá, ā niijp jī.*

**Sacerdotewā ī maáh pebhna
Jesúsdi h ub bejat**

(Mt 26.57-58; Mr 14.53-54; Lc 22.54)

¹²Páant ā niij péanachah, soldadowā, ī maáhjih, jwiít judiówā jwí maátatbut Jesúsdi h teonit, caandih ī chéwep jī. ¹³Chéo péanit, Anás pebhna ī ub bejep jī. Anás Caifás jóon wat jī. Caifásboó caán jópchidih sacerdotewā ī maáh ā jumup jī.

¹⁴“Nihat jwiít judiówā jwí tái jumát pínahdih biíc cáac ā wan wūhuchah ā táibipna caá”, niij naóhñitji Caifás ā jumup jī.*

* 18.11 Mt 26.39; Mr 14.36; Lc 22.42 * 18.14 Jn 11.49-50

Pedro ã yeeat*(Mt 26.69-70; Mr 14.66-68; Lc 22.55-57)*

¹⁵Weém, Simón Pedrojih Jesúsdih yúwpbit jwí en péenachah, Anáih mũuná Jesúsdih í ub juibínap jī. Pánihna, weémboó sacerdotewā í maáh ã jéihni jumna, Jesús táttimah maáih mũú wáihyat júduna weembút wā waad béjep jī. ¹⁶Obohjeéhtih, weém wā waadáchah, Pedroboó wáihyat júdu waadápmaahjeh ã chāwáp jī. Pánihna, jwúub bac júóhni, waadátboó wapnihdih Pedrodih wā waadát túutur jī. Páant mi waadát túutuchah joinít, weém Pedrodih wā numah waad béjep jī. ¹⁷Páant wā numah waad béjehah ennít, caant wapnihboó Pedrodih nin pah mi niij úubh joyóp jī: —¿Meembát Jesús ã pej jumni nihcan niit? mi niijíp jī.

—Nihcan caá weém, Pedro ã niij jepahap yuh jī.

¹⁸Caan chéi tabit pohba ã cábuhachah, caanjíh moón teo wáhnit tũu cónit, í mée chūudur jī. Pánihna, jwiítbut Pedrojih íjééh jwí mée chūudur jī.

Sacerdotewā í maáh Jesúsdih ã úubh joyát*(Mt 26.59-66; Mr 14.55-64; Lc 22.66-71)*

¹⁹Páant jwí mée chūudat pónih, sacerdotewā í maáh ã jóon Anásboó Jesúsdih át úubh joyóp wut jī. Jwiít ã bohénitdih, ded pah ã bohéátjidihbut át úubh joyóp wut jī. ²⁰Páant ã úubh joyóchah, Jesús caandíh nin pah át niij jepahap wut jī:

—Weém nihát í joyóchah, jweéhcanejeh wápí bohénap jī. Jwiít judíowā jwí míc wáacat mũudíh, Dioíh mũudíhbut wápí bohénap jī. ²¹Páant wā bohénachah yuhna, ¿dépanihna weemdíh páant ma niij úubh joí? Ma jéihíhna, weemdíh joinítjidih ma úubh joyóo. Queétoó meemdíh yoobópdih í naóhípná caá, át niijíp wut jī.

²²—Sacerdotewā í maáhdih páant ma niijcá bojoó, niijnít, caan pébh ñuhni soldado téihyajíh Jesúh púo tíibdih át madow wut jī.

²³—Ded pah yeejép wā niijátjidih weemdíh ñi naáwá. ¿Yoobópdih

yeebdíh wā naáwáchah yuhna, dépanih tígáá weemdíh ma mao? Jesús soldadodih át niijíp wut jī.

²⁴Pánih úubh joí péanit, Anásboó Jesúsdih páantjeh í chéonijidih ã jī Caifás, sacerdotewā í maáh yoobát pebhna át wahap wut jī.

Pedro ã jwúub yeeat*(Mt 26.71-75; Mr 14.69-72; Lc 22.58-62)*

²⁵Jesúsdih páant ã úubh joyát pónih, jwiít Simón Pedrojih páantjeh tũu cūut pebh jwí mée chūudur jī. Páant jwí mée chūuduchah ennít, caanjíh moon jwúh Pedrodih nin pah í niij úubh joyóp jī:

—¿Meembát Jesús ã pej jumni nihcan niit? í niijíp jī.

—Nihcan caá weém, Pedro ã jwúub niij jepahap yuh jī.

²⁶Páant ã niiját táttimah, sacerdotewā í maáhdih teo wáhní, Pedro moli chóodih ã bóod yohníjī ã dée jwúh Pedrodih nin pah ã niij úubh joyóp jī:

—¿Pácahi jumupdih meemdíh nihcannit beé Jesús bíicdih wā enep? ã niijíp jī.

²⁷—Weém ájeéh wihcan beé, Pedro ã niij jepahap yuh jī. Páant ã niijíchahjeh, mujbai áf ewep jī.

Pilato jwuh Jesúsdih ã úubh joyát*(Mt 27.1-2, 11-14; Mr 15.1-5; Lc 23.1-50)*

²⁸Baáb jéenechah, Caifáih mũumánt Jesúsdih ub bac bejnit, caán tútchidih moón í maáh Pilato wút jumníh mũuná caandíh í ub bejep jī. Pánih ub bejna yuhna, queétjeh áih mũuná waadcán, soldadowádhíh Jesúsdih í ub waad béjat túutur jī. Pilato judío nihcah, áih mũuná waadní, jwí wutatdih yap yohna, Pascua jeémátidih íta jéih jeémpan tagaá.

²⁹Páant í waadcáh ennít, Pilato jécidih bac juí ñuhni, queétdih nin pah ã niij úubh joyóp jī:

—¿Dedé júib tígáá nindih ñi naóh yac? ã niijíp jī.

³⁰—Caán yeejép nihcah, meemdíh jwíta ub júóhcan tagaá, í niij jepahap jī.

³¹—Caandíh ub bejnit, ñi wutat pah yeebjéh ñi pééh chájáá, Pilato queétdih ã niij jepahap jī.

—Obohjeéhtih, yeéb Romano maátaboó jwíft judíowádhíh cáacwádhíh ní mao yohat tútucap jí, í niijíp jí. Páant niijná, Jesúsdiíh í mawat tútatdih niijná í chájap jí.

³²Páant í mawat tútuchah, Jesús cruzboó á wunat pínahdih, játih á naáwátji bíic yoobó í chájat tútucap jí.*

³³Páant í niiját túttimah, Pilatoboó jwáúb waad béjnit, Jesúsdiíh át bid bojop wut jí. Pánih bid bojnit, caandíh nin pah át níj úúbh joyóp wut jí:

—¿Meém judíowá í maáh níft? át niijíp wut jí.

³⁴—¿Meemjéh úúbh jóf en níft ma chájap? ¿Bita í naáwáchah joiníji níft, páant ma níj úúbh joyóp? Pilatodih Jesús át niijíp wut jí.

³⁵—Páant, weém judío nihcan caá. Ma déewá, níih sacerdotewá maátabut meemdíh í wahap be. ¿Dedédih tibeé yeejép ma cháj, páant í peéh chájíhchah? Jesúsdiíh át níj úúbh joyóp wut jí.

³⁶—Weém nin baácdíh moón í maáh nihcan caá. Páant wá jumuchah nihna, wá bohénit weemdíh íta teo wáac tagaá, jwí déewá í teocat pínah niijná. Obohjeéhtih, wá maáh jumat nin baácboó nihcan caá, Jesús Pilatodih át níj jepahap wut jí.

³⁷—Pánihna, ¿meém maáh níft? páant niijná, Pilato át niijíp wut jí.

—Ma niiját pah maáh tigaá wá jumup. Cáacwá í maáh jumat tút, queétdih yoobópdih naáwát tút niijná, nin baácboó wá jéúwúp jí. Pánihna, ded yoobópdih chájíhni, weemdíh á tí jepahna caá, Jesús át niijíp wut jí.

³⁸—¿Dedé tigaá yoobópdih jumat? Pilato át niijíp wut jí.

Judíowá Jesúsdiíh í mao yohat tútat

(Mt 27.15-31; Mr 15.6-20; Lc 23.13-25)

Páant níj péa, Pilato jwáúb bac jéúhniit, queétd pái níhniit judíowádhíh nin pah á níj naáwáp jí:

—Ní mawat tútati Jesúsdiíh dedé peéh mawat wihcan caá. ³⁹Jópchi jumat pah, Pascua yeó jáapdhíh bíic nemat muúboó

jumnidih wápí baca wúhna caá. Pánihna, ¿níi maáh ní niijnídhíh yeebdíh wá baca wúh jíh? Pilato jwí maátadhíh á níj úúbh joyóp jí.

⁴⁰—Nihcan caá. Caandíh ma bacaca bojoó. Barrabásboodíh jwíftdih ma baca wúhúú, Pilatodih jwí déewá í níj náac jepahap jí. Barrabásboó Romano maátadhíh yohíhniitjeeh á jumup jí.

19 ¹Páant í níj náac jepahachah joinít, Pilato Jesúsdiíh soldadowádhíh át puñat tútucap wut jí.

²Páant í puñat túttimah, queétd óot tópdih péeb waoni júdu chájnit, Jesúsíh wao dáhdih ít yacap tají. Pánih yac péanit, maátaíh yégueh pah jígohni caandíh yacnit, nin pah ít níj deoh naáwáp wut jí:

³—Ma táí jumúú, judíowá í maáh, níj deoh naóhniit, Jesúsdiíh í dawát yoobó púina ít chájap wut jí.

⁴Páant í puñat túttimah, Pilato jwáúb bac jéúhniit, caanjíh pái níhniit jwí déewádhíh nin pah á jwáúb níj naáwáp jí:

—Ní joyoó. Nindhíh dedé peéh mawat wihcan caá. Páant á wihcatdih ní jéihyat pínah niijná, wá jwáúb úb bac jéúhna caá, á niijíp jí.

⁵Páant á níj péanachahjeh, Jesús óot júdu duoní, maátaíh yégueh pah jígohni í yacniji muú díftmat á bac jéúwúp jí. Páant á bac jéúwúchah, Pilato queétdih nin pah á niijíp jí:

—Ní eneé. Nin caá, á niijíp jí.

⁶Páant á niijíchah joinít, sacerdotewá í maáta, Dioíh muúdhíh wapnitbut Jesúsdiíh ennit, búdí í jéúh náacáp jí.

—iCaandíh cruzboó péoh dodhniit, ma mao yohat tútú! iCaandíh cruzboó péoh dodhniit, ma mao yohat tútú! í niijíp jí.

Páant í níj náacáchah joinít, Pilato nin pah queétdíh á jwáúb niijíp jí:

—Caandíh peéh mawat wihcah yuhna, ní mawíhna, yeebjéh úb bejnit péoh dodhniit, ní mawaá, á niijíp jí.

⁷Páant á niijíchah joinít, jwí maáta nin pah í jwáúb niijíp jí:

—‘Weém Dios wúh caá wá jumup’, caanjéh á niijíp be. Páant á niijátji jíib jwí nuowá í wutatji pah caandíh mao

* 18.32 Jn 3.14; 12.32

yohat caá náahap, queét Pilatodih ī niijíp jī.

⁸Páant ī niijíchah joinít, Pilatoboó chah ā joí wáhi bejep jī. ⁹Pánih joí wáhi bejna, Jesúsdih jwúub numah waad béjnit, caandíh nin pah át jwúub níj úúbh joyóp wut jī:

—¿Dedjīh bóo tigaá meém? át niijíp wut jī.

Páant ā niijíchah yuhna, Jesús caandíh át jepahcap wut jī.

¹⁰Páant ā jepahcchah, Pilato nin pah át jwúub níj úúbh joyóp wut jī, páant muntih:

—¿Weemdíh ma jepahíhcan níit? Weémboó meemdíh wá jéih bacana caá. Cruzboobút wá jéih péoh dodh mawat túttna caá. ¿Caandíh ma jéihcan níit? Jesúsdih át niijíp wut jī.

¹¹—Dios meemdíh pánih wēpatdih ā wúhcah, weemdíh ded pah mata jéih chājat tútcan tagaá. Oboghjeéhtih, weemdíh eníhcannitdih dúo wáiniboó meém chah yéejni ā jumna caá, Jesús Pilatodih át niijíp wut jī.

¹²Páant ā niijíchah joinít, Pilato caandíh átih bacaíhip wut yuh jī. Pánih bacaíhna, jwúub bac júóhnit, queét jwí maátadih ā bacaíhat déejidih ā wēp naáwáp yuh jī. Oboghjeéhtih, páant ā naáwáchah, jwí déewáboó chah íjnit, búdí ī jwúub níj júih náacáp jī.

—“Weém maáh caá”, niijná, Jesús jwí maáh Césardih eníhcanni caá. Pánihna, caandíh bacana, meembút Césardih yap yohni mata jum tagaá, Pilatodih ī niijíp jī.

¹³Páant ī niijíchah joinít, Jesúsdih jwúub bac júúwát túttnit, caandíh ded pah ā chājat pínahdih naáwát tút niijná, péeh chājat pínahdih naóhnit ípí chúudupboó Pilato ā yoób juí chúudup jī. Pilato ā chúudupboó jee dáhna ī jwejni coah ā jumup jī. Caan coah jwiít judfowá jwíh wéheatjīh Gabatá ā wüt jumup jī. ¹⁴Caán yeó jáapdih Pascua jeémát yeó jáap játih jwí míic ámohat yeó jáap, yeó téih púuh laáb junín ā jumup jī.

Pánih juí chúudnit,

—Nin caá ñi maáh, Pilato caanjíh páinít jwí déewádhī ā niijíp jī.

¹⁵—¡Á wun dáhwa naáh! ¡Á wun dáhwa naáh! ¡Uḅ bejnit, cruzboó péoh dodhnit, caandíh ñi mao yohoó! ī níj náacáp jī.

—¿Ñi maáh ā jumuchah yuhna, caandíh cruzboó péoh dodhnit, mao yohat tút níit ñi chājav? Pilato queétdih ā níj jepahap jī.

—Roma tútchidih bóo César jwí maáh yoobát caá. Bíh maáh jwiítidih ā wihcan caá, sacerdotewá ī maáta ī níj jepahap jī.

¹⁶Páant ī niiját túttimah, queét ī weñat pínah niijná, Jesúsdih cruzboó mao yohat túttna, Pilato áih soldadowádhī ā ub bejat tútup jī. Pánihna, queét soldadowá Pilatoíh mummánt Jesúsdih ī ub bac júúwúp jī.

Jesúsdih cruzboó péoh dodhnit, ī mawat

(Mt 27.32-44; Mr 15.21-32; Lc 23.26-43)

¹⁷Pánih ub bac júóhnit, Jesúsjeh áih cruzdih ā bewechah, Waó lidíp wüt jumni jeejina caandíh ī ub bejep jī. Jwíh wéheatjīh caán jeé Gólgota ā wüt jumup jī. ¹⁸Pánihna, bita chénewádhībut caán bíicdih ī mao yohat tút niijná, ájeéh ī ub bejep jī. Pánih ub bejna, caanná juibínit, queét bíic peihcannit ī beoniji cruznadih soldadowá ī nah péoh jwejep jī. Bíicdih Jesús ā jéihyepmant bóo búwámant péoh jwej, bíihdih ā wáyámant bóo búwámant ī péoh jwejep jī. Pánihna, ī tac yoób Jesúsdih ī péoh jwejep jī. ¹⁹Pánih péoh jwej péanit, Pilato ā daacát túttni naadíh Jesúh waó chahmant ī nah péoh búudhdup jī. Nin pah át níj daacát tútup tají: “NIN JESÚS NAZARET TÚTCHIDIH BÓO JUDÍOWÁ Í MAÁH CAA”, át níj daacát tútup tají. ²⁰Caán naadíh páant ā níj daacát túttna, jwíh wéheatjīh, Roma tútchidih moóníh wéheatjīh, Grecia baácdih moóníh wéheatjīhbut páant át níj daacát tútup tají. Pánih nah péoh péanit, queét bíic peihcannitdih ī yoób pud dodhdop jī, bāca. Queétdih cruzboó ī péoh dodh mawapboó tútchi jwéejdih ā jumup jī. Dawá jwí déewá queétdih ī péeh bejep jī. Pánihna, caanná juibínit, Pilato ā daacát tútattjidih dawá jwí enep jī. ²¹Páant ā níj daacát tútattjidih dawá jwí

enechah íjnit, Pilato pehbboó jwáub bejnit, sacerdotewā ī maáta nin pah caandíh ít níj wutup wut yuh jí:

—Nin judíowā ī maáh caá', ma níj daacát tútca bojó. Caánboó jwí maáh nihcan caá. Obohjeéhtih, nin pah ma jwáub níj daacát tútú: “Judíowā ī maáh caá weém”, ā níjip be', ma níj daacát tútú, ít níjip wut yuh jí.

²²—Wā jwíih daacát tútat pahjeh ā jumá naáh, Pilato queédih át níj jepahap wut jí.

²³Jesúsdi h ī péoh dodhdát túttimah, chéneha míc soldadowā Jesúih yéguehnajidih ī jumát yoobó ī ubup jí. Áih jih bóo chóo, waica naáh chóo ā jumup jí. ²⁴Caán chóo, páni hni ā jumuchah, nin pah queét mícjeh ī níjip jí:

—Nin yégueh chóodih jwí yeo wáica boj jíih. Ded nin chóodih ubni pínahdih jéihyat tút níjná, jwí yoh tíoh jwuh jíih, ī míc níjip jí. Páant níjnit, íih tíhwat naajíh ī yoh tíhwp jí.

Páni h tíohna, Dios naáwát dih naóh yapani ā daacát jí pahjeh ā yapat pínah níjná, queét páant ī chájap jí. “Wíih yégueh chóodih queét ī jumát yoobó ī ubbipna caá. Páni hna, wíih yéguehdih ubni pínahdih jéihíhna, tíhwat naajíh ī yoh tíohbipna caá”, át níj daacáp tají.*

²⁵Páant ī chájachah, Jesúih cruz pehbbit chéneha míc yaádh bícdih weém wā en ñuhup jí. Jesús íin, ā cheh, bíih wili María Cleofas áa, bíih wili María Mágdala tútchidih bóli jwí en ñuhup jí. ²⁶Páni hna, ā íin bícdih weém búdí ā oinibat ā pehb wā en ñuhuchah ennit, ā íindih Jesús nin pah ā níjip jí:

—Naá, can wā bohénijiboó meemdíh ma wúh pah ā jumbipna caá, ā níjip jí.

²⁷Páant níj péanit, weemdíh jwuh nin pah ā níjip jí:

—Buu cant ma íin pah mi jumbipna caá, ā níjip jí.

Páant ā níjichah joinít, caán yeo jáapjeh caántdih jwíih muúboó wā ub waadánap jí.

Jesús ā wunat

(Mt 27.45-56; Mr 15.33-41; Lc 23.44-49)

²⁸Páant ā níj péaat túttimah, “Nihat Dios weemdíh ā wutnidih wā cháj péanap be”, níj jéihna, Dios naáwát dih naóh yapanit ī daacát jí pahjeh ā yapat pínah níjná, Jesús nin pah ā níjip jí:

—Weemdíh taca joót na caá, ā níjip jí.*

²⁹Caanjíh bijni jiwá iguíh mac jumni wáam dahdih ī bíbohup jí. Páni hna, bíc soldado hisopo wut jumni máa doóbhdih ubnit, páab chuí déedih chéo búhdhnt, bijni macdih ā taj báahanap jí. Taj báaha péanit, Jesúih jacna ā nah tewep jí, ā wái nomat pínah níjná. ³⁰Páant ā chájachah, Jesús caandíh wái nom péanit,

—Páant bóojeh tigaá, níj, waó yaíh duonít, ā wunah bejep jí.

Soldado Jesúih páwádih ā jwáagat

³¹Caán ā wunni yeo jáapdih, Pascua yeo jáapna jwí chooát yeo jáap pínahdih jwí ámohat ā jumup jí. Jwíit judíowā caán chooát yeo jáapdih cruzboó páantjeh ī ñuhát dih jwí náahcap jí. Páni hna, íih wúu nahnadih daj mawachah, waícanjeh ī wunat pínah níjná, jwí maát aboó Pilatodih ít daj mawat tútup wut jí. Páant ī daj mawat túttimah, íih bácahjidi h waícanjeh ub deyaat tút ít chájap tají. ³²Páant ī wutuchah joinít, Pilato cruzboó ñuhndih íih wúu nahnadih soldadowádih át daj mawat tútup wut jí. ³³Obohjeéhtih, caan péhb ñuhndih daj mao péa, yap júóhnt, Jesús játih ā wunatjidi h enna, áih wúu nahnaboodíh ī daj maocap jí.

³⁴Páni h daj maocan yuhna, bíc soldado áih ítah túopjíh Jesúih páwá píjmant ā jwáag aabánap jí. Páant ā jwáagachah, bícmantjeh meép mahjíh wid jumni ā chí júúwúp jí. ³⁵Páant ā chí júúwúchah, weemjeh wā enep jí. “Weém nin tólihdih páant wā níj daácna, yoobópdih naóhna caá wā chájap”, wā níj jéihna caá. Páni hna, yeebdíhbut wā naóh yapana caá, yeebbát Jesúsdi h ní tui jenah joyát pínah níjná. ³⁶Dios naáwát dih naóh

yapanit i naóh daacátji pahjeh tibeé páant á yapap jĩ. “Áih bácahdih ded iidípdih i daj maocan níft”, i níj daacátji pahjeh, Jesúh wéu nahnadhi i daj maocap jĩ. * ³⁷Dios naawátidih bíh tólihdih nin pahbút it níj daacáp tajĩ: “Queét i jwáagnijidih i enbipna caá”, it níj daacáp tajĩ.*

Jesúh bácahjidih i yohat

(Mt 27.57-61; Mr 15.42-47; Lc 23.50-56)

³⁸Jesús á wunat túttimah, José Arimatea tútchidih bóo, áih bácahjidih úb deyaat tút niijná, Pilatodih úbádih át bejep wut jĩ. Páant á úbácah joinit, á yohat pínah niijná, Pilato caandíh át úb deyaat tútup wut jĩ. Páant á úb deyaat tútuchah joinit, José cruzboó ñuhnit pebhna joinit, Jesúh bácahjidih á úb deyanap jĩ. José jwí déewá maátadih úmna, Jesúsdih á jepahatjidih át naawíhcap tajĩ. ³⁹Nicodemo, Jesúsdih chei juí wéhenijibut,* ájeéh jüóhni, mirra wút jumni chej jumni ah, áloe wút jumni chípéh déejih widnidih á úb juyúp jĩ, Jesúh bácahjidih i yohat pínah játih ñáñat tút niijná. Caán á úb jüóhni treinta kilos át chodop jĩ. ⁴⁰Pánihna, queét chénewá Jesúh bácahjidih úb deyanit, jwiít judíowá wunnitdih jwípí yohat pah, áih bácahjidih chej jumnijih ñáinit, yéguehnajih i pinip jĩ. ⁴¹Cruzboó Jesúsdih i mawap pebh pácahi á jumup jĩ. Caán pácahi tac yoób cáac i yohat pínah i jáap baadni jeé fit át jumup jĩ. Caán i baadni ítdih cáac yoh jwuhca naáh át jumup jĩ. ⁴²Pánihna, jwí chooát hora tóah jüúwúchah, áih bácahjidih úb bejnit, chooát yeó jáap túttimah caandíh táí ámoh péaat tút niijná, caán pehbít jumni jeé ítdih yóhahnitjeh i yohop jĩ.

Jesús á boo pud jüúwát

(Mt 28.1-10; Mr 16.1-8; Lc 24.1-12)

20 ¹Domingo yeó jáapdih baab bójat pínah játih, María Mágdala tútchidih bóli, Jesúsdih i yohopjiboó mit bej jáanap wut jĩ. Caanná juibínit, caán ítdih i nemniji jeé júdúdh bita i pítú dohdhatji pah á jumuchah, mit enep wut

jĩ. ²Pánih ennihji weém, Jesús bádí á oini, Simón Pedrojih jwí jumupna mi ñáo juyúp jĩ. Pánih ñáo joinit, jwiítidih nin pah mi níj naawáp jĩ:

—Jwí Maáih bácahjidih jáantjeh it úbup tabe. Pánih úb bejnitji ded i jwáúb jwejepjiboó wá jéihcan caá, mi niijíp jĩ.

³Páant mi niijchah joinit, jwiítbut Jesúsdih i yohopjiboó enedih jwí ñáo ñah bejep jĩ. ⁴Pánih ñáo ñah bejna, weém Pedrodih ñáo yapnit, á játih caán yohopji jeé ítna wá waóh juibínap jĩ. ⁵Pánih játih juibína yuhna, caán ítdih waadánjeh, péeb jéen enna, Jesúsdih i pinni chóonajijeh á lajachah, wá enep jĩ. ⁶Páant wá péeb jéen enechahjeh, Simón Pedro péé joinit, cháó ñuhcanjeh, caán ítna á waad bejep jĩ. Pánih waan bejnit, Jesúh bácahjidih i pinni chóonajijeh á lajachah, caanbát á enep jĩ. ⁷Jesúh wao dáhdih i pinni chóo chíbit yúúp á lajachah, caandíhbut á enep jĩ. I pinni chóona áih bácahdih áih wao dáhdihbut i pinatji pahjeh á lajap jĩ. ⁸Pánihna, waad bejnit, á en ñuhchah ennit, weembát wá ñuún waad bejep jĩ. Pánih ñuún waadnit, Jesúh bácah á wihcah ennit, “Yoobópdih Jesús át jwáúb boo pud júóh tagaá”, weém wá níj jéihyep jĩ. ⁹Caán ítboó jwí bejat pínah játih, Dios naawátidih naóh yapanit Cristo á wunat pínadhih, á jwáúb boo pud jüúwát pínahdihbut i daacátjidih jwí táí beh joi jwúhcap jĩ. ¹⁰Pánih en péanit, jwiíh muuná jwí jwáúb bejep jĩ.

María Mágdala tútchidih bólihdih

Jesús á jígohat

(Mr 16.9-11)

¹¹Jwiítidih mi naawát túttimah, María Mágdala tútchidih bóli jwí túttimah péé bejnit, Jesúh bácahdih i yohopji jeé ít jéc jíponih ñuhnit, mit jüí ñúhup wut jĩ. Pánih jüí ñúhnajeh, péeb jéennit, caán ítna mit en waadá bojop wut jĩ. ¹²Pánih en waadána, Dios á wahnit ángelwá chénewádhíh mit enep wut jĩ. Táí baabní yéguehna duonít, Jesúh bácah á lajapjidih it chúdúp wut jĩ. Biíc áih waó jumupjimant, bíh áih jítcha jumupjimant it chúdúp wut jĩ. ¹³Páant

* 19.36 Ex 12.46; Nm 9.12; Sal 34.20; 1Co 5.7 * 19.37 Zac 12.10; Ap 1.7 * 19.39 Jn 3.1-2

queétdih mi péeb jéen enechah, queétdih
caántdih nin pah it níj úúbh joyóp wut
jĩ:

—¿Yad wilí, dépanih tigaá ma jũí? it
niijíp wut jĩ.

—Wá maáih báhahjidih úb bejnit, ded í
jwáúb jwejepjiboó wá jéihcan caá, mit
níj jepahap wut jĩ.

¹⁴Queétdih páant niijnít, tac páud
enna, Jesús caanjíh á ñuhuchah, mit enep
wut yah jĩ. Obohjeéhtih, pánih enna
yahna, mit beh encap wut jĩ.

¹⁵Páant mi beh encah, Jesús caántdih
nin pah át níj úúbh joyóp wut jĩ:

—¿Yad wilí, dépanih tigaá ma jũí?
¿Déhedih tigaá ma bid? át niijíp wut jĩ.

Páant caandíh beh encanjeh, “Nin
páhahidih en daoní nacaá”, mit níj
jenah joyóp wut yah jĩ. Páant níj jenah
joiná,

—¿Meemnit beé jwí maáih báhahjidih
ma úb bejep? Úb bejna, ded ma jwáúb
jwejepjiboó weemdíh ma naáwá, caandíh
jwáúb úbúdh wá bejat pínah niijná,
caandíh mit niijíp wut jĩ.

¹⁶—María, át niijíp wut jĩ.

Páant á niijíchah joí, tac páud ñuhnit,
Hebreo wéheatjĩh nin pah mit niijíp wut
jĩ.

—Raboni, niijnít, Jesúsdih mit pin
tewep wut jĩ. “Raboni”, niijná, “Bohéni”,
niijná mit chájap wut jĩ.

¹⁷Páant mi pin teweuchah, Jesús
caántdih nin pah át niijíp wut jĩ:

—Weemdíh ma pin teoca bojoó. Wá
íp pehbhoó wá páuh laab béj jwuhcan
caá. Pin teocanjeh, wá úudwá
panihnitdih nin pah níj naáwádh ma
bejeé: ‘Jesús nin pah yeebdíh á níj
naáwát túutap be: “Wá íp ñi íp mun
tigaá. Caanjéh wíh Dios ñíh Dios mun
tigaá. Pánihna, á pehbhoó wá páuh laab
béjipna caá”, á níj naáwát túutap be’,
queétdih ma niijí, Mariádh Jesús át
niijíp wut jĩ.

¹⁸Páant á niijíchah joinhji jwí pebhna
juinít, nin pah mi niijíp jĩ: “Jwí Maáhdih
wá enep be”, niijnít, Jesús caántdih á
naáwát túutatjídih jwiítdih mi naóh
yapanap jĩ.

Jesús á bohénitjidih á jígohat

(Mt 28.16-20; Mr 16.14-18; Lc 24.36-49)

¹⁹Caán domingo yeó jáap cheych túo
yap aabát túttimah, jwiít Jesús á
bohénitji, jwí maátadih úmna, jécidih tái
nem beedá bojnit, muú díitna bíicdih jwí
chúudup jĩ. Páant túi nem beedáni á
jumuchah yahna, Jesús jwí cátfh á
jígohop jĩ. Pánih jígohnit, nin pah á niijíp
jĩ:

—¿Ñi jum caá? Dios á túyat ñijeéh á
jumú naáh, á niijíp jĩ.

²⁰Páant níj péanit, áih téihyanadih, áih
jítchanadihbut jwiítdih á júutap jĩ. Páant
á júutuchah enna, jwí Maáh á jumatdih
jéihnit, búdí jwí weñep jĩ. ²¹Páant jwí
weñechah, Jesús nin pah jwiítdih á
jwáúb niijíp jĩ:

—Úmcanjeh, ñi túi jumú. Wá íp
weemdíh á wahat pah muntíh, wíh túini
doonádh ñi naáwát pínah niijná,
yeebdíhbut wá wahna caá, á niijíp jĩ.

²²Páant níj péanit, jwiítdih á póoj
jáhanap jĩ.

—Buu Túini Espíritudih ñi úbuú, ñíh
caolih díitboó á jumát pínah niijná.

²³Páant ñijeéh jumna, á wēpatjĩh det í
yééj chájatdih ñi yohochah, yohni á
jumbipna caá. Obohjeéhtih, det í yééj
chájatdih ñi yohcah, yohca naáh á
jumbipna caá, Jesús jwiítdih á niijíp jĩ.*

Jesús á jwáúb jígohochah,

Tomás á enat

²⁴Jesús jwí cátfh á jwiíh jígohni chei,
Tomás pohba jwíjeéh á whcap jĩ. Tomás
Jesúsdih jwíjeéh bohéni “Waláhni”, ípí
níj wūt ejni á jumap jĩ.

²⁵Táttimah, á jwáúb juyéuchah, caandíh
nin pah jwí niijíp jĩ:

—Jwiít jwí maáh Jesúsdih jwí enna
beé, jwí niijíp jĩ.

Páant jwí niijíchah joiná yahna,
Tomásboó nin pah á jíponíh níj
jepahjehep jĩ:

—Weémboó áih téihyadih í péhwatji
fítndih wíh téih túbjĩh teo encan, áih
páwádh í jwáagatji fítndihbut teo encan,
‘Á boo pud júúwát dooná yoobópdih caá’,

* 20.23 Mt 16.19; 18.18

wā niŋ jenah joicán niŋt, jwiítidh ā jāh niŋjéhep jī.

²⁶Táttimah bóo domingo yeó jáap caán meudíhjih jwí jwáub míic wáac juyúchah, Tomásbut jwíjeéh ā jumup jī. Pánih míic wáac juníit, niहत jécnadih jwí jwáub táí nemechah yuhna, Jesús jwí cātíh ā jwáub jígohop jī. Pánih jígohnit, nin pah jwiítidh ā niŋjíp jī:

—¿Ni jum caá? Dios ā táyat niŋjeéh ā jum naáh, ā niŋjíp jī.

²⁷Pánih niŋjít, Tomásboodíh nin pah ā niŋjíp jī:

—Tomás, wíih téihyadih í péhwatjí ítnadih meemjéh ma teo eneé. Wíih páwadih í jwáagatjí ítdihbut ma teo eneé. Teo ennit, ‘Yoobópdih tigaá át boo pud júúwáp taga’, ma niŋ jéihyeé, caandíh ā niŋjíp jī.

²⁸—Meémboó wā Maáh, wíih Diosbut caá, Tomás caandíh ā niŋjíp jī.

²⁹—Weemdíh ennitjeh, ‘Yoobópdih tigaá át boo pud júúwáp. Pánih boo pud júóhna, Dios ā wahní Cristo yoobát caá’, meém ma niŋ jéihna caá. Obohjeéhtih, bitaboó weemdíh encan yuhna, páant niŋ jéihnit, búdí í wēibipna caá, Jesús Tomásdih ā niŋjíp jī.

Jesúsdiŋ cáacwā í jéihyat pínah niŋjná, Juan nin tólihdih ā daacát

³⁰Jwíjeéh jum jwuhna, dawá láa jwiít cáacwā jwí jéih chájca naáhdih Dios ā wēpatjīh Jesús ā chāj jútup jī. Páant ā chájatjidih nin tólihdih wā jéih daác beedácan caá. ³¹Pánih daác beedácan yuhna, nin tólihdihjih wā daacáp be, “Yoobópdih Dios ā wahní Jesúsjeŋh tigaá. Caanjéh tigaá Dios wáúh”, ni niŋ jéihyat pínah niŋjná. Páant niŋ jéihna, caandíh jepahnit, yeéb Diosjeéh páantjeh ni jumbipna caá.

Jesús Tiberias ím jwéejdih siete ā bohénitjidih ā jwáub jígohat

21 ¹Táttimah, jwiít siete ā bohénitjidih Tiberias ím jwéejdih Jesús ā jwáub jígohop jī. Nin pah ā jumup jī: ²Jwiít bíicdih jumnit, Simón Pedro, Tomás “Waláhni”, jwí niŋ

ejni, Natanael Galilea baác Caná tútchidih bóo, jwiít chénewā Zebedeo weh, bita chénewā Jesús ā bohénitji, páant moón jwí jumup jī. ³Páant moón jwí jumuchah, Simón Pedro jwiítidh nin pah ā niŋjíp jī:

—Weém queej júut mawadih bejna caá wā chájap, ā niŋjíp jī.

—Jwiítbut majeéh jwí bejmi caá, jwí niŋjíp jī.

Páant niŋ, dei jwíbí, jááj chóodih waadnit, ímdih jwí páud bac bejep jī. Pánih páud bac bejnit, niहत chei jwí júut mawachah yuhna, queejwá í chéúhcáp jī. ⁴Baáb báahachah, Jesús ím jwéejdih ā niŋhuchah, jwí enep yuh jī.

Obohjeéhtih, caandíh jwí beh encap jī.

⁵Pánih niŋhna, jwiítidh nin pah ā niŋ ej wáuh joyóp jī:

—¿Wá déewáá, queejwádh ni bid juicá? ā niŋjíp jī.

—Wihcan caá, jwí niŋ jepahap jī.

⁶Páant jwí niŋ jepahachah joinít, nin pah Jesús ā jwáub niŋ ejep jī:

—Jéihyepmant bóo buwáboó níih niŋodíh ni yoh báaha en tigaá, ā niŋjíp jī.

Páant ā niŋjíchah joinít, caán niŋodíh yoh báahana, dawá queejwá í chéúchah joinít, jwíih niŋodíh jwí wái niŋaha bojop yuh jī. Obohjeéhtih, tub dawá í jumuchah, jááj chóoboó jwí jéih wá yaccap jī. ⁷Páant dawá í jumuchah, Jesúsdiŋ jwí jwíih jwááh láa bíic yoobó ā yapatjidih náhninit, weémboó, Jesús búdí ā oini,

—Jwí Maáh caá, Pedrodih wā niŋjíp jī.

Páant wā niŋjíchah joinítjeh, ā tóo dug jwejni yéguh chóodih jwáub duó ámoh chéonit, niŋáp báah bejnit, Jesús pebhna ā yaáh niŋan bejep jī. ⁸Páant ā yaáh niŋan bejchah, caán niŋodíh teonit, jwiítboó jááj chóojih jwí wái niŋan jwibínap jī. Ím tac yoob póhba ā niŋcan jíí, táí jwéej bugdíhjih jwí jumup jī. ⁹Pánih wái niŋan jwibínit, Jesús ā chájni táí iigni tūú táóhjih queejwá pan bíicdih ā lajachah, jwí enep jī. ¹⁰Páant jwí niŋan jwibínachah, Jesús nin pah jwiítidh ā niŋjíp jī:

—Butéh ni júut maonitdih daocánnit ni wá júúwá, ā niŋjíp jī.

¹¹Páant ā niijchah joinít, Simón Pedro jāáj chódih waadní, ñuodíh watnit, óon coahboó ā wái ñáan jūúwáp jī. Dahwanit míicjeh ciento cincuenta y tres queejwá ī jumap jī. Páant moón dawá ī jumna yuhna, caán ñuodíh ī boloh wáicarp jī.

¹²Pánihna, Jesús jwiítidih nin pah ā jwúub niijíp jī:

—Ñi jeémp jáa jūúwá, ā niijíp jī.

Páant ā niijchah joinít, ā pebh juibínit, caandíh en poonit jumna, “Jwí Maáh caá”, niijná, jwiít jwí úúbh joí encarp jī.

¹³Páant ā pebh jwí juibínachah, Jesús queéj pan bíicdih nah teonit, jwiítidih ā wúhup jī.

¹⁴Caán yeó jáarpdih ā boo púd jūúwát túttimah, jwiítidih bíic peihcanni láa míic júutna ā chājap jī.

Jesús Simón Pedrodih ā míic wéheat

¹⁵Páant jwí jeémp péaat túttimah, Jesús Simón Pedrodih yúapbit numah bejnit, nin pah ā niij úúbh joyóp jī:

—Simón, Jonás wúúh, équeé ī oyat chah weemdíh ma oi níit? ā niijíp jī.

—Wá oina caá, Maá. Wá oyatdih ma jéihna caá, ā niij jepahap jī.

—Pánih oina, wíh oveja weh panihnidih ma tái inií, Jesús caandíh ā niijíp jī.

¹⁶Páant niijnít, nin pah ā jwúub niij úúbh joyóp jī, páant muntih:

—Simón, Jonás wúúh, éyoobópdih weemdíh ma oi níit? ā niijíp jī.

—Maá, meemdíh wá oina caá. Wá oyatdih ma jéihna caá, ā niij jepahap jī.

—Pánih oina, wíh owejawá panihnidih ma tái en dawaá, Jesús ā niijíp jī.

¹⁷Páant niijnít, nin pah ā jwúub niij úúbh joyóp jī:

—Simón, Jonás wúúh, éweemdíh oyat yoobát níit ma oyop? ā niijíp jī.

Bíic peihcanni láa “éweemdíh ma oi níit?” ā niij úúbh joyóchah joinít, Pedro búdí jíghannit, nin pah ā niij jepahap jī:

—Maá, nihadidih jéihni jumna, meemdíh wá oyatdih ma jéihna caá, ā niij jepahap jī.

—Pánih oina, wíh owejawá panihnit ī jeémát pínahdih ma tái wúhúú.

¹⁸Yoobópdih meemdíh wá naóhna caá. Jáap jum jwuhna, meemjéh yégueh waadní, ded ma bejihpboó mapí bejep jī. Obohjeéhtih, behe ma jumuchah, míih muj nahdih ma júut ñahanachah, meemdíh yégueh yacnit, ded ma bejihcapboó bita ī ub bejbipna caá, Pedrodih Jesús ā niijíp jī.

¹⁹Páant niijná, Jesúsdih jepahni ā jumát jíib, ded pah Pedrodih bita ī mawat pínahdih jéihya naóhna ā chājap jī. Páant niij péanit,

—Weém ded pah wá chājatjidih enniiji jumna, bíic yoobó ma chājaá, Jesús caandíh ā niijíp jī.

Jesús ā bohéni búdí ā oini nin tólihdih ā daacát

²⁰Páant ā niij naáwáchahjeh, Pedroboó tac púud ennit, weém Juan, Jesús búdí ā oini, queétdih wá ñuún péenachah, ā enep jī. Bíicdih jwí péé jeémp láa, weémboó Jesús ā pebh dodh jáah lajni “éMaá, meemdíh enihcannitdih júutni pínah ded tigaá ā jum?” Jesúsdih niij úúbh joiní wá jumap jī.* ²¹Pánihna, weemdíh ennit, Pedro Jesúsdih nin pah ā niij úúbh joyóp jī:

—éMaá, canboodíh ded pah tigaá ā yapbi? ā niijíp jī.

²²—Nin baácboó wá jwúub dei jūúwúchah, candih páantjeh wá jumát túttuchah, míih pínah nihcan caá. Pánihna, candih ded pah ā yapat pínahdih meemdíh wá naóhna caá. Obohjeéhtih, ded pah wá chājatjidih enniiji jumna, meémboó bíic yoobó ma chājaá, Jesús Pedrodih ā niijíp jī.

²³Páant Pedrodih ā naáwátjidih jéihnit, nihát Jesúh wá queéjtjeh chah búdí it míic wéhenap jī. “Juan, Jesús búdí ā oini, ā wuncan níit”, weemdíh queéjtjeh it niij míic wéhenap yuh jī. Obohjeéhtih, “Caán ā wuncan níit”, Jesús niijná ā chājcan jī. “Nin baácboó wá jwúub dei jūúwúchah, candih páantjeh wá jumát túttuchah, míih pínah nihcan caá. Pánihna, ded pah candih ā yapat pínahdih meemdíh wá

* 21.20 Jn 13.25

naóhcan caá”, Pedrodih Jesús níj naóhna ã chãjap jĩ.

²⁴Pánihna, weemdíh jĩí, Jesús páant ã níj naáwáp jĩ. Caán ded pah yoobópdih ã yapatjidih jéihnit, nin tólihdih wã daácna caá. Pánihna, nin wã naáwát yoobópdih ã jummatdih jwĩ tãí jéihna caá. ²⁵Dawá

bíhdihbüt Jesús ã chãjap yah jĩ.

Obohjeéhtih, “níhat ã chãjatjidih wã daác beedánachah, dawá tólihna ã jumuchah, ãta en bũjjácan tagaá”, wã níj jenah joiná caá.

Pánihna, páant bóojeh weém Juan wã daác péana caá.